

**NINTH MIZORAM LEGISLATIVE ASSEMBLY
(SECOND SESSION CUM BUDGET SESSION)**

LIST OF BUSINESS

FOR FOURTH SITTING ON FRIDAY, THE 23rd FEBRUARY, 2024
(Time 10:30 A.M to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

PRIVATE MEMBERS' BUSINESS

2. *Resolution

(VANLALTHANTLINGI)
Commissioner & Secretary

* Please see Bulletin Part-II No. 26, dated the 22nd February, 2024 for Private Members' Resolution to be moved.

HON. SPEAKER : *I mite chu felnain ro a relsak ang a, I mi retheite chu rorelna felin ro a relsak ang.*

-Sam 72:2

Hei, vawiinah kan member Pi Baryl Vanneihnsangi damlohna avangin a lo kal thei dawn lova, House ka hriattir e. Tichuan, tunhma Sawrkarina a thil tih thin tha tak mai tih chhunzawm atan - Nilaini hi *Hnam-inchei Ni* atan puan a ni a, membrete'n kan zawm chhunzawm hram hram dawn nia. Nilaini-ah hnam incheia inchei tur a ni e.

QUESTIONS & ANSWERS:

Tichuan, hun te a rei loh nan *Zawhna & Chhanna* ah kan kal nghal mai ang a. *Starred Question No. 41* - zawt turin Thorang Bialtu zahawm tak Pu R. Rohmingliana i lo sawm ang.

Starred Question No. 41 - *Lo neitu te tana Solar tui pump (PM.KUSUM) chungchang.*

PU R. ROHMINGLIANA: Pu Speaker, ka lawm e. *Starred Question No. 41* chu -

“Sawrkar hmasain loneitute tana solar - tui pump (PM-KUSUM) Unit 1700, tender pawh tihfel vek tawh kha pek chhuah tan tumna a awm em?” tih a ni a.

Pu Speaker, ka zawhna bakah hian khawngaihni, Computer tawlh sual avangin thil tihsual ka rawn nei a, a pawh khawp mai a, ngaihdam ka rawn dil ni se la. Hei, hi ‘Public Health Engineering Department’ tiin rawn ziah palh a ni a, nizanah ka hrechhuak a. Hei hi Irrigation & Water Resources Department tih tur a ni a. Khawngaih takin Public Health Engineering Minister zahawm tak khan min chhan theih chuan ka lawm ngawt ang.

HON. SPEAKER : Aw le, Public Health Engineering-ah member zahawm tak khan a zawt miao si a. Chuvangin, PHE changtu Minister, Prof. Lalnilawma khan a chhan theih chuan, chhang turin i lo sawm ang.

PROF. LALNILAWMA, HON. MINISTER: Pu Speaker, Thorang Bialtu Pu R. Rohmingliana zawhna chhanna chu -

PM-KUSUM hnuaia Solar Pump Unit 1700 hi a rang thei ang bera pek chhuah turin hma lak mek a ni. Tun thal chung ngeia hna tan tum a ni.

HON. SPEAKER : *Zawhbelhna* a awm em? *Zawhna-neitu*, Thorang Bialtu Pu R. Rohmingliana i lo sawm ang.

PU R. ROHMINGLIANA: Pu Speaker, ka *Zawhbelhna Pakhatna* - Mizoram tana vendor tur hi tute nge an nih? Vendor thlang tur hian tutein nge tender chhuah? *Pahnihna* – Fur-ruahtui a lo thlen hma ngei hian lo neitute hmunah he khawl hi install hman vek a ni ang em?

HON. SPEAKER : *Zawhbelhna* dang zawt turin Pu V. Malsawmtluanga, Lunglei North Bialtu member zahawm tak i lo sawm ang.

PU V. MALSAWMTLUANGA : Pu Speaker, ka lawm e. Pu Speaker, I remtihain, *Zawhna* a nih rualin, ka zawhna pawimawh zia ti lang turin he House zahawm takah hian han thlehkual ve lawk ka duh a.

Kan hriat theuh angin, Lunglei town area mipuite, tuiah hian kan harsa em em mai a, thal hi kan huphurh a ni. Thal kan hmachhawna hi ‘*thih hrehin kan hreh em maw ni*’ tih tur khawp hian tuiah kan harsa a. Hun hmasa lama kan sawrkar lo hrawn tawh ten Lunglei mipuite, kawng hrang hranga tiam min lo nei tawh a, hmalakna tak erawh hmuh tur a awm lo niin a lang a. Tichuan, tuna sawrkar tharrawn piang ta, thla-hnih leka upa hian Lunglei mipuite hmuh theihin hmalakna te pawh a kal mek niin a lang a. Tin, tuna water supply scheme kan hman lai meka saw 1994-a diesel hmanga lo run tawh a ni a. 1995, November thlaah hawn a ni nghe nghe a ni. Kum 30 zet zawt hmel a lo hmu ta reng mai a.

Mithiamte sawi danah chuan - a pipe te pawh hi, a pipe a zir leh a dahna hmun a zirin kum 15 - 30 dam thei ang a ni a. Amaherawhchu, Mizoram angah chuan leiah kan phum lo thei lova, kum 7 velah a tuiek thin ang a ni. Chu chu kan la ring a, kum 30 vel zen zawn chhung a ni a. Amaherawhchu, hei, kan Sawrkar hrawn mek hian a ngaipawimawh a, hma a la mek niin ka lo hria a. Chung an hmalakna zinga kan PHE Minister zahawm tak, Prof. Lalnilawma’n min chhan atana ka *Zawhna* chu-

“NESIDS hnuuia Upgradation of Greater Lunglei Water Supply Scheme proposal kal mek hi hmuh ngei kan inbeisei em? Engnge a thlenchin?” tih a ni e. Ka lawm e.

HON. SPEAKER : A chhang turin PHE changtu Minister, Prof. Lalnilawma i lo sawm ang, a chhan theih ang angte chhang turin. Amaherawhchu, sawi tak angin eng emaw irrigation concern te a nih chuan, rawn sawi mai sela a tha ang e.

PROF. LALNILAWMA, HON. MINISTER: Pu Speaker, ni e, Irrigation & Water Resource Deptt. chan kha chu a department changtu Minister khan a rawn chhan theih leh min rawn pui se, kan department chan a nih loh avangin. Tuna Lunglei North Bialtu zawhna kha, a chhanna chu hetiang hi a ni -

Ni e, Lunglei lampang tui harsat zia Sawrkarin a hria a, a site-ah February Ni 7 khan kan E-in-C leh kan official thenkhatte nen kan va tlawh a. Chutah chuan, hma lak a tul hle tih te kan va hmu a. Hma lak mek a ni a, tuna a rawn sawi ang khan, Greater Lunglei Water Supply Scheme bika hi 1995-a commissioned kha a ni a.

Heng kan khawlte hi a nih dan chuan a life-time hi kum 15 te a ni. Amaherawhchu, Mizoram puma kan khawl hmun hrang hranga kan hman te hi a life-time pel deuh vek a ni a. A thar thlakna kan la nei silova, a thenah a chhia repair lo ngai ve reng nen,

chutiang karah chuan Lunglei pawh hi tuna kan dinhmunah chuan, khawpuiah chuan 70 Lpcd hi kan mamawh anga chhut a ni ta a ni.

Urban tak takah phei chuan 135 Lpcd kan mamawh anga chhut a ni a. Tuna Greater-Lunglei Water Supply Scheme-a kan khawl pahnih ina a pump chhuah theih zat chu, 36 Lpcd chiah a ni. Kan va phei a, kan lawm em emna chhan pakhat a awm a. Lunglei mipui sawn tui harsat zia leh kan dinhmun hriain an phunnawi lem lova, chuvang chuan a department ang zawng pawhin kan lawm hle a ni. Kan pe thei lo kha kan lawm ni lovin, kan dinhmun an hria a, tui indaih lo pawh phun nuai nuai lovin an lo awm a, kan lawm hle a ni.

Chutah chuan, theihtawp chhuah chhoh kan han tum a, North-east Special Infrastructure Development Scheme (NESIDS) hnuaiah proposal te kan han thehlut a. Chu chu State sawrkarin min ngaih pawimawh sak a, kan Chief Secretary pawh hian min ngaih pawimawh sak a, kan lawm hle a ni. February Ni 7 kha a site-a kan kal ni khan State Level Empowered Committee-te hemi chungchang min ngaihtuhsak turin an thu a, min ngaih pawimawh sak a, priority hmasa berah min dah sak nghe nghe a. Chutah chuan, Central-ah inter-Ministerial Meeting February, Ni 28 a neih turah approval min pe thei ngei turin hma min lak sak a, hei hi tun February, Ni 28-ah an thu dawn a, kan Chief Secretary pawhin ama mimal takin min ngaih pawimawh sak a, theihtawp min chhuahpui a ni. Heng avangte hian kan beiseina a sang a.

Hei hi kan neih theih chuan Lunglei tui-harsatna tam tak hi min phuhruk thei dawn niin kan hria. Tun dinhmunah chuan a capacity ang pawh kan pump ngam lo a ni. A pipe te a hlui tawh a, full-load in pe dawn ta ila, a pipe a puah a hlauhawm bawk si. Khang kha a nih avangin, kan dinhmun hi a derthawng em em a. Hei hi kan neih theih chuan Lunglei lam pawh kan hnianghnar deuh turah kan ngai a ni. Pu Speaker, ka lawm e.

HON. SPEAKER : Ti khan zawhbelhna zawttu te kha kan inchhang em aw? Member zahawm tak Pu Rohmingliana zawhna kha kan address em? Kan address loh chuan, Irrigation Minister kan sawm dawn em ni ang? Aw le, ilo sawm ang. Minister, Irrigation changtu zahawm tak Pu PC Vanlalruata ilo sawm ang.

PU PC. VANLALRUATA, HON. MINISTER : Pu Speaker, zawhna neitu member zahawm tak Pu R. Rohmingliana khan a sawi tak ang khan, eng emaw thilah a lo kal soal a, chu chu PM-KUSUM hi Irrigation Deptt. lam chan a ni a. A zawhbelhna kha tunah hian engkim peih fel a ni tawh a. M/S Thanga & Sons, Mission Veng te hnenah Letter of Award 7.02.2024 khan pek a ni. Chu chu, ni 15 chhungin agreement ziah tur a ni a, vawiin hi a last date a ni nghe nghe a, chu chu ka hriatdan a ni.

Tunah hian unit 200-ah bul tan phawt tum a ni, unit 1700 atang khan. I remtih nain Pu Speaker, memberte pawhin PM-KUSUM hi hrechiang ve deuh se kan duha chu - 30% hi State share a ni a, 20% hi farmer share a ni a, 50% hi Central atanga kan hmuh tur a

ni. Central pawh an thilphal hle a. Tuna unit 1700 bik atan hian ₹979.83 lakh State share pawh kan hmu tawh a. Central pawhin ‘rawn tih belh leh rawh u’ an ti a, mahse a vendor te lampang hian harsatna an nei a. Mizoram hi tlang ram anih avangin hmunhma in a zir lova. 2021-2022 khan vendor te pawh koh an lo ni tawh a, mahse an in withdraw leh a, chu chu tunah hian M/S Thanga & Sons te hi kan han award leh phawt a. Anniin an thawh theih dana zirin unit 200-ah kan tan phawt ang a, a bak pawh chhunzawm zel theih turin State-matching share pawh kan hmu tawh a, chu chu kan kalpui dan tur a ni a. Engpawhnise, member zahawm tak zawhna ang khan, fur ruahtui tlak hma hi chuan eng emaw chen hi chu kalpui tura hmalak mek a ni e.

HON. SPEAKER : A lawmawm e. Tunah *Starred Question No. 42* - Zawt turin East Tuipui Bialtu zahawm tak Pu Ramthanmawia ilo sawm ang.

Starred Question No. 42 - Sangha dil chungchang

PU RAMTHANMAWIA : Pu Speaker, ka lawm e. Minister zahawm tak Fisheries Department changtu chhan atana ka zawhna chu –

“Kum 2019-2023 chhungin Sangha dil tanpuina mi engzat hnenah nge pek a nih? A year-wise in min hrilh thei em?” tih a ni.

HON. SPEAKER : Chhang turin Pu Lalthansanga, Minister Fisherires Department changtu ilo sawm ang.

PU LALTHANSANGA, HON. MINISTER: Pu Speaker, ka lawm e. House Member zahawm tak Pu Ramthanmawia zawhna chhanna chu -

Kum 2019-2023 chhunga Sangha dil tanpuina pekchhuah zat chu hetiang hi a ni e –

<i>Year-wise</i>	<i>Pekchhuah zat</i>
2019-2020	188
2020-2021	1759
2021-2022	1449
2022-2023	506

HON. SPEAKER : *Zawhbelhna* zawt turin a zawhna-neitu ilo sawm hmasa ang. Pu Ramthanmawia.

PU RAMTHANMAWIA : Pu Speaker, ka lawm e.

Sangha dil tanpuina hi kan ngaihthlak tak ang khan, kum tin khatiang zat kha pekchhuah a ni thin a. Ka zawhbelhna *Pakhatna* – Mizoram-in sangha kan tharchhuah zat hi a pun phah em? Tun hnai kum 3 chhunga Mizoram-in sangha kan tharchhuah zat min hrilh thei em?

Pahnihna - Kan potential neihte en hian sangha ah hian intodelh thei kan niin a lang a. Sawrkar kal tawhte pawhin sanghaa kan intodelh theih nan nasa takin tan an la tih kan

hria a. Sangha dil siamna pawh kum tin tam tham tak pekchhuah thin a ni tih kha kan hria a. Amaherawhchu, duh angin kan la thar tam tawk lo fo a, kan la intodelh lo tih a lang a. Hetah hian, sanghaa kan intodelh theih nan kum thar lamah sawrkarin engtia hmalak nge a tum? Ruahmanna te a nei em?

Pathumna - Sangha chi chungchangah hian duh angin kan la intodelh lova. Rearing pond tanpuina pawh tam tak kum tin pekchhuah a ni chungin, sangha chi supply ah hian duhthusam kan la thleng lo hle a. An harsatna tawh fo chu, 'Sangha chi' tih a ni leh thin a ni. A hun taka sangha chi hmuh mai tur a awm lo thin te, sangha chi tha hmuh mai tur awm lo te hi an buaina a ni. Sangha chia kan intodelh theih nan leh sangha chi tha kan hmuh theih nan sawrkarin ruahmanna thar emaw, hmalak tum dan emaw te a nei em? Ka lawm e.

HON. SPEAKER : *Zawhbelhna* - Aizawl West-III Bialtu zahawm tak Pu VL Zaithanzama ilo sawm ang.

PU VL. ZAITHANZAMA: Pu Speaker, ka lawm e. Ka zawhbelhna chu hei hi a ni e – Mizoram-in sangha ei tur kan intodelh loh zia kan hria a. Mizoram pawn atangin sangha tam tak kan la lut thin a, heng kan lak luh te hi a thianghlim tawk em? Department hian kan endik thin em? Ka lawm e.

HON. SPEAKER : *Zawhbelhna* - Champhai South Bialtu zahawm tak Lt. Col. Clement Lalhmingthanga.

LT. COL. CLEMENT LALHMINGTHANGA: Pu Speaker, ka lawm e.

Zawhbelhna ka zawh hmain thuhma tlem ka han nei ang a. Sangha khawina - sangha dil neih hi khilam Champhai bial lamah khian chhungkaw tam tak hian eizawnnan atan hmang a. Sangha chi leina atan hian a nuai eng emaw tel kum tin hman thin a ni a. Sangha chi hi phai lam atanga lak luh te a ni thin a. Chuvangin, Champhai ah khian *locally*-a sangha chi tharchhuahna hatchery siam tumna te a awm em?

HON. SPEAKER : A theih ang anga chhang turin, a changtu Minister Pu Lalthansanga ilo sawm ang.

PU LALTHANSANGA, HON. MINISTER: Pu Speaker, a zawhna neitu zawhbelhna kha - Sangha hi a tharchhuah hi bio-mass basein India ramah hian chhut a ni a - *harvest* leh *unharvest* tein. Sangha man chhuah zawng zawng leh dila la awm zawng zawng atangin sangha production hi chhut thin a ni a.

Chutiang chuan, Mizoram-ah sangha hi thar ve hle tawh tura kan inngaih lain, kan thar tam tawk lohna hi chu sangha note duh anga tha hi kan hmu lo thin a. Tin, accredited

supplier-te pawh hian tun hnaiah kan han survey a, sangha chi supply hun tha ber hi chu April - May a nih laiin, sangha chi supply tur hian tender hi call thut ang ila, min pe thei an awm dawn lo ni hian a lang a ni. Chuvang chuan, tunah hian a tak taka tih pawh hi kan tum a, heng hi kan ennawn dawn a ni.

Tin, sangha chi supply-ah hian hleih-neihna te pawh hi a lo tam viau ni awmin a lang a, chu chuan sangha dil nei tha leh sangha-a kan intodelhna tura hmalakna production tamna tur hi a lo pawt hniam hle tih pawh a lang a. Chuvang chuan, tunah hian nasa takin tan kan la a. Kum 2023 – 2024 hian district level committee pawh reconstitute a ni ang a, chu chuan political selection tel lovin, a ti tak tak tur leh a neite hnenah sangha chi hi pek a ni tawh dawn a ni. Chutianga kan kal chuan, kan ramah hian sangha production hi a sang turah kan ngai a. Tin, chhungkaw tam takin eizawna an nei thei turah kan ngai a ni.

Tin, Member zahawm tak Pu VL Zaithanzama zawhnaah kha - Sangha phai atanga kan lakluhte a thianglim tawk leh tawk loh kha keini Fishery Department chan a ni chiah lova, hei hi chu Food & Drug Department chan a ni a, kan zuk sawi thei chiah lova. Amaherawhchu, Fisheries Department lamin kan han tih ve hi chu - sangha phai atanga lo lutah hian formalin hman te a awm a, ‘mihring tana tha lo thil te a awm e’ tih a awm khan, testing kit te hmangin hmun hrang hrangah test a ni a, mihring tana tha lo tur em em chu awmin kan hre chiah lova. Amaherawhchu, anmahni technical expert an nih loh avangin, ‘kha kha chu a dik chiah e’ tih a sawi theih lova. Chumi ruala kan hriat tur chu, sangha reng reng hi vura dah thata lo kal tur chu a ni a, khatiang thil te a lo tel a nih chuan a pawh hle a, chumi tireh tur chuan department tinte kan tan ho a ngai hlein ka hria.

Tin, Champhai South MLA zahawm tak Lt. Col. Lalhmingthanga zawhna kha - Hemi sangha-note pe tur hian an pekna atangin a kalna te a hla a, an thi thin a. Sangha-note fish-farmers ten an dawn hi ‘a thi nasa’ an tih kha thil awm thei a ni a, a dik pawhin kan hria a. Chuvang chuan, sangha note hi a pian tirh atanga fingerling thleng (hmun danga transfer theihna period) chutianga enkawlna fish pond ang chi te pawh hi thlan chhoh mawlh mawlh leh, chutianga lo dah lenna turte kalpui a ni a. Tin, a Brood Bank hmun hi tunah hian Thenzawl-ah a hmunpui deuh tur buatsaih mek a ni a, tun financial year chhung hian commission hman tura rin a ni. Chumiah chuan sangha chi thlah tur a-pui lian leh a-pa lian te neih a nih hunah chuan tuna kan harsatna hi nasa takin kan sukian kan beisei a ni.

HON. SPEAKER : A lawmawm e. *Starred Question No. 43* - zawt turin Mamit Bialtu, Member zahawm tak Pu H. Lalzirliana ilo sawm ang.

Starred Question No. 43 - Mamit Govt. College-a Science Subject chungchang

PU H. LALZIRLIANA : Pu Speaker, Higher & Technical Education Department changtu Minister zahawm tak chhana tan, ka zawhna *Starred Question* No. 43 -

- a) Mamit Govt. College ah hian district pumpuiin an chhawr tangkai theih tur Science subject dah tumna a awm em?
- b) A la awm loh chuan, sawrkar hian Tlawng-thlang fate zirna kawnga hma an lo sawn ve theih nan hma min laksak thuai thei ang em?

HON. SPEAKER : Chhang turin Higher & Technical Education Department changtu Minister Dr. Vanlalhlana ilo sawm ang.

DR. VANLALTHLANA, HON. MINISTER: He House zahawm tak member H. Lalzirliana zawhna chhanna chu hei hi a ni e –

- a) NEP-2020 hman tan a nih tawh avangin, sawrkarin engtin nge hma a lak chhoh dawn tih sawi theih a ni rih lo.
- b) Kan sum dinhmun en chung a hma lak tum a ni ang.

HON. SPEAKER : A lawmawm e. *Zawhbelhna* - Champhai North Bialtu, Member zahawm tak Pu H. Ginzalala.

PU H. GINZALALA : Awle, Pu Speaker, ka lawm e.

Champhai khawpui hian hma a sawn zel a, population ah te hma kan sawn chho zel a, Mizoram-ah chuan khawpui lian *pathumna* kan ni mek a ni. Chuvangin, zirna sang zawk te pawh kan mamawh em em tawh a; post-graduate zirna te, PH. D zirna thlengin awm thei se kan duh khawp mai a, kan *dreams* a ni. Chutiang chuan sawrkar hian hma min lakpui thei ang em?

HON. SPEAKER : *Zawhbelhna* - Pi Prova Chakma, West Tuichawng Bialtu zahawm tak ilo sawm ang.

PI PROVA CHAKMA : Pu Speaker, ka lawm e. Kei hi Tuichawng Bialtu ni lovin, 35-West Tuipui Bialtu zawk ka ni e. (**Speaker:** Sorry; i ngaihdamna ka dil e).

Higher & Technical Education Department Minister zahawm tak chhana tan –Tlabung Higher Secondary School Chemistry Lecturer dah letna tur order cancel a nihna chhan min hrilh thei em? Dah let tum a nih chuan, engtikah nge?

HON. SPEAKER : *Zawhbelhna* - Pu H. Lalzirliana ilo sawm ang.

PU H. LALZIRLIANA : Pu Speaker, ka zawhbelhna chu hei hi a ni e –

NIT Mizoram Campus Lengpui-a din tur kha a hmun-hma te kan Minister zahawm tak khan hmanni deuh khan a tlawh niin ka hria a. Hei hi tuna kan dinhmun chiah hi min hrilh thei ang em? Hemi construction hi chhonzawm thuai theih a ni ang em?

Ka lawm e.

HON. SPEAKER : A karkik khawp mai a, a changtu Minister Dr. Vanlalhlana, a theih ang anga chhang turin ilo sawm ang.

DR. VANLALHLANA, HON. MINISTER: Pu Speaker, ka lawm e.

Er. Ginzalala Zawhbelhna *pakhatna* chhanna chu – post-graduate din hi a hautak khawp mai a. Tin, mamawh dan azira ngaihtuaha, buaipui a ngai bawk a. post-graduate din tur hian file a kal a, ‘kan sawrkar chhung hian tihdan ngaihtuah ila’ tih kha ka chhan theihna a ni mai a. DP&AR ah te file kan han thehlut a, dilna te kan han theh lut a, chu erawh chu engtiangin nge a kal zel dawn a hriat lova. Post siam belhna tur hi chu kan dil kan dil a, a thlen chin erawh chu kan hre theuh ang a. Pawisa kan neih loh avanga reject leh te, Polytechnic Champhai lampang pawh kha file kal tawh rawn tih let leh te, Cabinet meeting-ina an kaltlang tir tak loh te a awm a. Chuvang chuan, ‘kan lo hria ang e’ tih bakin ka chhang thei lo a ni.

Pahnihna - Pi Prova Chakma, he House member-ina min han zawhna a chhanna chu - Tlabung Higher Secondary School kha chu School Education Department chan a ni a. Nakinah School Education Department kan sawi huna a windup hunah ka rawn hrilh ang che. Tunah pawh ka sawi thei tho a, amaherawhchu, a department chan deuhin ni sela thain ka hria a.

Tin, Zawhna-neitu, he House zahawm tak Member Er. Lalzirliana zawhna chhanna chu - NIT Mizoram Campus Lengpui kha kan zuk tlawh a, chutah chuan hma lak a ni a, kan zuk en a. Vaibelchhe tam tak sen a nih tawhnaah khan hna pawh a lo tlem ngang mai a. Forest Department hian vaibelchhe 20 chuang hi an rawn dil a, chutah chuan buaithlak deuh chu - hei hi min ngaidam mai turin Forest Department ah kan han dil a, kan han ngen a, meeting te kan han nei ho a. Sawrkar hmasaa department dang Minister-in pek a lo tiam tawh avangin leh, assurance a lo siam tawh avangin ngaihdam mai kha a lo theih loh a. Chuvang chuan, kan pek dan tur ngaihtuah a ngai a, kan rilru a hah khawp mai. NIT neih ngei kan duh a, tunah hian lak chhuah mai te pawh an duh rum rum tawh a. Chutiang chuan khulam nen pawh kan ti-tinaah thil a awm tawh a. Kan tih theih awmchhun chu, a penal interest kan pek tur hi ‘min tihhniam sak rawh u’ tih kha a ni ta mai a, tunah hian lehkha buatsaih mek a ni a. Khu lam Central lampangah dilna thehluh a ni dawn e. Ka lawm e.

HON. SPEAKER : Tikhan kan Minister-in a theih ang angin a han chhang a. A subject hi a zau khawp mai a, nimin lamah khan zawhna pahnih chiah kan

la hman a. Chuvangin, eng emaw kan bial lo deuha kha chu a hranpain nakinah Minister-ah; kan Minister hi ngilnei deuh mai a ni a, lo dawngsawng turah beisei ila.

Tin, “doctor” or “engineer” tia inkoh leh inkoh loh chungchang laia kha - Engineer member pathum lai kan nei a, helam atanga kalpui kan tum dana chu, Election Commission of India-a kan official hming ang khan kalpui kan tum a. khata ‘doctor’ tih emaw, ‘engineer’ tih emaw kan dah a nih chuan, ‘doctor’ or ‘engineer’ tiin kan ko ang a. Khata ‘doctor’ or ‘engineer’ a awm lo a nih chuan, ‘doctor’ or ‘engineer’ tiin kan inko kher lovang tih kha ka han sawichiang ni sela.

Tunah *Starred Question No. 44* zawt turin Saiha bialtu zahawm tak Dr. K. Beichhua ilo sawm ang.

Starred Question No. 44 - JJM chungchang.

DR. K. BEICHHUA : Pu Speaker, ‘Siaha’ an ti tawha lawm, Pu Speaker. (Speaker: Official-ah hian ‘Saiha’ tia lam an awm tlat mai a, chutiang chuan ka han lam a ni e. Election Commission lam atanga lo kal a ni a.) Aw le, PHE Minister zahawm tak hnena ka zawhna chu –

- a) JJM hnuaiah Mizoram pumah khaw engzatah nge tui connection pek a nih?
- b) Siaha District-ah eng khuate nge la cover loh?

Ka lawm e.

HON. SPEAKER : Chhang turin a changtu Minister zahawm tak Prof. Lalnilawma ilo sawm ang.

PROF. LALNILAWMA, HON. MINISTER: Pu Speaker, Siaha bialtu zahawm tak zawhna chhanna chu hetiang hi a ni –

- a) JJM hnuaiah Mizoram pumah khua 728 ah tui connection pek a ni tawh.
- b) Siaha District-ah hian khua cover loh a awm tawh lo.

HON. SPEAKER : *Zawhbelhna - Zawhna* neitu Dr. K. Beichhua ilo sawm ang.

DR. K. BEICHHUA : Pu Speaker, department lam hmuh dan leh kei, a bialtu hmuh dan a inang lo deuh nge maw ni le?

JJM hnuaiah hian Solar tui pump-na la zawh loh engzat nge awm? A then hi a contractor ten an chhunzawm loh te pawh tunah hian a la awm a, hei hi sawrkar hian a hria em? Engtia hma lak nge a tum?

Tin, pahnihnaah chuan, Power supply chak tawh loh vang hian a bik takin ka Bial leh Palak Bial-ah te khian tui-pump kan neihte khi pump hleih theih a ni lova. Tun lai tak phei chu tui kan harsat vanglai a ni a, khi khi diesel hmangin min pump sak thei ang em?

HON. SPEAKER : A lawmawm e. *Zawhbelhna* - Lunglei South Bialtu zahawm tak Pu Lalramliana Papua ilo sawm ang.

PU LALRAMLIANA PAPUA: Pu Speaker, ka lawm e.

Ka zawhbelhna chu - JJM hnuaiheng solar plate leh thil tul ang ang installation ti tur hian, khami panna tur approach road kha laih a ni thin a. Khami approach road kha a chhiat leh thui thin avangin, installation la tih loh thenkhatte hi khawtlangin hnatlang tea an thiar a ngai thin a ni. Ka Bial, Lunglei South chhunga Tawipui South ah te pawh khawtlangin an buaipui a ngai thin a. Hei hi 'khawtlang ho mawha dah ngawt nge a niha, department kuta awm?'

Tin, solar pump-a pump zawh tawh loh, (nichina kan ngaihthlak ang khan) a zo lova an rin, plate tam tawh lo te kha thiar nawn thiar nawn ngai lo tur leh khawtlang ina buaipui fo ngai lo tura tum-khatah zo thei ngei turin a plate te kha dah belh theih ni se tiin ngenna ka han siam bawh a.

Tin, a dawh lehah chuan, Thangpui (Lunglei South chhunga mi tho) JJM Solar pump khu zawh tawh ni siin, tun thleng khuan vawi khat pawh a la pump thleng thei lova, a khua khu tui an harsat avangin an buai em em a. Thal lai chuan school naupang pawhin school te chawlin tui chawin nilengin an buai ringawt mai a ni. A nghawng a na em em mai a, khung solar pump zawh tawha ngaih si, pump thleng thei si lo khu chhawr theih tura hma laa, umzui theih a ni ang em? Ka lawm e.

HON. SPEAKER : *Zawhbelhna* zawt turin Lawngtlai West Bialtu zahawm tak Pu C. Ngunlianchunga ilo sawm ang.

PU C. NGUNLIANCHUNGA: Pu Speaker, PHE Minister chhan atana ka zawh belhna –

i) Sawrkar hmasaah khan JJM hnuai household tui connection pekna kha rubber pipe hmun thenkhatah an hmang a, 'a tha lo hle a ni' tih House-ah hian kan sawi thin a, 'a tha' an ti a; a tha lo a ni. Kha kha tun sawrkar thar - *kalphung-thar sawrkar* hian thlak tumna a nei em? GI pipe-a thlak sak theih anni ang em?

ii) Solar a pump thlak tur khuate engtikah nge solar pumping kha tih zawh sak theih annih ang?

iii) Lunglei South Bialtu zahawm takin a sawi ang khan, ka bialah hian zo tawha ngaih, mahse, vawikhatmah pump chhuah si loh, tun thal lo chhuak tur atana nghakhlel

em em mai ‘Ngengpuitlang khua - Hmunlai leh khaw engemaw zatah fit chu an fit ve tawh thuak a, amaherawhchu zo tawh nia an hriat mahse, pump chhuah si loha kha a tam mai a, khatiang kha engtianga hma lak nge tun sawrkar hian a tum? Tun thal chhung hian pump sak theih ngei an ni ang em? Ka lawm e.

HON. SPEAKER : *Zawhbelhna* kha pathum a awm tawh a. Chuvangin, a chhang turin a changtu PHE Minister Prof. Lalnilawma ilo sawm ang. A inkarkik khawp mai a.

PROF. LALNILAWMA, HON. MINISTER: Pu Speaker, ka lawm e.

Zawhna neitu zawhbelhna - ‘Solar la zawh loh engtikah nge zawh tum a nih?’ tih kha, JJM hrim hrim hi tun March thlaa tawp tur a ni a, kan target ah chuan. Khang solar fit la zawh loh pawh kha March thla chhunga theihtawp chhuaha zawh tum a ni.

“Diesel a hman theih a ni em?” tih zawhna kha, ka chhan thiam danah chuan - sum chu awm se, a theih; kan sum dinhmun ngaihtuah chuan diesel-a pump ngam chi a ni lo, Pu Speaker. Ni khata diesel kan senso hi a tam thei khawp a, chu chu inhriat tlanpui ta ila. amaherawhchu, emergency tak takah chuan diesel-a run tul chang te pawh a awm a ni tih kha ka chhanna ni se.

Tichuan a zawhbelhna *Pahnihna* - Solar panel leh a khawl installation tihna tura kawng tha lo kha bialtu MLA lam atanga report kan dawn a ni a, a lawmawm a. Hetianga harsatna kan inhrih tawn te pawh hi keini chuan lawmawmah kan ngai a, action kan lak zung zung theihna turah kan ngai a ni. “Hei hi department mawh nge khawtlang mawh tur?” tih lai hi, a thawktu turte ruat a ni a, sawrkar hmasa khan an ruat tawh a. A thawktu turte mawha dah tur ni awm tak kha, khawtlang pawhin thahnemngaiin an lo hnatlanpui a, a lawmawm a. Heng pawh hi a bialtute nen la en ho ila a tha ang e.

Thangpui chungchang kha, ka sawi tawh ang khan, “March, 2024 a zawh vek tura tih a nih avangin theihtawp kan chhuah mek e” tih kha ka chhanna ni se.

Tichuan, Lawngtlai West Bialtu zahawm takin a zawhna *Pakhatna* - ‘rubber pipe’ tih lai hi, PVC a ni zawk em aw ka ti a. A nih dan tur dik tak quality – PVC te kan hman chuan GI tlukpui emaw, a aia chak tur chu a ni tho a ni. Amaherawhchu, eng emaw tha lo a lo awm a nih chuan, la en ho te pawh a ngai ang a; Bialtuin House-ah a rawn sawichhuak a, a lawmawmah kan ngai a. Amaherawhchu, GI pipe a nih chuan, GI pipe pawh kha a quality chak tawk turah kan ngai a ni. Amaherawhchu, khang tha lo kha “thlakna tur pawisa a awm em; thlak tumna a awm em” tih zawhna kha, a scheme-in a ken tel tawh, sum kal tawh a nih si chuan, Pu Speaker, tun dinhmunah chuan deptt. in sum a nei lo phawt mai a, tihngaihna a awm rih lova. Amaherawhchu, a tha lo te, hmantlak thlawt lo a nih chuan la en hova, hma lak dan tur te pawh la ngaihtuah ila; a

funding source dangte pawh la zawn ngai turah te pawh ngai ta ila. Amaherawhchu, tun dinhmunah chuan a siam thatna tur kha sum kan nei lo a ni.

Tin, a zawhbelhna *Pahnihna* - Lawngtlai West Bialtu zahawmtakin a zawhnaah – ‘solar te hi engtikah nge?’ tih tho kha; March thla kha kan target tho a ni.

(Pu C. Ngunlianchunga: March, 2024 March chu a ni tep; zo ta lo se, kan bialah khian zawh loh hi a tam khawp mai a, ‘engtin nge sawrkar hian hma a lak ang le?’ tih kha, khawngaihlin) Kan han inumzui zel chu a ni a, thawktute nen pawh. ‘Khati lai kha; khati lai kha...’ kan han ti a, tukinah pawh kan rawn luh hma lawk pawhin contractor pakhat ka phone nghe nghe a, kan phone tur nge tih pawh ka hre lova. Rilru a hmanhmawh tawh si a, ‘kha kha lo take-up vat teh’ ka ti a, ‘kar leh velah kan zo ang’ a ti. Tikhan kan bawhzui ve zel a. A hun han nghak phawt ila, kan ti thei lo ta a nih leh, kan lo bawhzui zel ang a, Pu Speaker. Central sorkar pawh hian April thla thleng pawh min rawn extend maithei baw a, khatiang te kha han ngaichang ila, ‘kan contractor-te nen kan innawr reng’ tih kha min lo hriatsak se a tha ang e.

A zawhbelhna tawp bera – ‘Zo tawha inngai, la zawh si loh...’ tih kha, kan report-ah chuan khaw 728 ah connection a lut tawh a ni. Tichuan, household-a connection lut tur chiah kha la zawh loh deuh kan nei a, chu pawh chu kan bawhzui mek a ni. Amawherawhchu, a tam zawk chu NHIDCL kawng laih avanga connection direct-a va lut tur kan la tih theih loh te a awm a. Tichuan, kan report-a ‘kan zo tawh’ kan tih kha, tui connection nei sa, amaherawhchu, a tuihna tlem avanga khawp kham lote kha an la awm tho a, chu chu deptt. pawhin a hria a, chutah chuan theihtawp kan chhuah a. A scheme-in a tum ber chu household pakhat tan 55 LPCD pek tur’ tihna a ni ta a ni. A lo awmsa pawh kha, tuna solar te nen augmentation kan ti ang a, 55 LPCD chang theuh tura hma lak a ni a. Solar te kan zawh chuan, chungte chu kan dawng thei turah kan ngai a ni. Ka lawm e, Pu Speaker.

HON. SPEAKER : Member-te in sawi kha a awm viau a ni. Hei, a scheme awm tawh lo pawh ni mahse, pipe chhiat avanga tui dawng theilote an nih na na na kha chuan engtin emaw deptt. khan a scheme-in a tum hlawhtling lo sa kha chu tihdan zawn a va tha awm em. Tin, contractor-te a huna zo lo leh a scheme-ina liampui mai tur chi kha ‘eng harsatna nge an neih’ tih te zirchian ni ta sela, chutiang chuan deptt-in tan han la leh deuh se a tha ang e.

Aw le, *Starred Question No.* 45-naah kan kal ang a. Vawiin chu PHE Minister a rim deuh dawn a nih hmel e. Zawhna zawt turin Aizawl West-III Bialtu, Member zahawmtak Pu VL Zaithanzama i lo sawm ang.

Starred Question No. 45 - Aizawla tui mamawh zat chungchang.

PU VL. ZAITHANZAMA: Pu Speaker, ka lawm e. PHE Deptt. changtu Minister chhan atana ka zawhnate chu -

- a) “Aizawl khawpuia cheng ten nitin hnianghnara tui hmu turin tui engzat nge an mamawh?” tih leh;
- b) “Tun dinhmunah nitin tui litre engzat nge pump a nih?” tih te kha a ni e.

HON. SPEAKER : Chhang turin PHE changtu Minister Prof. Lalnilawma i lo sawm ang.

PROF. LALNILAWMA, HON. MINISTER: Pu Speaker, ka lawm e. Aizawl West bialtu Pu VL Zaithanzama zawhna chhanna chu a hnuai a mi ang hi a ni -

- a) Tunah hian Aizawl khawpuiah mihring 3,78,500 vel awm ang a ni a, tui hnianghnar taka dawng tur chuan Central Public Health & Environmental Engineering Organisation (CPHEEO) guidelines @135 litre per capita/per day (LPCD) angin tui 66.42 MLPD mamawh a ni.
- b) Tunah hian tui 28.77 MLPD nitin pump chhuah thin a ni.

HON. SPEAKER : A lawmawm e. *Zawhbelhna* - zawt turin Thorang Bialtu zahawm tak Pu R. Rohmingliana.

PU R. ROHMINGLIANA: Pu Speaker, ka zawhbelhna chu –

Ka bial Thorang chhunga khaw pakhat *Terabonia* a awm a, hei hi Bangladesh border-fencing tih lai khan fencing pawn lamah a awm ta daih mai a. Hemi khuaah hian vote a la awm bawk si a, campaign-in kan luh a ngai tho a, BSF ten min lo dang a. Tichuan, ration buhfai kan la pe a, school ni se, repair theih loh an ti bawk si a; tui an mamawh ve a, tui a pek theih anni lova. PHE Minister zahawm tak khan he *Terabonia* khuaah hian mihring an cheng ve tho a, khawngaihtakin gravitation pawhin tui min pek sak ve hram thei ang em?

HON. SPEAKER : *Zawhbelhna* - Pu Muanpuia Punte, Hrangturzo Bialtu ilo sawm ang.

PU LALMUANPUIA PUNTE: Pu Speaker, ka lawm e. Ka bial chhungah khian khua JJM in a cover tam tak a awm a, Lungchhuan khi tih zawh vek tawh anga ngaih a ni a. Tui litre 40,000 nitin pump tura tihah litre 20,000 chiah pump theih a ni a, hei hi full capacity-a function tir theih a ni ang em?

Pahnihnaah chuan, Multi-Village Water Supply Scheme, JJM hnuai aia tho hian East Lungdar, Leng leh Sailulak te pek kawp tur a ni a, connection pipe pawh fit vek tawh niin, a khawl khi vuah a la ni lova. Hei hi a rang thei angin (March thlaah scheme a liam

mai dawn si a) min peih sak hman ang em? April thlaah rampum Pavalai-Khawmpui kan dawng dawn leh nghal a, chuta tan chuan kan hmanhmawh viau a ni.

Tin, Khawlailung leh Piler khi hmalakna a muang lutuk a, engtikah nge an zawh ang' tih pawh sawi theih a ni lo a ni. Khang kha scheme zawh hma ngeia tih hman theih ni sela kan duh a, chu chu kan zawt ni sela. Tin, Bungtlang tui lakna tuihna tlem lutuk khian khawtlang mamawh a chawm zo dawn lova; a lakbelhna tur hi a piah lawk Mat emaw, Tuichang lamah emaw tui pump hi min sawn sak thei ang em?

HON. SPEAKER : *Zawhbelhna* - Zawhna neitu Pu VL Zaithanzama ilo sawm ang.

PU VL. ZAITHANZAMA: Pu Speaker, PHE Minister chhana tana ka zawhbelhna chu -

- i) Tawitlang atanga Aizawl tui lak thlakna tur hna kal mek kha chhunzawm a la ni em? Chhunzawm ni se, engtika zawh tum nge ni dawn?
- ii) Greater Aizawl Water Supply Scheme Phase-III SIPMIU-in an thawh mek 'September, 2020 a zawh tur' tih kha, tun thlengin tui pump chhuah a la ni lova, engtikah nge tui pump theih anih dawn?

HON. SPEAKER : A theih ang anga chhang turin a changtu Minister Prof. Lalnilawma ilo sawm ang.

PROF. LALNILAWMA, HON. MINISTER: Pu Speaker, ka lawm e. Thorang Bialtu zahawm tak zawhna Terebonia khua bika kha 'ramri hung pawn' a ti a. Hemi JJM hnuiah hian kan hmalakna zawng zawng hi ministry-in habitation list-a a dah hovah a ni a, hei hi ministry-ina *habitation list* a tih zingah hian a tel lo a ni ang chu maw, a rawn zawhna atang khan. La enho te pawh ni se a tha ang a, Pu Speaker.

Zawhbelhna dang - East Lungdar leh Lungchhuan etc. chungchanga bialtu zahawm tak Pu Lalmuanpuia Punte rawn zawhna kha - Hei, a bial a rawn hrechiang viau a, a bialtu ngeiina hetia an rawn thlen hian keini pawhin kan lo chhinchhiah zel a, hma kan la chho zel turah te pawh ngai ta ila. 'Lungchhuan tan full-capacity a theih em?' tih kha - Hei hi a dinhmun kan hriatchian atan thain ka hria a. Tui connection a awm kan tih rual khan, nichina ka sawi ang bawkh 55 LPCD nei tur chuan solar nen augmentation atan hma kan la mek a, hengte hi han zo ila chuan a *full* chu a ni thei mai ang em tih kha rilruah a rawn lang a; chung kan zawh hun te pawh han nghak ta ila, khatah khan a rawn awm mai turah te pawh ngai ta ila.

East Lungdar, Leng, Sailulak, Khawlailung 'tui lakna tlem' tih kha chu, ministry hmasaa hma an lo lak tawhna te a ni a, 'engatinge khang lai khan a tui source awm tha deuh te an lo thlan loh le' tih kha rilruah zawhna a lo awm nghal a, Pu Speaker. Engpawh

nise, hmana hmalak tawhna a ni a, scheme kal lai mek a ni a; a scheme zawh hma kha chuan, ‘kan ti ang’ tih kha a har a. Amaherawhchu, a khawtlangin an la khawp-kham lo a nih chuan, kan la en ho zel ang chu maw le. Nakinah a scheme hun te han tawp se, chutah khawtlang khawp kham kan la pump tling thei lo fo anih chuan, la en ho turah pawh ngai ta ila a tha ang e.

Pu Speaker, zawhbelhna *Pathumna*, Aizawl West-III Bialtu zahawm takin a zawhna – “Tawitlang atanga gravity tui kan lak hi thawh chhunzawm a ni em? Engtikah nge zawh beisei anih?” tih kha, thawh chhunzawm a ni a, kan target-ah chuan tun March, 2024 hi a ni a, theihtawp kan chhuah mek e.

A zawhna *Pahnihna* kha – “Greater Aizawl Water Supply Scheme Phase-III September, 2020-a zawh tur ni si, vawiin thlenga la zawh loh” tih hi Ministry hmasa te pawh khan an lo thawk muang deuh te pawh a ni maithei a; tunah 2024 kan kai chho tawh a. Engpawhnise, kan bawhzui mek a, a changtu Minister khan 26th September, 2023 khan a lo hawng ti ila, a full chuan hawn a la ni lova. Inthlan dawn anih avang khan commission te pawh kan hmanhmawh a ni ang e. Pu Speaker, la function tha em em nilo hawn kha chu, ‘an lo hmanhmawh mah mah a ni ang’ ka ti deuh a.

Tichuan, tun dinhmun han report ta ila. Zawhna a awm avangin khata kan Minister hmasain a hawn khan diesel engine-a *trial-run* a ni a, Tlawng atangin Laipuitlang thleng kan pump chho a, khata pump kha tluang takin a kal a ni; a pipe te leh engkim kha ‘a function tha’ tih khatah khan a lang a. Amaherawhchu, kan inngahna ber chu, electric power, *electric engine* kha a ni a, diesel engine in pump dawn ta ila, tuna kan khawl khu nikhatah litre 1,000 vel ngai tur a ni a. Khatiang anih chuan, kan sum leh pai dinhmunin a tlin lova. Chuvang chuan, power kha kan inngahna ber a ni a. Tun dinhmunah chuan Pu Speaker, power kan han pawhluha, a hmuna tihnun theih maia a awm khan, chu mi charge (tihnun) nan chuan load security hi Deptt. PHE lampang atanga a concerned Deptt. Power lama sum deposit tur a awm a, chutah chuan UD&PA Minister chungah pawh lawmthu kan sawi ni se. UD&PA hnuai ‘SIPMIU Scheme-a hmalak a ni’ tih kha kan sawi theihnghilh a. A tir khan UD&PA changtu Minister zahawm tak Pu K. Sapdanga hi a tulna, mipui-mamawhnaah hian a rawn bur chat chat a ni. Chuvang chuan, a chungah lawmthu kan sawi ni se.

Load security atan hian hisap danah chuan thla thum chhunga kan expenditure kha hisap lawk a ni a, chumi atan chuan 5.59 crore hi P&E Deptt. ah deposit fel a ni tawh a, February Ni 9, 2024 khan. An rawn tihnuna, a *run* theih tawh tihah khan SIPMIU lamin hma an rawn la nghal ang a. An han test ang a, electric an rawn tihnun tawh hnuah ni 30 chhung SIPMIU-in an han endik ang a; a khawl te a fel a nih chuan, ni 30 hmata pawhin tui supply hi awm thei tura ngaih a ni. Chutiang chu kan dinhmun a ni a, Pu Speaker. Hei pawh hi a tui supply tak tak ‘*full-completion*’ kan ti a; *full-completion*

hunah chuan kan la hawng nawn maithei a; chumi tur chuan March thla zawh hma hi chuan ti thei turah kan inngai a ni. Ka lawm e, Pu Speaker.

HON. SPEAKER : *Zawhna & Chhanna* hun atan minute khat a la awm a, zawhna dang kan la leh dawn nge, kan duhtawk rih dawn; engnge House ngaihdan le? (*House-in lak leh a remti a...*) La leh ang aw.

A nih chuan, *Starred Question No. 46* - Mamit Bialtu, member zahawmtak Pu H. Lalzirliana zawt turin i lo sawm ang.

Starred Question No. 46 - *Policy, Rules, etc. siam chungchang.*

PU H. LALZIRLIANA : Pu Speaker, ka lawm e. Zawhna hi a thuin an rawn sem leh dawn tho a, ka zawt lo law law mai dawn em maw ni chu ka ti a; zawh-belhna tur nen hian ka han sawi law law mai zawk dawn em maw ni le ka ti hial zawk a. Tourism Minister zahawmtak min chhan atana ka zawhna chu hei hi a ni –

- a) Sawrkar kal ta (December, 2018 – December, 2023) chhung khan Tourism Department hnuai hmasawna tur - policy, act, rules, norms engte nge siam thar a nih?
- b) chungte chu hman tangkai a ni em?

HON. SPEAKER : A chhang turin Tourism changtu Minister zahawm tak Pi Lalrinpui i lo sawm ang.

PI LALRINPUII, HON. MINISTER: Pu Speaker, ka lawm e. Hei, Tourism Minister hmasa kha minister active tak niin a lang a. Tin, official hote pawh an active viau ka ring a. Thil thar tam tak an lo tichhuak a, an sulhnu han chhui hi a nuam hlein ka hria a. Chu chu lawmthu ka han sawi hmasa a. Tichuan he House zahawm taka ka member-pui Pu H. Lalzirliana zawhna kha heti hian ka han chhang ang a –

- a) A hnuai mite hi siam thar a ni a:
 - i) The Mizoram Responsible Tourism Policy, 2020.
 - ii) The Mizoram Registration of Tourist Trade Act, 2020.

Tin, *Rules* siam thar a ni bawk a. chungte chu -

- i) The Mizoram Registration of Tourist Trade Rules;
- ii) The Mizoram Aero-sports Rules, 2020;
- iii) The Mizoram River Rafting Rules, 2020;

Guidelines hrang hrang an lo siam bawk a;

- i) Guidelines for Dormitories/Hostel in Mizoram;
- ii) Guidelines for Homestays in Mizoram;
- iii) Guidelines for Tour Operators in Mizoram;
- iv) Guidelines for Ticketing Sales Agent/Travel Agent in Mizoram;

- v) Guidelines for Tour Guides in Mizoram;
 - vi) Guidelines for Caravan Tourism in Mizoram;
 - vii) Guidelines for Recognition of Tourism Service Providers Association in Mizoram;
 - viii) Guidelines for Organizing Festivals other than Government;
 - ix) Guidelines for Registration of Standalone Catering Units in Mizoram tih te a ni a.
- b) Tangkai tak a hman a ni e. Ka lawm e, Pu Speaker.

PRIVATE MEMBERS BUSINESS:

HON. SPEAKER : Member zahawmtak Pu H. Lalziriana zawhna chu a changtu Minister, Pi Lalrinpuii'n a chhang ta a, *Zawhna & Chhanna* hun a tawp a.

Kan dan, Article 27 (1) angin 'Private Members Business' kan tih, lak a ni a. Vawiin February Ni 23, 2024 ami tur hi February Ni 19, 2024, (Thawhtanni) dar 11:30 AM khan Joint Secretary office ah ballot niin, Bulletin Part-II, No. 26, 22nd February, 2024 ah kan inhriattir tawh kha Memberte'n kan lo hmu tawh ang a.

Tichuan Resolution kan la ang a, chu chu - "*Mizoram Subordinate Service Selection Board (MSSSB), Mizo thalai hna zawng mekte tana rintlak leh tangkai tak thiah tak hi Sawrkarin ennawn rawh se*", tih a ni a. Resolution neitu, Dampa Bialtu, Member zahawmtak Pu Lalrintluanga Sailo move turin i lo sawm ang u.

PU LALRINTLUANGA SAILO: Pu Speaker, ka lawm e.

He House zahawm tak leh i remtihain, ka Private Members Resolution - "*Mizoram Subordinate Service Selection Board (MSSSB), Mizo thalai hna zawng mekte tan a rintlak leh tangkai tak thiah tak hi Sawrkarin ennawn rawh se*", tih hi he House zahawmtak ah hian vawiin niah hian ka rawn pulut a. Chungah chuan han sawi zau deuh hlek te pawh (Pu Speaker, i remtihain) thain ka hria a. Ka han sawi dawn a ni.

Awle, kan hmuh leh kan hriat angin, he sawrkar thar - ZPM Sawrkar hian he MSSSB chungchang hi 'information dik lo deuh a dawng em maw ni chu aw' tih turin Sawrkar hmasaina 'a mi duhsak zawng Board Member dahna mai mai' tih leh, 'an mi-duhsak zawngte sawrkar hna a lak theihna tur a siam mai mai' niin thu an lo dawng nge ni, he Board hi thiah a lo ni ta niin a lang a. Chuvang chuan, Pu Speaker, kan sawrkar thar, '*Langtlang leh Rinawm Sawrkar*' thupuia nei hian, (Governor Speech ah ngei pawh kan hmuh ang a) thalai hna neilote tana *langtlang leh rinawm* taka hnathawk thin MSSSB hi 'ennawn leh se ka duh takzet a ni' tih he House zahawmtakah hian ka tarlang duh a. Chutihlai chuan, MPSC pawh hi a din tirh khan Group 'A' post chauh khawih tura siam a ni a. Hun eng emaw chen hnuah Group 'B' pek belh niin, sawrkar kal ta ah khan a lang a. Amaherawhchu, zirlaite pressure avang nge ni, he Group 'B' post sawrkarin a

laksak leha, Departmental Promotion Committee (DPC) in hna a la thin kha tha ti lovin, Group 'B' te chu MPSC ah peklet leh a ni ta a. Kum 2019 kumtir lamah khan sawrkar tharin Group 'A' leh Group 'B' post ruak thenkhat hnawhkhat turin hma a la a. December thlengin he MPSC lama programme an han zawh hian, an calendar a lo full vek tawh a ni tih hmuh a ni a. Chutianga nih chuan recruitment a khawtlai dawn a, 'hna in a tuar ngei dawn' tih hriain kawng thar ngaihtuah a lo ngai ta a ni.

Tichuan, Group 'B' bik recruitment ti turin Board eng emaw siam a tul tih hriain sawrkar chuan nguntaka ngaihtuahin, Mizoram Sawrkar chuan MSSSB chu ni 19, June, 2019 khan a lo din ta a. Mi-tha leh thiamte tana *merit*-a hna an hmuh theihnan MSSSB hi din relin hma a lo la a ni a. Rules leh Regulations fel tak a inhungin MPSC nena an selection procedure leh Board Chairman leh Member-te pawh mithiam, experience nei, sawrkarin direct-a a control theih loh turin thuneihna, *autonomy* fel taka bithliahin a lo buatsaih a ni tih kan hria a.

He Board tharah hian a hautak lo thei ang berin sawrkarin hma a la a. Chairman leh Member pakhat (1) awmin, interview hunah chuan DP&AR lama mi pun zel tur niin, chutianga chuan kalpui a ni ta a. Sawrkar hnathawk mekte *promotion, regularization* leh *upgradation* mamawh ten a hun takah an chhawr tangkai ta em em a ni tih kan hria a. Hna zawng mek, 'lekhathiam ten *merit* in hna an lo hmu ta zel a ni' tih vawiinni ah hian ka tarlang duh bawk a ni.

Kum 2018 chho vel atang khan sum-harsatna avangin sawrkar hna hrang hrang non-gazetted pawh hnawh khat lovin an lo kalpui tan a. MCS erawh chu kumtin deuh thaw recruitment kalpui a ni a. Chutianga nih avang chuan working group - non-gazetted employees tlachhamin hna lian lam promotion tur pawhin qualifying years *relax* ngai khawpin an inkar a lo inhlat ta thin a. Hnathawktu ber Group 'C' hna thar lak tur chu department hnathawkin a lo tuar ta em em a ni. Chumi avang chuan sum harsatna karah *direct recruitments* leh *promotion* tih ngei ngei ngaite MPSC-ah chhawpchuah a ni thin a. MPSC lamin, 'thawktu indaih loh avangin hna an thawk chak thei lo' tih chhuanlamin, 'post te create-a tih-len a rawt a. Hetih lai hian DP&AR-in work study neia an lo examine hnuah, post thar siama MPSC tih-len aiin, Group 'B' (non-gazetted) chin hnuai lam chu sawrkar kuta dah turin rawtna Group 'B' tan DPC din a lo ni leh ta a. Chutianga DPC dina hna pawimawh chin lak chu sawrkarin 'thil fel tawk lo inseng luh theihna kawng a ni' tih Ministry kal ta khan a hre Chiang em em a. Chuvang chuan, Selection Board hran siam chu DP&AR in a endik hnuah chutianga chuan rawtna lo kal ta a. Chumi rawtna dungzui chuan MSSSB hi sorkar hmasa khan a lo din ta a ni.

Kan hriat theuh angin, Central Sawrkarah khuan Group 'A' bik All India Service leh Central Service la turin *Union Public Service Commission* a awm tih kan hre theuh a. Central Secretariat leh Ministry hrang hranga thawk tur Group 'B' chin la turin *Staff Selection Commission of India* a awm bawk a, Chumi ang zul zui chuan

India ram State tam ber hian *State Public Service Commission* chauh ring lovin, Group ‘B’ leh Group ‘C’ staff la turin *Staff Selection Board* hi an lo nei hlawm tawh nghe nghe a ni. A hming an vuah dan erawh chu vawiinah hian Pu Speaker, State hrang hrang kan nih avang hian a inang diak diak thei lova. Chunga kan han hriat theih mai te chu – West Bengal, Bihar, Jharkhand leh North India lamah State lian Uttar Pradesh, Uttarakhand, Himachal Pradesh, Chhattisgarh, Punjab, Haryana, Rajasthan, Gujarat leh Maharashtra te khuan *Staff Selection Board* an nei a, vawiin ni thleng hian an hmang hlawm a ni. State Board thenkhatin Group ‘B’ hna chauh an lak laiin, State Board thenkhat erawh chuan Group ‘C’ hnathawk tur thlengin an la thin a ni.

Chutiangin, North-East State zingah pawh hian Mizoram hi a hmang hmasa ber kan ni a. Chumi zul zui chuan North-East State hrang hrang - Arunachal leh Nagaland a zirlaite’n hemi Board hi an duh ve avangin nawrna a nasa em em a, zirlaite atangin. Chu chu, Mizoram MSSSB kan din dan te, a bikin Arunachal Pradesh leh Nagaland te chuan chutiang tur chuan recruitment leh board te pawh an din chho va. Vawiin niah hian mi engemaw zat an recruit tawh nghe nghe a ni a. Chutiang chuan Manipur hian Gazette-ah chuan an chhuah tawh nangin hman ve an duh a, mahse a la function chiah lova, chutiang chuan Meghalaya pawhin District level selection Board an lo nei a, State level ah erawh chuan an nei lo thung a ni. Chutiang kan thenawm State leh India ram state tam takin non-gazetted post lakna tur, Staff Selection Board an din tawh leh an din mek laia, kan Sawrkar tharin MSSSB thiahna order a siam ta mai hi a lungchhiatthlak hlein ka hria a. Vawiinah hian thil tha duh theuh kan ni a, ‘ennawn leh ngei se’ tiin thinlung takin ka ngen tak zet zet a ni.

Pu Speaker, MSSSB thiata sawrkar hna lak hi hun kal tawhah a fair loh zia kan hmu a, Departmental Promotional Committee-ina a lak hi thil fair lo tak a ni thin. Chutiang bawkin, tun tumah hian hetiang zawnga hma kan la leh a nih chuan, kan Minister leh Bureaucrats-te tan ‘invauna remchang siam a ni thei a ni’ tih chiang takin hun kal tawhah kan hmu a. Chuvang chuan, MPSC tih-len ni ta ang se la, sum leh pai pek belh teuh bakah Selection Board meeting thut hun, tuna gazetted chin chung lam chauh an lak pawha hun rei tak tak hi a muangchang leh phah dawn a ni tih a langchiang a. Hei hi chu ngaihtuahna uluk zawkin mithiamte rawna, ennawna, review leh turin ka ngen a ni. Chutianga review a nih leh loh chuan, *kalphung-thar* hian *kalphung-hlui* tha lo, Sawrkar hmasa pawhina kan lo kalsan tawh bawkah khan kan kir leh dawn niin a lang a. Chuvangin, he MSSSB thiah mek pawh hi ennawn leh ngei turin he sawrkar hi thinlung leh tih tak zetin ka ngen a.

A tawp berah chuan, Pu Speaker, MSSSB function-ah hian complain thawm vawiin ni thlengin tumahin kan la hre lova. MPSC ang bawkin merit-a tling lo chu, Minister emaw, tu thil ti thei emaw duhsak zawng inthuna thiltih vawiin niah hian hriat tur a awm lova. Chuvangin, chak zawka recruitment tih zel a nih theih nan te, promotion hun tawhte leh tu emaw service chungchangah pawh chak taka Mizoram sawrkarin a kalpui

zel theihna turin, thalaite leh zirlaite duhthusam ang ngeiin ‘MSSSB hi a ngaiin ding leh ngei se’ tih hi hna zawnglaite hmakhua tan thil duhawm tak a ni ngei ang.

Chuvangin, Pu Speaker, vawiina *Private Members’ Resolution* ka rawn put luh hi House zahawm tak hian kan ram leh hnam tana *fair* taka hna thawk thin MSSSB - Mizo thalai hnazawng mekte tana rintlak leh tangkai tak tuna thiah tak hi ‘sawrkarin ennawn leh rawh se’ tih hi he House zahawm takah hian ka rawn pu lut a ni e. Ka lawm e.

HON. SPEAKER : Aw le, resolution neituin a rawn move ta a, kan sawiho nghal mai ang a. Minute engzat nge kan in pek ang, member pakhat sawi rei hun tur kha? Minute 5 nge niang minute 10? (*Minute 5’ tih chu House-in rem a ti a..*) Awle, member pakhat minute 5 zel hun kan inpe ang a, chutiang chuan kan kal dawn nia.

Tunge han sawi hmasa ang le? Sawi tur kan awm lo em ni? Aw le, Er. H. Ginzalala, Champhai North Bialtu zahawm tak i lo sawm ang.

PU H. GINZALALA : Pu Speaker, hun min pek avangin ka lawm e.

Hei, kan ram hian *kalphung-thar* a din chho mek zel a. MSSSB pawh hi ‘a chhe lutuk ang’ pawh kan ti em em chuang lo nain, keini chuan *kalphung-thar* hi kan policy a nih avangin, he thil an han tih hi ‘thil-thar, Zoram tan pawha mellung pawimawh chhinchhiah tlak tak a ni dawn’ tih hi ka sawi duh a. Pu Speaker, ‘kan ramin a mamawh chu, *transformation* a ni’ kan ti thin a ni. Chuvangin, he thil hi hun rei tak lo kalpui tawh mah nisela, a aia tha zawk *kalphung-thar* awm nia kan hriat avangin, he thil hi kan han cancel a ni a.

Hei, hmanni, nimin piah lawka Governor Speech te kha kan han ngaithla a. Governor Speech-ah chuan, “*Vikshit-Bharat*, do hazar sentalis” tih kha ni mai a. Hemi *Vikshit-Bharat* hian ‘engnge a tum leh a laimu engnge ni ang aw’ tih ka han zir chian hian, ‘effective governance’ tih hi a ni tlat mai a ni. Chuvangin, kan ram kalphung kan han zirchian hian, ‘Sawrkar hi a lian lutuk a, *efficiency* hi a tihnam a ni’ kan ti a ni. Nimin piah lawkah Governor Speech hi a tha kan ti a, ban kan phar a, kut kan ben dur dur lai khan, tunah khatiang kalh zawnga resolution move a ni hi chu a vanduai thlak ka ti a. Pu Speaker, i vei lama mite hi inngaihtuah nawn se ka duh a. Niminah ‘*Hosana*’ tite khan vawiinah ‘*Kraws-ah...*’ tite nen khan an inang-khat viau awm mang e ka ti a ni. Chuvangin, inngaihtuah nawn turin ka duh a ni.

Ka han sawi duh chu, (a-saptawng bawkin han sawi leh ila) ‘*Maximum government; minimum governance*’ hi tuna kan kal dan a ni. Sawrkar hi a lian em em mai a, mahse, kan khua leh tui mipuite tana service kan rendered hi a tlem si a. Chuvangin, *efficiency* hi a hniam a ni. Chutianga kal lo khan, tunah hian *kalphung-thar* kan ti a, Sawrkar hi te tulh tulh se kan ti a ni. A awmzia ber chu – ‘minimum government; maximum

governance’ hi kan thiltum a ni. Chu chu a nih avangin, Pu Speaker, he thil kan tih hi tisualah kan inngai lova, hnung lam kan hawikir thei lo a ni. Keini chu kan kal zel dawn; kalphung-tharin a ken tel leh kan policy-a bet tlat a nih avangin, he thil kan ti hi tifuh kan inti a. Mizoram tan pawh mel lung pawimawh tak leh chhinchhiah tlak tak a la ni dawn a ni. Chuvangin, department tam tak hi tih tet zel a thain kan ring a. Chuvangin, he thil pawh hi kan hmalakna hmasa ber zinga mi a nih avangin, a pawimawh kan ti a, kan inchoir lo hle a ni.

Tin, MSSSB hi tunah hian lo hmang tangkai duh viau ta chu ni ila, eng emaw hi chu kan ti ve thei tho a ni. Kan duhsak zawngte pawh nakinah Board Chairman ah te, tu tu emaw member ah te kan inruat ve thei mai thei a ni. Amaherawhchu, khatiang chi kha kan duh lova, he thil hi kan ram tan, kan vision tan a that loh avangin, mahni leh mahni in sacrifice-in hetiang hian kan ti ta buai mai a ni a. Chuvangin, ZPM-Sorkar hi a thiltumah hian a rilru thianghlim zia pawh a lo langin ka hria.

Hman kumah China-ah ka han kal ve a. Kan thianpa chuan China-ah factory a lo din a. ‘Engatinge India-ah factory i din loh?’ tiin ka zawt a ni. Min chhanna chu – “India rama in politician-te chuan vision thui tak an nei lo. China-ah chuan tun atanga kum 50 lo thleng tur hi vision-a neiin decision an siam pawp pawp zel a ni” a ti a ni. Chu chu a nih avangin, kan ram a tlakchham ber chu, vision thui tak, tun atanga kum 50, kum 60 (kum 100 te pawh a ni ang chu) lo thleng tur vision phak hi kan ram politician a mamawh chu a ni a. Tunah hian kan CM kaihhraina hnuaiah vision thui tak neiin he thil hi kan han kalpui a ni a. Chuvangin, keini chuan tisual kan inti lo a ni.

Tichuan, ka han sawi leh duh chu – ‘kalphung-thar’ kan han tih ah te hian hengte hi a bet vek a. Chuvangin, tuna kan dinhmunah hian kan lungawi lova, system thar introduce ila kan ti a. Kan Bible ah pawh, “hetah hian khaw hmun nghet kan nei lo; khaw lo la awm tur kan thlir zawk a ni” a tih ang deuhin, tuna kan dinhmun ringawt ni lo, *Zoram-thar* lo thleng tur hi kan thlir zawk a. Sailova hlaa “Zoram tang fan fan” a tih ang deuhin, ‘tunah hian tuarin hrehawm deuh mah ila, i tang fan fan ang u’ tih hi ka sawmna a ni e. Pu Speaker, ka lawm e.

HON. SPEAKER : Hrangturzo Bialtu zahawm tak Pu Lalmuanpuia Punte ilo sawm ang.

PU LALMUANPUIA PUNTE: Pu Speaker, ka lawm e. MSSSB chungchang hian sawi a hlawh hle mai a. A din tirh atangin MNF party khan tha an ti a, party dangte chuan tha kan ti lo vek a ni. Zirlai Pawlte pawhin an office kai turte pawh an dang tawh a ni. Congress party wing pakhat NSUI te chuan tha an tih lohna te, fair an tih lohna te PR an siam kur ngei nguai tawh tih kan hria a. Hei hi a tir atang rengin politically-a duhsak zawngte thun tumna ang deuha ngaih a ni a.

He mi Board din hi June Ni 10, 2019 ah Council of Minister in a passed a, June Ni 19, 2019 ah notification chhuah a ni a. Chu tih lai mek chuan, a kum leh February Ni 2, 2020 ah khan Pu Lalrammawia chu MNF Adviser atan ruat a ni a. Tichuan, Pu Lalrammawia chuan February Ni 2, 2020-a MNF Adviser atana ruat a nih lai khan ni 8 chiah Adviser a nih hman lain, Ni 10. 2. 2020 ah banna a thehlut leh ta thut a, Ni 12. 2. 2020 ah a banna pawm sak a ni a. Tichuan, February Ni 24, 2020 ah MSSSB Chairman ah ruat nghal a ni ta a ni. A kalkawng han en khan a dik lo a ni.

Chuvang chuan, MPSC a awm reng a, MPSC kha thuam chak zawk mai tur a ni a. MPSC-in fair taka thil an tih thin anga kha duhkawp lo deuh a, mahni duhzawng puan-hnuai thila va inrawlruk zeuh zeuha inlak tumna avanga he Board hi lo piang ni hian a lang tlat a. Chuvangin, Pu Speaker, kha tih lai pawh khan i vei lama mi thenkhat chuan an duh lova, Congress party pawh khan an duh lo a ni. Ka sawi tak ang khan, NSUI te pawhin an duh loh thu kur ngei nguaiin ‘Press Release’ nen a hmunah te kalin an va inkawm a ni a; khatiang khawp khan oppose-na a tam a. Chuvang chuan, a tih tirh atangin ZPM hi chuan, “hei hi a tha lo, kan Sawrkar ve a nih chuan, tihtawp a tul” kan ti nghal reng a ni.

Chuvang chuan, a move-tu, Dampa Bialtu MLA Pu Lalrintluanga Sailo khan, “interview neih hunah te DP&AR atangin an va kal thin a, an inpawt thin” a tih phei chu, sawrkar hnathawk service reng laia khatiang Board interview-tua an tan phei chuan, sawrkar tan chuan duh zawng thun theihna sam tak a ni. DP&AR Officer thenkhatte kha Minister thenkhatin, ‘hei hi lo ti rawh aw’ an tih chuan, tih loh ngam pawh a ni lovang. Chuvang chuan, a move tu-in a rawn sawi kha, a him loh zia tilangtu a ni tlat a ni. Chuvang chuan, khatiang thil kha keini Sawrkar-ah hian la awm ve reng ta se, mihring ve bawk kan ni a, eng emaw changa tisual ve thei reng dinhmunah kan ding dawn a. Khang zawng zawng lak atanga system-in min phuara, khatiang kan tihtheih lohna tura indana, Board thiah hmak mai kha a tha berin kan hria a. Chuvang chuan, hetiang hian Sawrkar-in a lo kalpui ta a ni a. Chuvang chuan, Pu Speaker, thusawi tur tam lutuk pawh ka nei lova. He *Private Resolution* hi tlang lo se, pass lo ila ka duh a ni. Ka lawm e.

HON. SPEAKER : Pu V. Malsawmtluanga, Lunglei North Bialtu ilo sawm ang.

PU V. MALSAWMTLUANGA: Pu Speaker, vei lama thute kan han ngaichang deuh a, amaherawh chu, kan han sawi chhonzawm zel ang a. Kalphung thar, mipui-sorkar kan siam a, mipuite’n an duh taka an thlante kan ni a. Chutah chuan ka ngaihtuahna hmasa bera rawn lut chu – ‘mipuite tan eng service nge kan pek ang?’ tih a ni. Chutah chuan kan House Leader, CM ni bawk Pu Lalduhoma hoa uluk taka ngaihtuah a nih hnuah, ‘MSSSB hi thiah ni se’ tih a ni a.

A hmasa berah chuan, kei chuan hei hi *Mipui-Sorkar* siamnaah ka ngai a, ‘ka thlawp a ni’ tih kha ka han sawi hmasa duh a. Tin, a dawt lehah chuan, kan Sorkar hian thil a nih tur ang nih tir hi kan tum a ni. Indian Constitution, Article 315 - 323 kan thlir chuan, “*Public Service Commission* hi Union leh State tan a awm tur a ni” tih kan hmu a. Chu mi a nih avang chuan, MPSC Board te pawh a lo awm ta a ni. Chu chu keini chuan khatiang lo awma kha rin chhunzawm zela, *Dan* a nih tur anga kalpui hi tha kan ti a ni.

Tin, a dawt lehah chuan, kan Sawrkar chuan *aikal lak loh; aikal nuaibo* te kan ti a ni. MSSSB hi a thatna kawng han sawi dawn chuan a tha hle mai, amaherawhchu, hetia a lan danah chuan, aikal lak te pawh hi a ang deuh reuh a, hna kan lak dawn hian. Mizoram-ah mi nuai sawm tawh kan awm a, kan tam lo hle a ni. MPSC awm reng chung a MSSSB lo awm hi, *aikal* la deuh reuhah ka inngai a, ka lo thlirnaah chuan. Chuvang chuan, hemi kan nuaibo hi a tha ka ti hle a ni.

Tin, chu chang ni lovin, *inrenchem* te kan han kalpui a ni a, hun hmasa lama kan sawrkar kal tawh te pawh khan SEDP kha an tihlawhtling hleithei lova, chulai kara MSSSB-a sum eng emaw zat kal ral hi kei chuan tha ka ti lova. Han enchiang ila, thla khatah hian MSSSB din avangin ₹9,61,595/- lai mai hlawhah a kal ral a ni; a neuh neuhte nen chuan thla khatah nuai 11 chuang kha a kalral tihna a ni a. Kan hun hmasa lama Sawrkarin an lo sem thin SEDP ang khan sem dawn se, mi 22 lai daih kha a ni nghe nghe a nih chu; chutiang vel chu thla tin an hlawh kha a ni a. Chuvang chuan, tunah sawrkar hnathawh hlawh te, healthcare bill tang te kan Sawrkarin pek a tum mek laia, hetiang khawhral a ni hi kei chuan tha ka ti lo a ni.

Tin, a dawt lehah chuan, a lo pian dan kha Pu Lalmuanpuia Punte khan a lo sawi tawh a. Thil engkim mai hi Sawrkarin *Dan* a siam dawn a nih chuan, a lo pian chhuah dan hi chik taka zirchian a ngai thin a. Kan MSSSB Chairman Pu Rammawia chungchang kha chu ka sawi tawh lo mai ang a, ka hmaa mi khan a rawn sawi tawh a. Ka han sawi tum tak zawk chu, Pu Lalnuntluanga’n RTI hmanga a zawhna 5-na kha kan lo hriat tlan ka ring a, social media-ah pawh a darh a. “MSSSB-in hna a lak dawn hian chunglam atanga thu neitute (MLA leh Minister) khan aw an rawn nei thin em?” tih kha a ni a, “Nei thin e” tia chhan a ni. Chuvang chuan, MSSSB-ah hian hna an lo lak tawhte kan zah hle nachungin, politically-a inthunna remchang tak a awm niin a lang a Chuvang chuan, MSSSB kan thiah hi, “ka thlawp a ni” tih kha ka han sawi nawn a ni.

Tin, hna lak dan chungchangah - September, 2023-a *Common Recruitment Exam* an buatsaihah khan Local Administrative Officer, Circle Officer, Centre Commander teho zawng zawng kha exam paper inangkhat vek pek anni a. Khatiang anih kha chuan, ‘hna inang lo tak tak exam inang veka kalpui te kha a fuh ber em’ tih te kha rilruah a lo awm a. Chu mai bakah, an sawi fo thin hi tak tak a ni ah ka lo ngai a, MSSSB-in hna an lak hian *entirnan*: zirtirtu an lakna angah te pawh hian Maths leh Computer thiam deuh te tan hian ‘chance a tha bik em’ tih te pawh a awm ve tho a ni Pu Speaker. ‘History zirtirtu

turin a Maths thiam tak han lak ringawt kha a fuh ber ang em' tih te kha rilruah a lo awm bawk a ni.

Tin, ka han sawilan leh duh chu - MPSC hi a tha tawh hlein ka hria a. An hna lak dan evaluation-ah hian stage pathuma kalpui a ni nghe nghe a. Tlemin lo fan deuh mahse, Mizoram mipuite tana thil tha zawk turah kei chuan ka ngai a. Tin, 1993 MPSC kal danah khan ruling party lamte an inrawlh thei lova an ngaih vang em maw ni dawn ni, MPSC regulations te pawh tih danglam a lo ni tawh a. 1998 khan Higher Secondary School zirtirtu lak MPSC-in a buaipui lai mek khan, sawrkar laiin a lo chhuhsak tawh a ni. Chuvang chuan, Pu Speaker, MPSC hi India Constitution-in min phal ang thlapa kan neih a nih angin, tha ka ti a.

Chuvang chuan, tuna Member zahawm tak Pu Lalrinawma Private Resolution rawn putlul hi kei chuan ka pawm lova, ngaihtuah nawn leh hi tha ka ti lo a ni. Ka lawm e.

HON. SPEAKER : Sawi leh duh dang kan awm em? Vei lampanga mite sawi duh nei kan awm em? Aw le, East Tuipui Bialtu zahawm tak Pu Ramthanmawia ilo sawm ang.

PU RAMTHANMAWIA : Pu Speaker, ka lawm e.

Dinglama mite'n an han sawi kha kan han ngaithla a, a thatlohna kha sawi tur vak kha an hre lova, amaherawhchu, an lo ti tawh lak lawh si a, an tang laklawh niin ka hria. A chhan chu, he MSSSB hi kei pawhin ka lo belchiang vak ngai lova, mahse, kan fate leh kan naute an han exam ve ta chia a, tun High School zirtirtu lakah khan; written-a tling 100 zingah khan an tling ve ta tlat mai a; kan fanu khan tlin pawh a inbeisei ve em em a ni; tlaivar dawn dawnin lekha te a zir a. Tichuan, interview an neiha result a lo chhuak khan, a tling ta lo a ni. Tichuan, a tlin lohna kha an han zawt an han zawt a, mark 2 in a tla a ni. Tichuan, an fair hle tih kha a lang a. Kan fanu, kan nau tih an hre vek, mahse, kan nau te an nih avang ringawt khan mark 2 kha min pe lo hrim hrim. Hei hian wawiina kan thiah tak hi 'a fair a ni' tih hi keimahni chhungkua atangin ka hmu a, pawl ka ti a. Zirlai mekte tan beiseina, beidawnaah a siam niin ka hria a, pawl ka ti khawp mai a.

Tin, an record kan han en a, hna lak mai ni lovin, promotion an lo khawih nasa em em mai a, sawrkar hnathawk mekte, a ngheta thawk lote tan pawh an lo tangkai em em mai tih te kan han hmu leh zel a. Pu Speaker, 2021 atanga 2023 thlenga *direct recruitment*-a hna an lak zat hi 328 lai a lo ni a. Tin, tun hnaia kan hriat tak ang khan, High School zirtirtu 50 lak thar a ni bawk a. Chu mai nilovin, department hrang hrang-a Group 'B' post regularization mi 166 te confirmation atana an recommend mi 1355 a lo ni a. Tin, Group 'B' post *Recommended for Conversion* atan mi 43, *Absorption* atan mi 43-te kha an hnathawh te a lo ni a.

Tin, LDE a recommend te pawh mi 149 lai 2023 thleng khan an lo ti hman a, sawrkar hnathawk mekte *promotion* hi a vaiin 3097 an lo recommend bawka ni, Pu Speaker. Khang chung leh kuate tan khan an hnathawh hi a lawmawm thlawt a ni. *Promotion* hi nikhata tlai pawh sawrkar hnathawk tan chuan a uiawm em em a, *seniority*-ah te a hun taka an zawm loh hian an tan next promotion-ah buaina zel a ni a. Chung zawng zawngte avang chuan, Sawrkar hna Group ‘B’ an la mai ni lovin, a thawk mekte hamthatna leh an dikna atana he MSSSB in hna an lo thawh hi a ropui ka ti a.

Chutih laiin, ngaihtuah chiang mang lovin ‘kan thiat ang’ kan ti a, kan thiat ta mai niin ka hria a, Pu Speaker, a pawka ti khawp mai a. Chuvang chuan, vawiina kan MLA zahawm takina he MSSSB chungchang hi ngaihtuah tha leh tura a rawn move hi uluk taka ngaihtuah a thain ka hria a ni. A dik zia, a fair zia te pawh keimaha ka hmuh atang chuan a chiang hlein ka hria. Chuvang chuan, khang laia thawktu turte chu kan hmehriat, duh zawng te kan lo dah pawh a ni thei e. Amaherawhchu, an *system* hi induhsak theih vak a ni lo a ni. Chuvangin, Pu Speaker, *mark system* in paper I, II, III-a an mark hmuh kha an interview-na nen an han belhkhawm a, an tlak chuan, an tla a ni mai. Tunlaih chuan khatianga langtlang a ni tawh avangin, vawiina kan sawi hi kan ram leh kan thalaite hmakhua ngaiin thiat lova, a pangaiia kalpui leh hram tura kan member zahawm takin a a rawn move hi ka rawn thlawp a. Ngaihtuahna thar kan sawrkar hian hmang turin ka rawn ngen a ni e. Ka lawm e.

HON. SPEAKER : Aw le, tunah chuan Lunglei South Bialtu member zahawm tak Pu Lalramliana Papua ilo sawm ang.

PU LALRAMLIANA PAPUA: Pu Speaker, ka lawm e.

MSSSB din chungchang, a lo pian chhuah dan te a tlangpuiin kan ngaithla tawh a, sawi nawn ngai lovah ngai ta ila. Tun Sawrkar tharina ‘hei hi lo tawp tawh rih mai sela, MPSC in a hma leh a hna zawng zawng hi chu a thawk thei tho si a; *austerity measures* kan kalpui bawka, thla tin mai nuai 10 chuang liam ringawt lo hian, hei hi sum khawlah hmang ta ila; MPSC in a kengkawh thei tho si a’ ti a hma la hi kei, ka support zawka a. Ennawn hi tul tihna keima lamah chuan a awm lo a ni.

MSSSB din chungchangah hian kan chhui let ve mai mai a; a lo dinchhuah dan chungchangah pawh hian MPSC in harsatna a nei nasa em a. Chuvang chuan, ‘engtinge kan tih ang’ tiha *study committee* te indina, mumal taka zirchianga puitu tur din pawh hi a ni chiahin alang lova. Kan hriat leh kan han ngaihthlak ang deuh khan, khami a din kum khan cabinet meeting roomah Council of Ministers te kalkhawmin thuthlukna an siama khatia rawn ni chho ta deuh mai kha niin a lang a. Chuvang chuan, a rawn pianchhuah danah pawh hian duh angin uluk a ni lo deuhin ka hria a. An hna lak tawhah ‘a fair lo em mai’ tia han sawia, han paihthlak duh lam aimah khan, he hna hi MPSC in a ti thei tho si a, chuvang chuan, sum renchennan te pawh a tul a. Tin,

constitutional status nei ngei mai, (kan hriat tak ang khan) ‘Part-IV of the Indian Constitution Article 315’ ah Public Service Commission din a nih tur thu leh hna latu tur a nih thu te pawh kan hmu a. Kha *constitutional status* nei ngei maiina hna lakna kalpui kha ‘a nih dan tur pawh a ni e’ tia ruahmanna Sawrkarin an siam hi a tha hlein ka hria a ni.

Tin, kan din chhan ber nia lang, sawi awm thin chu – ‘MPSC chhawk zangkhai nan’ tih kha a ni a. Hetih hunlai hian MPSC a kan Chairman, Rev. Zosangliana Colney pawhin a sawichhuak nia thu ziak lamah te pawh kan lo hmuh dan angin, Sawrkar hna lakah a hun taka tih theih loh an neih loh thu a sawi a, kum 2019 an din kumah leh an din hma lawk te pawh khan. Heng te hi a nih avangin, harsatna em em MPSC in a nei chuang lova a lan laia, khatiang eng emaw, a thawh tur thenkhat lo lak pen tumna ang boruaka kha a fuh lohna chin kha a awm niin a lang.

Tin, ‘Staff Selection Commission te pawh kha Central-ah a awm tho a, *Subordinate Service* lakna kawngah’ tih te pawh move tu atanga sawilan te pawh a awm a. Heng Staff Selection Commission din te pawh hi mumal taka kalpui a ni a, helaia kan MSSSB te nen hi chuan tehkhin chi pawh a ni chiahin ka hre lova. Tin, Staff Selection Commission in hna a lakah hi chuan written exam a ti that te khan awmzia a nei nghal a, interview pawh kalpui tawh chuang lovin, an written a tih that dan a zir khan. Hetah an mahni hnuaiah khan a hranpaa document verification te neiin, an hna pek turah job-offer kha an nei mai a ni a. Heti laia interview leh a kara political influence awm thei tur remchang kha a awm lo hrim hrim a ni. Chuvang chuan, Staff Selection Commission te nen phei chuan tehkhin chi ah pawh ka ngai chiah lo a ni.

Tin, MSSSB ah hi chuan (nichina kan ngaihthlak tak ang khan) “a-khaipa-te tawngkam atang te pawhin a lang e” an ti a. Chunglam atangin Aw hriat a nih thu leh, an tih sak ngai lem lo tih tawngkam te chu hriat a ni a. Chunglam atanga Aw hriat a ni hrim hrim te pawh kha a ti ngaihthatawm lova; MPSC ah hi chuan chunglam atanga Aw an hriat thu pawh hi sawi a awm lem lova. Chuvang chuan, MPSC in hna a kenkawh zawh tho chuan, tun dinhmunah pawh kan han zir Chiang a, MPSC hian harsatna an nei lo a ni, hna lak chungchangah. An harsatna ber chu, a hmun-hma, examination hall an indaih loh thu vel a ni a. Hei hi chu keini district dang atanga MLA ni tan phei chuan, kan district ah te examination centre te hawn a nih phah ang a, ti khan examination hall indaih lohna te pawh kha kan that phah dawnin a lang a; exam centre te kha hmun hrang hrangah te awm ang a, semzai theih a ni a. Chuvang chuan, helai hi chu chhuanlam tling niin ka hre lem lo a ni, Pu Speaker. (Minute reilote ka han sawi belh lawk ang e, min phalsak chuan).

Chuvang chuan, tun kan dinhmunah hian he Resolution lo lut anga MSSSB thiah anih chungchang ennawn hi kei a tulna awmin ka hre lova. Ka han tehkhin danah phei chuan, a ti theitu leh ti tura ruat an awm reng a, chu mite chuan harsatna an neih loh chuan an

kalpui mai tur a ni a. Retailer buhfai sem thin, thuneitu nih avanga, ‘a card-eng chin hi chu ka fate’n kan in lamah an lo sempui ang che’ ti ang deuhin ka tehkhin a, a ngaihthat thlak tawh lo a ni. Khatianga a titu tur awm renga, an tih lai lak thena han tiha kha a fuh lovin ka hria a. Chuvang chuan, ngaihtha taka MPSC ten inhawng tak leh inhuam taka an kalpui thei a nih chuan, an kutah hian pe leh ta phawt ila; tichuan, harsatna te a lo awma eng emaw problem kan hmachhawn a nih chuan, chung hunah te pawh chuan ngaihtuahna thar te pawh a la sen leh thei a lawm le. Chuvang chuan, wawiina Resolution kan hmuh - MSSSB thiah a nih chungchangah “sawrkarin ennawn leh rawh se” tih chu tlang lo mai sela, “tuna sawrkarin hma alak tum dan ang hian kaltlang se’ tih kha, kei ka ngaihdan deuh a ni e. Ka lawm e.

HON. SPEAKER : Tunge sawi leh ang? Thorang Bialtu Pu R. Rohmingliana ilo sawm ang.

PU R. ROHMINGLIANA: Pu Speaker, ka lawm e.

Sawi tur ka ngah hle mai a, amaherawh chu minute 5 chiah kan nei a. Ka lo tawng rang deuh a nih pawhin mi hriatthiamna ka ngen nghal a. Tin, minute 2-1 lek ka pel a nih pawhin, Pu Speaker, i ngaihdamna ka dil nghal ni sela.

A hmasa berah chuan Pu Speaker, Private Resolution - *MSSSB thiahna tur order ennawn* hi ka thlawp a. MSSSB chungchang hi mipui hian hriatsual kan nei fo thin a, ‘Group ‘B’ - non-gazette post lakna chauh a ni’ tih hi ka han sawi hmasa duh a. Tichuan, India Union-ah Staff Selection Commission (SSC) a awm a, a chungah *UPSC - Constitutional Body* a awm a. Tichuan, State ah pawh MPSC - Constitutional Body kan nei a, chumi hnuaiah chuan MSSSB, Mizoram sawrkarin a thuneihnain a din a, hei hi chu India state-a thuneihna a pek a ni. State thuneihna a ni a, chu chu a dah a. Nichin a move-tuin a sawi ang khan, state dang dang pawhin an nei a, Subordinate Service Selection Board (SSSB) hi, a hming erawh chu a inang lo hlawm ang. Arunachal te, Nagaland te, Haryana te, Delhi te, Gujarat, Rajasthan, Uttar Pradesh, Uttarakhand, Punjab te leh state dang te pawhin an nei a. ‘Keini pawhin kan neih lai reng engatinge thiah kan tum?’ tih laia hi *question* lian tak niin ka hria.

Tichuan, Pu Speaker, ka hmaa sawitute’n Chairman hmasate hming mal malin an sawi a, ‘MNF-ah Adviser a ni e’ tih te; kha kha a pawl ka ti khawp mai. Keini MNF Party chuan mi tha kan duh; MNF Party-ah hian mi tha tak tak an awm a ni. Amaherawhchu, MNF Party a nih loh khan a kalna tur, a nihna tur ang khan a function mai a ni. Chutiang mihring awmkhawmna chu MNF a ni.

Tin, Pu Speaker, a senso chungchang nichinah kan ngaihthla a. Senso chungchangah hian kan House Leader-in a sawi tawh a, ‘Driver barrack siam belh a ngai’, a ti a. Amaherawhchu, (ka thu lo hriat danin) hei chauh hi a ni ta hauh lo mai. Tun tumah

chuan, MSSSB paiha, MPSC-in a kenkawh leh si dawn chuan, posts thar eng emaw zat lakbelh a ngai niin ka hre ta a. Hei hi *Sawrkar-sum renchemlohna* a ni zawkin ka hre ta. Pu Speaker, heti laiah hian thil ka rawn chhut ve a. MSSSB a nih lai khan, chairman leh member pakhat khan hlawh an nei; kha kha Sawrkar-sumbawm atanga pek anni ngei mai. Amaherawhchu, *retired* annih chuan, an pension hlawh baka kha hlawh tura an bituk a tlinlohna chauh kha pek an ni. Amaherawhchu, vawiin nia MSSSB Chairman kha Secretary-ah dahchhoh tur a ni a, a hlawh chu a la kal reng dawn. Tichuan, tuna MPSC Secretary hi Additional Secretary-ah dah tur a ni a, 13A Level-ah; kha pawh kal sa a ni, a hlawh hi.

Chu bakah chuan, tun dinhmunah chuan Joint Controller post 1 (Level 12); Assistant Controller of Examination post 1 (Level 10); Assistant 2 (Level 7); UDC post 4 (Level 6); LDC post 4-5 lai; Group 'D' post 6 (Level 1); khang ho hlawh kha han chhut neuh neuh hian, tuna in lak thar leh si chuan, thla khata an hlawh senso tura hi cheng ₹9,33,270/- a ni a; kum khatah phei chuan cheng ₹1,08,39,240/- a ni daih dawn. Chuvang chuan, he kan thiah hian Sawrkar sum hi a hek daih.

MSSSB a nih lai khan heng ho hi sawrkara hlawh la sa, department hrang hrang atanga hlawh la sa vek attached-a lak an ni. Chuvang chuan, sum chungchangah chuan hei hi *kan inrenlohna* tilangtu niin ka hria a. Tin, a *fair* leh *fair-loh* chungchangah pawh khan, a fair ani ang. MZP pawhin engnge an thuchhuah? Chief Minister kalta hnena an lehkha thlen te, an press release te hetah hian a awm vek a. A fair a nih ka rinna chu, hnam dang pathum an lak avanga an lungawilohna te chauh a ni; 'A fair lo' tia an lungawilohna an la tarlang miah lo. Chuvang chuan, he MSSSB hi kan thiat anih chuan, kan Zoram tan a pawl ka ring; thil awm tha sa hle hle thiah kha a pawl ka ti a. Tin, Pu Speaker, a tuartu tur hi an tam dawn khawp mai. sawrkar-hnathawk, sawrkar-hna zawnglai mek tuna kum over tep tawhte chuan he period avang hian sawrkar-hna an hmuh theih loh phah maithei a ni. Kumkhuain an damchhungin pawl an ti ngawtin ka ring.

Tin, hmalak a muan phah ngei ngei ka ring. Promotion mai turte pawh hemi avang hian a muan phah ngei ka ring a. Chuvang chuan, he resolution hi pass ngei nise la; tichuan, Pu Speaker, en that leh ni sela; thil tha nia kan hriat hi chu kaltlangpui ngam ila. '*Kalphung-thar*' tih avanga thil tha thiah zel pawh kha tha ka ti lova. Pu Speaker, vawiinniah hian i dinglama thute pawh hian an rilru zawng zawng seng thar leh sela ka duh a.

Vawiinah kan House Leader ho thlengin ka han sawm duh a chu - Information diklo deuh kan lo dawng em ni? 'Kan en tha leh dawn nia' ti theiin an rilru pe sela. Vawiinah hian Pu Speaker, Setana mualpho nanah pawh he resolution hi 'ka thlawp e' rawn ti vek sela chuan, ka lawm ngawt ang. Ka lawm e.

HON. SPEAKER : A lawmawm e. Aizawl West-I Bialtu zahawm tak, Pu TBC Lalvenchhunga i lo sawm ang.

PU T.B.C. LALVENCHHUNGA: Pu Chairman..., Aw, Pu Speaker, ka lawm e. Kan ngaithla zing deuh hlek a, ngaihdamna ka han dil nghal ni sela.

Vawiin nia *Private Members Resolution* rawn lut hi, a hmasain ennawn leh a ṭalna (a mimal takin) ka han hre lova. Chu chu ngaihdan hmasa han ni ta sela. Chutih rual chuan, a resolution puluttu i vei lama ṭhute hian kan thlawp ṭha lo riauin ka hria a. Chuvang chuan, kan ngaihdan tam zawk chu a hriat theih ruak tawhin ka hria a.

Tun huna ka rawn din chhuah chhan zawka hi chu, ṭhalaite hmakhua ngaia hetiang resolution kan han pulut leh hi a lawmawm ka tih rualin, ṭhalai nia ka la inngaih avang leh ṭhalaite aiawh zinga ka inchhiar avangin, vawiin nia resolution rawn neitu hian ‘ṭhalaite rilru tak tak hi min hriatthiampui em?’ tih lai hi zawhna ka han nei a.

A chhan chu, *Mizoram Public Service Commission* din a nih lai khan kan rual u zawkte manganna leh harsatnate, DPC hmanga nepotism (induhsakna) hmang tea thuneihna kan lak ṭhin avanga hna zawngte mangan ṭhin zia kha kan hre vekin ka ring a. Zoram ṭhalaite, vawiin nia kan rual u zawkte pawhin kan hmuh ka ring a. Chutiang karah chuan MPSC chu dan hnuaiah din a lo ni ta a. MPSC din a nih hnuaiah pawh hian politician-te leh thiltitheite’n thuneihna hi chhuhsak kan chak em em mai a. A changin thuneihna kan pe a, a changin kan chhuhsak let leh a; chutiang reng reng chuan vawiin ni hi kan thlang a.

MSSSB pawh hi chumiina a hrinchhuahsakte zinga mi chu a ni a. Politician-tena hna lak chungchanga thu kan sawi ve theihna tura India ram Constitution-ina *constitutional power* a pek MPSC ring zo lova, kan rin zawhlohna ai mahin chhuanlam dang siama hetiang Board dang kan han din lehna rilru hi, ‘ṭhalaite hmakhua ngaih vang a ni tehreng em?’ tih hi ngaihtuah tham niin ka hria a.

Chutih rual erawh chuan, MPSC pawh reform ngai leh tih ngai tam tak pawh a la awm ang. Kan Sawrkar hian thutlukna a siam hian ngaihtuahna fim tak neiin, sawrkarna kan chelh hma hauh aṭanga kan lo aupui a nih avangin, vawiin nia MSSSB, ṭhalaite zingah hian kan tel em ka hre lova. Facebook group-ah te, aspirants-ho hna zawng mekte awmna group-ah te pawh ka awm ve a, decision hrang hrang discussion-ah te kan awm ṭhin a. ‘Mi-pangngai chin ngaihdan’ ti teh ang; zirlaite zingah hna zawng mekteah harsatna an neih awm hriat a la ni lova.

Hemi piah lamah hian, MSSSB hi kan ngaihtlak leh hriat tawh ang khan, a bultān tir te aṭanga Mizoram Public Service Commission, *Limitation of Functions Regulation, 1994*, June Ni 25-a Sawrkar-ina thuneihna a han chhuhsak tak rup mai khan MSSSB hi

a la ding hauh lova, a hnu thla ruk hnuah a ding chauh a ni. Chutiang khawp chuan MPSC thuneihna hi Sawrkar hian chhuhsak kan chak thin a, hei hi thalaite tan ngaihtuahna tithuitu tak a ni a. *Independent Body* a ni lova, ‘Ruling Sawrkar-in a-nawm a-maka member leh Chairman te a ruat theihna a ni’ tih hi hriat nawn leh a thain ka hria. *Unfair means* leh khatiang lam sawi tum ai mah khan MPSC thuam chak a ngaih dan te, exam centre, regional centre kan neih a tulzia te vawiinniah hian kan sawiho zawk turah ka han ngai a.

Kan MSSSB syllabus te pawh ‘MPSC ai chuan a awl zawk a’ tih te pawh a awm rualin, entirnan: – vawiin ni thlenga exam pasarih kan buatsaih tawh kha han en ula, ... (*Warning Bell a ri a..*) Pu Speaker, Khawngaih takin tawite hi ka han zo lawk ang a. Exam apianga thalaite ti-ti khawmna huangah chuan, “Engatinge General Knowledge-ah MPSC angin variety subject hi; engahnge an chawm pawlh; engkim an tih len” tih te avanga *syllabus revision* ngiatna te a tam em em mai a. Hemi piah lamah hian kan *weightage* pek danah *specialization required* ni miah lovah H/S teacher pangngai (general teacher) tur lak tak ngialah pawh mathematics leh computer in 100 marks ve ve an han pua, ‘weightage’ an han nei sang lutuk te kha, Science student-te tan khangah te pawh khan; ‘*Arts student tan fair lo*’ han tihna te pawh kha a ri lian em em mai a. Thalaite kan tih hian, ‘tu thalaite nge’ kan tih a, ‘*aspirant*’ kan han tih, hna zawng mekte tan hian “engti hawi zawngin nge heng hi kan beiseina kan kalpui reng; MSSSB-a kan syllabus-ah khan *weightage* kan pek dan te kha en nawn a lo tul reng tawh zawk em” tih te pawh hi kan sawi ri miah lo mai a. Ka han tih chhana chu, ‘kan sawrkarin kan lo tih tawh kha kal tlangpui leh ang’ tih ngaihtuahna dan atanga rawn chhuak niin a lang ber a.

Chuvangin, vawiinniah MPSC constitutional body kan neih rengah hian thalaite hian ‘*a fair lo*’ tih vawikhat mah an la sawi rik ka hre lova. Chuvang chuan, politician te nen inhnimhnai tak maia nihna inpek theihna leh duh huna a member leh a body thiah theiha a awm theihna lai body dang ‘duplicate’ kan han siama hi sum leh pai khawhralna a nih piah lamah khan, ‘*fairness*’ kan tih, lang tlang tak mai, rinawm tak *body* kan neih sa reng thuam chak hi he sawrkarin a tum dan hi a tha ka ti tak zet a. Thalaite hmakhua kan ngai a nih chuan, vawiin hian MPSC Body function ah hian a exam conduct danah a ni emaw, a syllabus buatsaih danah a ni emaw, combine examination buatsaih chungchangah a ni emaw, departmental exam-a tlem te te, post khat lek lek exam kan conduct vak vak ang chi te, hengte zawka pawh hi ennawn ngai leh awmze nei zawk leh combined examination-a kan rinluh theih chuan harsatna awmin a lang lova. MPSC ngei te pawh an inhuam em avangin, vawiin nia resolution rawn lut MSSSB thiah chungchanga *ennawn rawtna* hi kei chuan tha ka ti lova. A kal ngaiin, ‘sawrkar ruahmanna hi tha ka ti’ tiin ka rawn pawmpui a ni e. Ka lawm e.

HON. SPEAKER : Aw, Tuichang Bialtu member zahawm tak Pu W. Chhuanawma ilo sawm ang.

PU W. CHHUANAWMA : Pu Speaker, ka lawm e.

Hei, MSSSB thiah chungchangah ‘*Sawrkar-in ennawn leh rawh se*’ tih rawtna kha ngun takin ka lo ennawn a, thiah a tulna leh thiah a tul lohna tur awm vel kha ka lo ennawn a. Pu Speaker, din a nih dan te kan hre vek tawh a. Tin, thiah a nih dan te pawh kan hria a.

Kan hriat theuh angin MoU vanga MPSC kha rei tak hnathawk thei loa a kal hnuah khan Sawrkar department hrang hrangah indaihlohna a nasa ta hle a nih kha. Tichuan, Sawrkar hmalak a tibuai hriat a nih avang khan, khatih laia Sawrkar khan *direct recruitment* (quota bik atan) post fill-up a tul dan zir Chiangtu committee a din a. Chu committee chuan recommendation a siam angin post 1000 chuang lai mai kha lak a ngai a nih kha. Tichuan, department 30 zet hnuai chutiang post 1000 chuang lak ngai kha MPSC chuan kum danga a lak let tam tak mai lak tur hna kha a nei ta thut mai a ni. Kha kha Sawrkar thar rawn dingchhuak khan thla rei lo te chhung khan a chhawktu tura tan khan MSSSB kha a ruat ta a ni. Tichuan, hetiang hna a pung hluai chung khan MPSC khan Sawrkar-in staff a pek belh chuang lo chung khan rim takin a thawk a, a la chho zel a ni; kang kha kan hre vek a ni.

Tichuan, Sawrkar thar chuan MPSC chu ‘hna thawk chak tawk lo’ a tih vang a ni ang a, MSSSB kha a din hnan ta a nih kha. Pu Speaker, din ta rau rauah chuan, an hnathawh kawng a zalenna - *functional autonomy* kha a pe chuang lova. Kan hriat theuh angin, DP&AR te nena inbe rawna thawk zel turin *attached* niin, khatianga delhkih zui a ni a; hei hian ngaihtuahna a tithui hlein ka hria. Chuvangin, a hna a thawh chhiat leh a that chu ka sawi lo ang a; tha tak tak pawh a thawk ang. Tin, a fair zia an han sawi pawh khan a dikna thui tak a awm ang. Amaherawhchu, a fair zia han sawifiah nana hnamdang pathum an lak an han sawi kha, ‘Mizo-hnam kengtu - MNF’ inti tan chuan a mak ka ti deuh a.

Ka han sawi duh ber zawk chu, DP&AR *attached* office anih avangin sawrkar nena inbe rawn zel tur an ni leh nghal a. Hei hi chu kalpui zui chi niin ka hre lo; ngaihtuahna tithuitu tak a ni. Pu Speaker, kan ram danpui duangtu te khan *spoil system* duh lovin sawrkar leh politics in a tihbuai loh tur *Constitutional Bodies*-ah awm ta Public Service Commission din a nih dan tur ram danpuiah meuh dah a ni a. Chuvangin, Mizoram-ah pawh MPSC tha tak, belhchian dawl tak hunrei tak kan lo nei tawh a nih hi. Chuvangin, Sorkar deptt. pakhat hnuai hna la tura din kha a chhuanlam ‘*MPSC hna ngah lutuk*’ pawh hei, kum 5 a liam tawh a, khata hna pung hluai, rawn pung thuta han zawh loh lai kha chu, kum 5 chhung a liam tawh chuan, a reh thawkhat tawh turah ka ngai. Chuvangin, hei hi chu kal zel chi niin ka hre lova.

MPSC hi *constitutional body* kan neih ka han belhchian chuan *democracy* in institution zahawm leh belhchian dawl tak a neih niin ka hmu a ni. Chuvangin, thuam chaka, tihchak zel hi a tawk mai lo em ni ka ti a. Govt. of India in India ram pumpui huap a Group ‘B’ leh ‘C’ hna la tura a din Staff Selection Commission leh he laia Mizoram mihring tlem te, mi 1000 vel lekin an dil thin, a population-ah pawh mihring maktaduai khat vel lek, mihring vaibelchhe tel tam tak tak awmna nena tehkhin chi a ni lo. Chuvangin, ‘engtik lai pawh belhchian dawl leh rintlak MPSC-ah hian awmin, hei hi thuam chak zawk ila’ tih hi ka rawn dinpui a ni e. Ka lawm e.

HON. SPEAKER : Awle, sawi tur kan awm tawh lo anih chuan, Leader of Opposition..... E, a ni maw? An han sawi zawh khan ‘phar an awm em’ ka ti a, ka han enkual a, kan awm si lova kan awm tawh lo emaw ka han ti mai dawn a. Tunah Tuichawng Bialtu, Member zahawm tak Pu Rasik Mohan Chakma ilo sawm ang.

PU RASIK MOHAN CHAKMA: Pu Speaker, ka lawm e. Private Member Resolution - ‘*Mizoram Subordinate Service Selection Board thiah tak kha sorkarin ngaihtuah nawn se*’ tih resolution kan sawinaah khan, hei kan sawiho rei tawh a. Pu Speaker, i ding lama thute rilru leh ngaihtuahna siam sa chu a hriat sa mai a, hei hi chu min pass-pui pawh ka ring lem lova; kan thiltih reng reng hi tan laklawh vanga ti mai niin ka hria a. Mahse, ‘chutiangin kan ti lak lawh lo e; kan titlang tho tho ang, eng ang pawhin tha mah sela’ an ti rilru em aw aw ka ti a. Chu bakah, i veilam a thu te khan number kan nei lova; mahse a pawl tur chu, a hun taka promotion hmu turte khan an tuar dawn a ni. Regularise tur te kha an overage ang a, khangte kha mi eng zah nge ni ang; ‘an damchhungin an tuar dawn’ tihna a ni a, a tuartute chuan na an ti khawp ang le.

Tin, hna hmu turte work-load tam lutuk vang khan MPSC in a hun takah an ti thei lo ngei dawn a. Tunhma experience atanga an hriat avang khan he ruahmanna hi siam mai kha a ni a. Khang te kha tute emaw sawiselna, *concrete proof* awm si lo, rinthua tang laklawh decision lak hi chu, ‘engnge mipui lam decision niang aw’ tih kha ngaihtuah tham a ni, Pu Speaker. Chuvangin, tang laklawh pawh ni sela, Mizoram mipuite thatna ngaihtuah chiana decision thlak danglam pawh hi a har miah lova. Chuvangin, he *Private Members’ Resolution* hi khawngaih takin ngaihtuah nawn sela; chuti lo chuan “mi tam tak tawrhna a thleng ang e” tih ngaihndan nei hram se. I vei lama thute resolution a nih avanga titla mai lovin, ‘min pawmpui se’ tih hi kan ngaihndan a ni. He resolution hi ka duhdan a ni e. Ka lawm e, Pu Speaker.

HON. SPEAKER : Serlui Bialtu, Member zahawm tak Pu Lalrinsanga Ralte ilo sawm ang.

PU LALRINSANGA RALTE: Pu Speaker, ka lawm e. Hei vawiin niah kan member zahawm tak Dampa Bialtu Pu Lalrintluanga Sailo in Mizoram Sub-ordinate

Service Selection Board (MSSSB) mizo thalai hna zawng mekte tan rintlak leh tangkai tak hi ‘Sawrkarin ennawn leh rawh se’, tih *Resolution* a rawn theh luh hi a lawmawm hlein ka hria a.

Pu Speaker, ka ngaihtuah a, wawiin niah pawh i ding lama thuten thiah an duhna chhan hi mumal tak leh fiah-fai tak rawn sawi an neiin ka hre lova. Research base-a kal tura insawi anni a, MSSSB hi a fair lohna, a that lohna, ‘mizo thalai leh hna zawng mekte tana a that tawh lohna hi research an nei em’, tih hi hriat a chakawm hlein ka hria a. Tunah hian Mizoram mipui thalai leh hna zawng mekte, tin, Sawrkar hnathawk hna nghet lo dah ngheh mai turte, promotion due tak takte tana he Board hlutna leh thatna hre reng chungah, opposition ina resolution an rawn move a nih avanga duh lo kan ni tlat hi a tha ber em? Kan ram tana tha a nih chuan, i ding lama mite hi Pu Speaker, ‘inennawn leh thei se’ tih hi ka thusawi tan nan ka hmang duh a ni.

Kan sawi tawh a, kan resolution rawn move-tu pawhin a rawn sawi tawh a. MSSSB din a rawn nih chhoh dan, a tobul hi chiang takin sawi chhuah a ni tawh a. Helaiyah hian han hriat tel ka chak chu - kan Home Minister zahawm tak hian 29.1.2024 khan ZPM office-a thu a sawinaah “MSSSB hi a tobul a fuh tawh lova, amaherawhchu, hna tha tak tak an thawk tih pawh kan hria”, tiin a sawi a. He a tobul fuh lo tak hi wawiin niah hian i ding lama thute hian rawn sawi chhuah tur research base-a an neih chuan document te min pein, he zoram thalai hna zawng mek leh he MSSSB chhawr tangkai tak tak tute convince thei tur hian document fel-fai tak nen han nei thei se chuan, kei pawh an lamah hian ka tang mai tur a ni a. Amaherawhchu, wawiin nia kan thusawi hi ‘kan ram thalaite tan a pawimawh takzet a ni’ tih hi ka sawinawn leh duh a ni.

Sawi tawh ang khan, MPSC a awm a, MPSC-ah hian hna lak tur tam tak te, promotion chungchangah te hna pek anni thin a. Amaherawhchu, staff leh anmahniah indaih lohna nasa tak a awm avangin zir chianna neih a ni a. DP&AR in *work study team* te siama an han zir chian hnuah an rawn rawtna chu – “MPSC te Group ‘B’ non-gazette chin laksaka, chumi latu tur chuan MSSSB din ni se” tih a ni a. Hetah hian politics a influence neiin ka hre lem lova. He MSSSB kan din hi June, 2019 niin ka hria a. Chutah covid nen boruak hrang hrang Mizoram chhungah a awm a, hna thawk tak taka function hi chu kum 3 vel chauh a niin ka ring a. Chuti chung chuan hna hi tam tak an thawk tawh a. Hna lak, contract leh regular pawh hi 240 chuang an nei tawh a ni. Tin, departmental exam te leh thil chi hrang hrang te an conduct a, hengah hian service lai tam takte hamthatna siam sakin an nihna tur, an promotion hun pangngaiyah te, tin, regular-a an dah chhoh tam takte mi eng emaw zat kan nei tawh a. Heng hi Mizoram Sawrkar hnuah hnathawk hrang hrangte tan malsawmna MSSSB hi a lo ni tawh thin a ni. Chuvang chuan, Pu Speaker, he kan ngaihtuahna hi thlak thei ila thain ka hria a.

Tin, kan mawhpuh pakhat, i ding lama miten an rawn sawichhuah fo chu – ‘sum chungchangah a hautak’ tih an rawn sawi a. He MSSSB ah hian staff 21 vel an awm a,

chairman leh member chiah hi Sawrkarin a sen belh anni. Chairman hi level 14-a dah a ni a, member hi level 13-A a dah a ni. Chutah chuan, an pension atanga an hlawh tur cut a, chutianga siam chu a ni a, a dang staff zawng zawng hi chu department atanga pawh khawm an ni a. Chuvang chuan, he MSSSB hian thla khata an sum senso, an office expenditure te leh thil chi hrang hrang pawh hi nuai khat leh tih bawr vel awrh chauh a ni. Chuvangin, sum leh pai save kan duh zawk a nih chuan, ‘MPSC thuam chak a tha lo e’, ka ti miah lo; MPSC pawh a nihna tur anga a function theihna turin thuam chak ila. Chumi a nih chhung chuan kan zoram thalai hna zawng mek, kum over tep tawhte tam tak an awm ang; tin, sorkar hnathawk la nghet si lo, nghet inbeisei kum upa tak tak tawhte an awm ang; tin, promotion kal hun tak tak tawhte pawh an awm ang; chungho tana malsawmna ni chhonzawm tur chuan ‘MSSSB hi la kaltlang chho zel thei se’, tih hi ka duh dan a ni a.

Chuvang chuan, Pu Speaker, khawngaih takin ka ngen duh chu, kan ram tan kan thalaite hna zawng mek leh a thawk mek te; hlawh beitham tak tak leh harsa taka awma nghet beisei ve te; an pension hnaih tawh lama promotion kal hun tak tak, tihfel zung zung ngaite tana malsawmna a nih leh theihna tur hian, he Sawrkar, ‘mipui-sorkar’ tiin kan inzuar ta sa sa bawka. Khawngaih takin Pu Speaker, i ding lama mite hi ka ngen duh chu, he MSSSB hi thiah kan han ti ta rup mai a, hei hi research base-a ti kan ni chuan rih loh phei chuan, la kaltlang hrih se, uluk takin mithiam zawkten la ennawnin; MPSC tihlena an zo tak tak dawn a nih chuan nakin lamah te pawh la ennawn leh mai ni ta se thain ka hria a. Chuvang chuan, i ding lama kan ruling lamte, kan rama thalaite tana thil pawimawh tak, hna zawng mekte tana thil pawimawh em em mai hi, thiat lova min ennawn sak leh hram turin ka han ngen a ni.

Chutichuan, kan resolution – “*Mizoram Sub-ordinate Service Selection Board (MSSSB) mizo thalai hna zawng mekte tan rintlak leh tangkai tak thiah tak hi Sawrkarin ennawn leh rawh se*”, tih hi min pass-pui ngei turin ka thlawpin ka rawn sawm a ni e. Ka lawm e.

HON. SPEAKER : Sawi tur kan la awm em? Aw le, Hachhek Bialtu, Member zahawm tak Pu Robert Romawia Royte i lo sawm ang.

PU ROBERT ROMAWIA ROYTE: Pu Speaker, ka lawm e. Hei, vawiinah hian *Private Members’ Resolution* pawimawh tak mai Dampa Bialtu zahawm tak Pu Lalrintlaunga Sailo-in he House zahawm taka sawihoa pass turin a rawn chhawp chhuak a.

Chu chu - “*Mizoram Sub-ordinate Service Selection Board (MSSSB) Mizo thalai hnazawng mekte tana rintlak leh tangkai tak thiah tak hi sawrkarin ennawn leh rawh se*” tih a ni a, he resolution hi a pawimawh ka ti a. Chutih mek laiin Sawrkar tharin a lo thiat thawt thawt pawh hi ennawn leh tlak a ni a. Sawi hmasakna lamah khan thil tam

tak kan ngaithla tawh a, ruling lam atang te, Pu Speaker, i ding lama leh i vei lama tang te pawhin kan ngaithla a.

Point hmasa bera ka sawi duh chu - India Constitution te kan sawi kai a, India Constitution-ah hian thil zawng zawng hi a inziak lo tih hi ka sawi duh a. He MSSSB sorkar hmasa ina a lo din hi MPSC thuneihna chhuhsakna lam ni reng reng lovin, Mizoram Public Service Commission pawh efficient zawka, a zawh china tha taka a kal theih nan appropriate authority in India Danpui hnuai thuneitu Mizoram Sawrkarin a din a ni a. Chuvang chuan, Danpui bawhchhiatna lam emaw, Danpui atanga kal penna lam hei hian a kawkw miah lo a ni. Chuvang chuan, “Danpui ina thuneihna a pek angin State Sawrkarin.....” tih hi, State dang dang zir chiangin ‘*Mainland India*’ kan tih Central India leh khung State lian zawkte phei chuan rei tak an lo neih tawh Subordinate Common Commission emaw, board mai ni lo, Specialized Subordinate Service Board thlengin State liante phei chuan an nei thliah thluah a, chu chu mi anga Mizoram kan kal chhoh ve mekna a ni. Arunachal Pradesh-in an lo nei tawh a; Tripura pawhin Joint Recruitment Board te pawh a nei a ni. Tin, tunhnaiah Nagaland in 2020 ah an han hmang chho ve tan a, Manipur pawhin 2022 ah (nichina kan Resolution move tuin a han move ang khan) an han Gazette chho ve mek a ni a.

Chuvang chuan, North East State-te pawh mi hnunga kal thin ni mah ila Subordinate Service te tana hna latu tur board bik neih hi a tul a ni tih kan hre chho mek a. Chutih laiah a let zawnga sawrkarin (nichina sawitu tena an sawi ang khan) “kalphung thar a ni a, kan tih thar a ngai a ni” tih ngawt ang chi zawng a fuh lo deuh em aw, ka ti a. Chuvang chuan, a chhawr mek tute, chhawr zel turte, tin, a lo chhawr tawhte pawhin, “thlir let teh ang u, Mizoram Subordinate Service Selection Board hianin fair lo takin hna pakhat tal a la tawh em” tih te hi kan ngaihtuah a pawimawh khawp mai. Vawiinah hian roreltu Mizoram-a rorelna sang berah hian mimal en lovang u; mimal kan en a, mimal hmingte kan lam a, hei hi tun hmaa House-a tih ngai loh thin niin ka hria a, kan ti ta zauh zauh a. Engpawhnise, kan point tihfiah nana kan hmang a nih pawhin, he House zahawm takah hian mimal hming te lam ri lo hram hram ila. He Board rules leh regulation te, a kalphung te en zawk ila; a mihring a thawkate en lovin, an thawh chhuah an *outcome*, an *output* zawk hi en ila, he board hi ngaih theihlohna chhan tur a awm lo. Kan ena te hi, en loh tur kan en avang hian Sawrkar thar hian he board hi kan ngai thei lo deuh em aw tih te thlengin, mimal hming te kan han lam rik takah chuan rilru ah a rawn lut thar nghe nghe a ni.

Chuvang chuan, State tam zawkin an tih mek leh North East State te pawhin hei kan nei kim ve tep a, North East State zawng zawngin kan neih kim ve tep laia, a nei lo han nih thar leha, a let zawnga han kal te pawh hi a fuh lo em aw, ka ti a.

Tin, “*maximum government* emaw, *minimum government* emaw...” tih lai kha member zahawm takte khan an han sawi ri a, a ropui khawp mai. MSSSB hi “sawrkar tihtetna,

government tih chakna a ni” tih kha a letling thawkin ka sawi duh a. MSSSB ah hian Minister emaw, Chief Minister emaw a inrawlh theih miah lo; file pawhin minister a thleng lova, chief minister pawh a thleng lova, an interview niin an result te pawh hi an tichhuak mai thin niin ka hria a, ka hriat dan chuan. Chuvang chuan, kan lo thlirna mit leh kan dinna tlang a fuh loh chuan, kan hmuh dan te pawh a fuh lo thei a. Sawrkar kan lo nih ve tawh chuan ZPM Party ringawt kan ni tawh lova, Sawrkar mit atangin MSSSB hi thlir a hun tawhin ka hria a, an hmuh dan a dang tawhin ka ring. Sawrkar kan nih hnuah a zir Chiangtute Siam Ila, chuta *finding* fel tak a awm anih chuan, keini lam pawhin kan support mai ang. Chutiang ni lova, *anti-establishment approach* ringawt maia Sawrkar thar hi kan kal chuan tih fuh loh palh hi a hlauhawm a. Tin, ‘in thil tihthatte chu kan support zel a ni’ tih he House-ah pawh hian, fakna thu pawhin kan sawi tam khawp mai.

Chuvang chuan, zirchianna leh eng emaw sawi tur awm si lova, hetia rawng tak maia (ti mai ang) kan Board tha tak mai hi thalaite pawhin an fak a, zirchaite pawhin an fak a, MSSSB recommend-na hnuah appointment hmute pawhin *pride* an nei a ni. Heta departmental promotion committee ten an lak ringawt ai hi chuan, chutiang chu an rules a nih avangin, khawngaih takin Pu Speaker, i kaltlang hian, kan House Leader leh kan Chief Minister te, kan DP&AR Minister zahawm tak te leh kan Sawrkar hi he thil hi ennawn hi tlawmah pawh la lovin en nawn tha leh sela, a zirchiangtu team te pawh siamin chutiang chuan he kan Private Resolution hi ngun taka kan rawn ngaihtuah Pu Lalrintluanga Sailo ina rawn put luh hi min kaltlangpui hram turin nangmah kaltlangin Pu Speaker, ka rawn ngen a ni e. Ka lawm e.

HON. SPEAKER : Awle, a lawmawm e. Member zahawm tak West-III Bialtu Pu Zaithanzama ilo sawm ang.

PU VL. ZAITHANZAMA: Pu Speaker, “*Mizoram Subordinate Service Selection Board - Mizo thalai hna zawng mek ta tana rintlak tha leh tangkai tak thiah tak hi sorkar in emaw ennawn leh rawh se*” tih hi ennawn hi tul ka ti lova, chumi thu chu rawn sawi ka tum a ni. “*Uluk takin ngaihtuah ni rawh se*” an rawn ti a; uluk takin kan sawrkar chuan a ngaihtuah a, chuvang chuan, Ni 100 chhunga Sawrkarin a tihtur zingah khan MSSSB thiah hi a tel a ni. Tuna ti thut kan ni lova, ‘a tir atanga he Sawrkar hian uluk taka ngaihtuahin he Sawrkar hian a thiat a ni’ tih hi ka sawi duh a ni.

MSSSB din hi tha kan ti lo hrim hrim a ni lo; tul kan ti lo a ni. MPSC hi ‘*a rintlak tawk; a indaih tawk*’ tih hi kan finding chu a ni. A chhan chu - department hrang hrangte han thlir ila, post ruak hnawh khah loh tam tak a awm a, sawrkar sum harsat avangin kan hnawhkhat thei lo. Chuvang chuan, MPSC hi an indaih vanglai tak a ni; hna thar lak theih a ni lo. Chuvangin, an indaihlohna chhawknawm taka MSSSB han din hi tul kan ti lo em em a ni. Sawrkar hnathawh lak zawng zawng hi chhan tha tak a awm loh chuan ‘Public Service Commission kuta awm tur a ni’ tih a ni a. Chhan tha tawh awmin

kan hre lova, an indaih a, an hna lakah pawh an fair tawk tih hi kan ngaihdan a ni; indaih lo anga sawi hi kan pawm lo. State lian pui pui pawhin Public Service Commission kutah an innghat thei a, an indaih loh em em kan hre lo a ni. Sawrkar hnathawk chu dan anga lak tur an ni. Dan (Constitution) in a phut chu Public Service Commission kuta dan anga lak hi a ni; a bak kan Constitution hian a sawi lo.

Keini aia state lian leh mihring tamah pawh Public Service Commission hian a enkawl zo. India ramah state mihring tlemna ber pawl, hna ruak hnawh khata hnathar han la tura sum nei mumal lo leh nghal kan nih avang hian, Public Service Commission hian a hna hi a tlin a, churang chuan, tha tawk kan ti a ni. Sum harsatna avangin Sawrkar hna post ruak pawh kan hnawhkhat thei lo a nih hi; hna thar lak harsat nen. Uluk taka kan ngaihtuah hian keini chuan kan indaih lai tak a niin kan hria a ni. MPSC hi an indaih em em.

MSSSB hi MPSC ang bawka rintlak niin vei lama mite khan an rawn sawi a. Churang chuan, MPSC hi a rintlak tawk kan ti a, a dang din leh kher hi, Pu Speaker, tul kan ti lem lo a ni. Tichuan, NE-a ti hmasa kan nih te hi chhuan tlakah ka ngai lova....

HON. SPEAKER : Khawngaihin; hei, kan chawhma hun a tawp a, member hi kan sawizawh tir law law dawn nge? (*House-in sawi zawh tir law law a remti a..*) Aw le, sawi zo law law rawh le.

PU VL. ZAITHANZAMA: State dang thil tih hi a that chuan kan entawn mai tur a ni; a zahthlak loh. A that loh chuan, State dangin an ti emaw, Central-in a ti emaw, Mizoram tana a that loh chuan kan entawn kher erawh a tul lo. Pu Speaker, he Private Resolution hi tlang lo se ka duh e.

HON. SPEAKER : A lawmawm e. Hei, chawhma hun kan zo ta a, Leader of the Opposition in sawi duh a neih chuan thusawina hun te kan la hawn sak dawn a. Tin, a concerned minister DP & AR changtu Pu K. Sapdanga leh kan House Leader te pawh kan la sawm dawn a. Chu chu chawhnu ah kan ti ang a, tunah chuan kan chawl rih ang a, chawhnu dar 2:00 ah kan thukhawm leh dawn nia.

(*Recess*)

2:00 PM

(*Hon. Dy. Speaker in Chair a la a..*)

HON. DEPUTY SPEAKER: Awle, kan Business kan chhonzawm leh tawh ang a. Kan memberte atangin thusawi tur ilo ding chhuak ang u. A hmasa berin Pu Lalchhuanthanga Aizawl South-II bialtu thusawi turin ilo sawm ang u.

PU LALCHHUANTHANGA: Pu Dy. Speaker, ka lawm e.

Hei, rorelna khawlah hian kan thu a, rorelna te kan nei a. Heta kan hriat tur pawimawh tak nia ka hriat chu - *kan dinhmun* hi a ni. ‘Kan dinhmun hi i hrechiang ang u’ tiin bul ka han tan duh a.

Mizoram state te reuh te, population pawh nuai 13 emaw lek awmnaah hian MPSC changtlung tak kan nei a, a tawk viau a ni. An lo indaih lo deuh a nih chuan department dang ang tho khan staff te pawh lak belha han tihchangtlung chhoh theih zel a ni a. Chuvang chuan, MSSSB kan neih lai mek kan han thiat te pawh hi thil tihawm tak niin ka hria a. Hetiang inkaihruaina, inrelbawlina hrang a awm hian chuan sum tam tak a ei thin a. Keini ZPM kan lo sawrkar ve theihna chhan hi chu - ‘kalphung thar, mipui-sorkar’ a ni a. Chu chu mipui ten min beisei vanga he Sawrkar hi piang a ni. Kum tinin budget kan pharh thin a, kan budget-ah hian 80% te, 85% te hi chu sawrkar hnathawk hlawah te, sawrkar-hna inrelbawlinah te leh pension-ah te pawisa a kalral thin a, 15-20% awrh chauh hi mipui a thleng thei chauh a ni.

Chuvang chuan, keini sawrkar chuan *inrenchemna* kan ngaipawimawh dawn a, tuna kan kalphung hei lo pawh hi tihdanglam ngai tam tak a awmin ka hria. Department inrelbawlina lian tak tak, thawh chhuah nei mang si lo te kha a awm a. Department thenkhat chu hmunkhata dahkhawm a, amalgamate te pawh a ngai mai thei. Chutiang chu kan dinhmun a ni a. Chuvang chuan, kan Sawrkar hi kan inrenchem loh chuan, *mipui-sawrkar* hi a thleng thei dawn lo niin a lang a. Theih ang tawk tawka kan inrenchem zel hian kan budget te hian mipui a thleng ve thei dawn chauh a ni. Chung chu hriaa kan Sawrkar-ina MSSSB a thiat ngam te hi a lawmawm ka ti a, heng lo pawh hi hmalakna tur tam tak te chu a la awm awm e. Tichuan, Dampa Bialtu zahawmtak khan ram mipuite hmangaihna avang pawh hian a private resolution hi a withdraw thei zawk lo em ni aw, ka ti a ni.

Tichuan, tun kan dinhmunah hian MPSC hi a tha tawk a, kan Sawrkarin MSSSB a lo thiat hi tha ka ti a, ka support a ni. Ka lawm e.

HON. DEPUTY SPEAKER: Sawi tur dang kan la awm em? Pu K. Laldawngliana, Tuirial Bialtu MLA i lo sawm ang.

PU K. LALDAWNGLIANA: Pu Speaker, ka lawm e.

Vawiina Private Resolution, kan MLA zahawmtak Pu Rintluanga rawn present “*Mizoram Subordinate Service Selection Board (MSSSB), Mizo Thalai hna zawng mekte tana rintlak leh tangkai tak thiah tak hi sorkarin ennawn leh rawh se*” tih sawi khawmna hun tha tak kan nei hi lawmawm ka ti hle mai a. Kan thusawite ziak hian ka lo chhinchhiah a, ka lo ngaithla a, ka theih ang tawkin ka lo zir Chiang ve a.

Ka hmuh dan chuan, Sawrkar hmasain hma kan lo lak tawhna a nih avanga zir chiang lutuk lova *thiahna order* a ni deuhin ka hria a. Chuvang chuan, tun hunah hian a aia chianguang deuh hlek, a thatlohna te emaw, a fel tawk lohna te emaw zir chian deuha, chutiang te chu awm si lova thiah ringawt hi ‘ennawn a ngai a ni’ tih vawiinah hian a chiang hlein ka hria a.

A chhan chu - thiah duhna chhan hi ka han zir ka han zir chian hian, hna lak chungchangah hian ‘a fair lo e; a tha lo e’ tih sawi tur mumal, document kan nei chuang bawk si lova. Interview-ah emaw, written result an tih chhuah atangin emaw ‘a that lohna kan hmu’ tih a awm chuang bawk si lova. Chuvang chuan, Sawrkar hmasain an lo tih tawh hi, nichina Member zahawmtak ten an rawn sawi kha, “hei vang hian kan sawrkar phah a ni” ti khan an rawn sawi deuh a; a ni chiah em aw ka ti a. Kan thalai rual an awm teuh mai a, hna zawng mek thalai rualte; ‘hei vang hian sawrkar thar hi a din phah em aw’, tih hi ngaihtuah tham a niin ka hria a. MPSC hi a tha kan ti a, a rintlak a, a rinawm bawk a ni. Chutiang bawk chuan, MSSSB pawh hi a tha a, a rintlak bawk a; ‘an hnathawh insem-zaina a ni’ tih hi ram mipuite pawhin kan hriat hi a tulin ka hria a ni. A chhan chu Group ‘B’ Officer chin hi MPSC in uluk takin leh sawisel bo khawpa rintlak in hna an la a; a hnu lam zawng kha MSSSB-in an la a ni. Chuvang chuan, thil tha lutuk kal lai mek kha *kalphung-thar* kan tih avanga han thiah ringawt hi a dik ber em aw? Chuvangin, vawiinah hian “*ennawn ni rawh se*” han tih hi ka support hle mai a, a tul pawhin ka hria a ni.

Pate’n ro an han rel sual deuha fate’n min han zilh chang pawhin, ‘ka pa, min ngaihtuahnawn leh teh a’, han tih chang a awm ang chiah hian, tuna resolution lo siam tawh cancel-na hi fate’n ngenngawl takin, ‘hei hi chu uluk leh zual deuhin; zirchiang lovin thiah tak tak a ngai em; engnge a fel lo lai’ tih hi zirchiang turin kan ngen nawn leh duh a. A fair lo lai sawi tur kha kan hre chiah lova, a sum leh pai kha senso a tam ti dawn ila, deputation-in an la deuh vek bawk si a. Chairman leh member pawh kha pension tawh, an hlawh an lak bak tlem tih chauh kha a ni bawk sia, sum sen pawh kha tam vak lo a nih hmel a. Chuvang chuan, MPSC-in hna tamtak an nei a, thawh zawh sen loh, lak sen loh, duh anga tih hman loh tam tak an neih laia hna pek belhchhah khan an thatpui ang em aw, tih kha ‘zirchian deuh chu ava ngai em ve aw’ ka ti a ni.

Kan thutna hmun te a danglam avang hian rilru te hi alo danglam mai mai thin emaw ni aw, ka ti deuh a. Helaiia kan thut tawh hi chuan ram tana tha tur a nih chuan full support inpek mai tur niah ka ngai a, a tha lo tur a nih chuan kan ngaihtuah tlan zel hi a tulin ka hria a ni. Anihna takah chuan ‘research base in kan kal ang’ an ti a, Ni-100 chhunga tih tur kha sawrkarna an lak ve leh khan an puang nghal kha a ni a, a hmam kan lo research vek tawh a ni maithei a, ka hrechiang chiah lova. A thut pawh thut hma hauh, ro pawh rel hmaa han puan zingah khan a lo tel bawk si a; lo puan tawh a nih avanga order chhuah a lo nih palh takin, he resolution hi khawngaih takin pa te innihna angin min ennawn sak hram turin ka rawn ngen che u a ni e. Ka lawm e.

HON. DEPUTY SPEAKER: Sawi tur dang kan la awm em? Pu Jeje Lalpekhlua, South Tuipui Bialtu MLA ilo sawm ang u.

PU JEJE LALPEKHLUA: Pu Speaker, ka lawm e. Private resolution rawn pu luttu Pu Lalrintluanga Sailo, Dampa Bialtu-ina MSSSB thiah ennawn leh tura a rawn tih hi; kha, a din dan te kimchang takin kan han hria a. Khang te han ngaihtuahin kei chuan, “Sawrkar-ina thu a lo dah tawh hi kaltlang pui ni se” tih kha ka thlawp a. Tin, Mizoram State Sawrkar hnuaiiah hna hrang hrang fair taka latu tur - Mizoram Public Service Commission (MPSC) hi India Constitutional Article 315 hnuaiia din a ni a, Sawrkar pawhin a va thunun theih loh, *autonomous* taka function a ni a. Keini chuan, MPSC ngeiin sawrkar-hna a lak zel hi a him berin kan hria a. MPSC hi *constitutional body* anih angin, Mizoram Sawrkar hnuaiiah hna hrang hrang, sang chuang fe hi fair takin alo la tawh thin a, a la mek zel bawk; a hming pawh a tha thin viau. Eng Sawrkar hnuaiiah pawh, sawrkar va inrawlh mai mai theihna leh chairman leh member-te pawh ‘sawrkarin a duh duha ava ban mai mai theih ni lo *constitutional body* a ni tlat’ tih hi vawiinah kan sawilang duh a.

Mizoram sawrkar hi lian tak a ni lova, state dang ngaihtuaha sawrkar-hna lak tur pawh ngah tak ni lo kan ni tih vawiinah helai House zahawm taka lo kalte chuan kan hrechiang viauin ka hria a, hei vang hian *constitutional body* nei MPSC ngeiin hna a lak hi keini chuan kan thlir pawhin ka him ber kan ti a. Tin, Pu Speaker, i veilama thute’n an lo sawilan state dangte nena kan han in compare-a MSSSB nei tawhte an han sawi khan kan inlen hleih ziate leh sawrkar-hnathawk anniah chuan a ngaih tam zia te kha an thlir lo em maw ni chu aw, ka ti a. Kan State len dan te, sawrkar-hnathawk tam zawng te kha han thlir Chiang leh sela chuan, Sawrkar-ina MSSSB a thiah te pawh hi a lawm ber tur zawk an niin ka hria.

Tin, Mizoram Sorkar sum leh pai dinhmun tawn mek kan hria a. Sum thawhchhuah tih tham kan neih ve loh avangin Sawrkar leiba pawh a sang zel a, hetiang kan dinhmun a nih mek laia kan *constitutional body* neih ve leh kan chhuanvawr MPSC ring tawk lo ang maia hna latu board hran din hi keini chuan a fuhlo kan ti takzet a ni. Kan sum leh pai dinhmun, state dangte ngaihtuaha sawrkar-hna kan lak tam loh dan te en pawhin, kan dinhmun nen pawh MPSC kuta hna lak tur dah hi ala tha tawk hlein kan hria. MPSC hian hna lak tur a ngah deuh chang pawha hnehsawh leh chak zawka hma an lak theih nan, an indaih lohna lai emaw, thuam chak an ngaihna lai zawkah hian Sawrkar hian ruahmanna fel tak nei lo sela he MSSSB hi a thiah mai a rinawm lova.

MPSC hi politics tui-nu in a pawlh ve mai mai theih loh *constitutional body* anih angin ka dinna nghet tak leh kan ram tana pawha tha ber niin ka hria a, hna latu tur dang board hran neih hi a la hun lo hlein kei chuan ka hria a ni. Vawiina private resolution kan House member zahawm tak Pu Lalrintluanga Sailo ina ennawn leh tura a lo sawi kha,

kei chuan ‘sawrkar-hmalakna kal tawh hi kaltlang pui ni se’ tih kha ka rawn sawi duh a ni. Ka lawm e.

HON. DEPUTY SPEAKER: Pu H. Lalzirliana, Mamit Bialtu MLA ilo sawm ang u.

PU H. LALZIRLIANA : Pu Speaker, ka lawm e. Vawiinah Member zahawm tak Pu Lalrintluanga Sailo resolution putlulh “*Mizoram Subordinate Service Selection Board (MSSSB), Mizo Thalai hna zawng mekte tana rintlak leh tangkai tak thiah tak hi sorkar in ennawn leh rawh se.*” tih a rawn lut hi ka thlawp a, tih hlawhtlin ngeia tan pawh ka duh a. Vawiinah hian a rawn dinchhuah dan te kan han sawi a, a *who’s who* lam hi kan interest lutuk turah kei chuan ka ngai lova, a rawn dinchhuah dan hi kan minister-te zinga mi tu emaw pa-pakhat zing tho fuhina a rawn phuah chhuah mai mai a ni lo; Dan-ina a phal ang leh past experience atanga kan lo chhut tawh leh state dangte pawhina tangkai taka an lo hman, zirchianna base atanga lo puakchhuak a ni a, *who’s who* lam kha chu tu pawh lo ni sela. Ruling party, i dinglama mite khan kan sawi fo thin, ‘research base-a kal thin kan ni e’ an ti a. Hmunphiah leh MSSSB hi chu research an la beih zawh chian vak loh a ni mai awm mang e ka ti deuh a.

Hei, vawiinniah hian kan han sawi ang khan, he Board hi State te leh Central Government pawhin hetiang tih theihna tur atana forum pawimawh tak Board an siam thin hi a ni a. MPSC dah-hniam tumna leh va chuhpuina lam ni lovin, MPSC dah-chungnungna zawk leh dah-hlunglangna zawk niin ka hria a. MPSC ah hian officer chin zawng zawng mumal tak leh fair taka lak anni a. Chumi a hnuailam lakna tur promotion ang chi te leh eng eng emaw kan han sawi tawh ang khan, thil kaihhnawih tam tak, hna thar lo pawh a awm a. Chungcho chu ‘he Board hian lo enkawl ve se la’ tih hi a kalpui a ni ber a; chu chu a pawimawh a. Department tam taka departmental promotion ang chi te leh thil dang dang khawih hman loh leh tih hman loh a tam em em a ni. Kan sawi ang khan, ‘past experience atanga he idea hi rawn chhuak a ni’ tih kha vawiinniah hian ka ha sawi duh a.

Hei, kan resolution puluttu hian ‘ennawn leh ni se’ tih hi a rawn putlulh chhan a ni a. Heti laiah i ding lama thute, ZPM chauh an nihlai a an view leh Sawrkar annih tawh hnu a an view, an mentality kha tlemin a inthlak turah ka han ngai a. Heti lai, ZPM chauh annih laia an research kha, Sawrkar annih tawh hnuah a hmantlak vek loh mai thei a ni. Chuvang chuan, sawrkar an nihna leh an party nihna nen khan he research hi han bei tha leh se la. Chutah chuan Mizo mipuite leh thalai, a bik takin hna zawng mek, *aspirants* te tan hian a va hlu leh zual dawn em! Vawiin niah hian kalphung tha-mi kan duh a, *maximum governance* kan duh. Chu chu heng Subordinate Selection Board kan siam te hian a-*maximum governance* lai chu a keng hle a ni lawm ni, tih hi ka ngaihdan a ni a.

Tin, a sum involves chungchang te kha chu an sawi kan hre tawh a. Arawn kalphung leh arawn pianchhuah dan kha tute emaw *vested interest* lam nilovin, *past experience* kan neih tawh te, constitution-in a phal ang te, State changkang zawk te leh hmasawn zawk te dinhmun entawna tih a nih avang hian, hei hi mumal zawka research bei leha han ennawn leh hi a sualna a awm em maw ni le, tih hi vawiinniah hian karawn dinchhuahpui a ni a.

Hei, kan thalaite'n tunah chuan thiah a lo nih tak si ah chuan, MSSSB hnalak ang chi ho kha a lo awm dawn ta lova, tuna hna zawng mekte rilru a buai hle a ni. Engtiangin nge MPSC hian syllabus leh question awmdan arawn kalpui dawn hriat a la ni si lova, a framework mumal tak emaw, syllabus felfai tak thalaite tana update sak te hi a tul em em dawn a ni. Tunah hian *cross road*, junction-ah an ding mek a ni. Question pattern tur pawh a nihna takah chuan MSSSB question pattern hi a changkanga, Central lama Staff Selection Commission zulzui deuh veka siam te pawh a ni an ti deuh a. Tin, miin in prepare-na tha tak hnuaiah lo phei chuan inziah tlin pawh a har hle niin an sawi a; a hnalak dan pawh hi a fair thawkhat hle a ni. Chuvang chuan, kan thalai hna zawng mek - *aspirants* te hian he MSSSB hi an hmang tangkai a, 'la awm zel se' tih pawh hi an duh a nih ka ring a. Chuvang chuan, han research leh hlek a, han ennawn leha; a tul ta ngang a nih chuan, han thiah rawp te pawh a sualna a awm dawn em ni, tih hi vawiinniah hian ka han dinchhuahpui a ni e. Ka lawm e.

HON. DEPUTY SPEAKER: Sawi tur dang... Aw, a pharna a rei tawh riau a; Pu F. Rodingliana, Lengteng Bialtu MLA ilo sawm ang u.

PU F. RODINGLIANA, HON. MINISTER: Pu Speaker, ka lawm e. Hla thu pakhat ka rilruah a lo awm a; "*Hun kha leh chen min kaihruaitu, hrelo hian maw ka lo vakvai*" tih hi. Kha leh chen min kaihruaitu kha kan lo hre lo em maw ni aw, ka ti a. MPSC tha tak kan neih laia hetiang han rawt hi a chi loh angrengin ka hria a.

'In ennawn lo em maw ni le' a ti a. Hei, Policy Drafting Committee ah hian a hmingin Vice Chairman-in kan hotute'n min dah ve a; kan ennawn zin poh leh thiah a ngaiin kan hria a. A chhan chu, hei, kan House Leader hian a sawi a, "keini kan sawrkar hunah chuanin MPSC kutah hian a tam thei ang ber hna kan dah ang a; chu chu kan ram thalaite tan a tha ang a, kan party tan a tha ang a, a minister-te pawh an hahdam ang" tih sawi a ni. Hemi chungchang kan sawi pawh hian, chu chu kan sawi dan a ni.

Vawiin nia kan khawvelah hi chuan kan thalaite an beidawng em em mai a. A thiam zawkte hnawlin an awm a, a *tinglote an tlinna khawvel* a ni a. A tling zawkte tlakna khawvel hi keini chuan thiah kan tum a. Hei hi a dik tak chuan, chhawm ila, kan tan a tha zawk mai thei. Amaherawhchu, kan Leader-in helai kan sawi laia a sawi chu, "Hetiang reng reng hi keimahni hian kan tawng ve a nih pawhin keimahni zawk hi kan inven a ngai", a ti a. 'Chumi, khami in zir lo em ni' an tih kha, vawihnih - vawithum he

Board hi kan sawiho tawh a ni, *policy* lamah te pawh. A chhan chu, keimahni lam a misuse theih a nih tlat avangin.

Nichin khan an sawi a, ‘a hnalak danah te a tha’ an ti a. Ni e, ‘a tha’ ti leh ti lo kan awm a. A lak dan lai takah chuan a tha a ni mai thei a, a lak hma dan zawk te pawh kha tha lo kan ti a. Chutih rual chuan, Pu Dy. Speaker, thil pakhat lek - He hna lakna turah hian ‘*kum thum tling lo*’ tih kha an rawn sawi a. Kum thum tling mang lo chhungin hna 3014 an la hman a; ‘hei hi Sawrkar hian a ennawn em aw’ tih ka rilruah a lo awm a. Hna lak theih tawh loh, ‘Sawrkar kan harsa’ tia kan sawi kan sawi laiin Covid lai a lo ni a, ‘2019’ ti khan kan ngaithla a. 3014 lai mai han lak kha chu, a pui tham khawp mai ka ti! ‘Khangah khan tute nge an lak ang’ tih ka rilruah a lo awm a. ‘A thiam ber te lak an ni em; a tling ber te lak an ni em’ tih lai hi kan thalaite *zawhna* a ni.

Chuvang chuan, keini ZPM-ina helai kan sawiho lai pawh hian, ‘kan thalaite no. 1 ni rawh se; politics inrawlh hi kan ram in kan zo lo’ kan ti. Chuvang chuan, he Board hi kan tan chuan thiah loh pawh hi a tha a, amaherawhchu kan thalaite leh kan ram kal zel tur avang zawk hian, kan sawrkar hma atangin thiah kan rilruk tawh a ni. Chu chu ‘in ennawn lo em ni’ an tih kha, ‘kan ennawn apiangin thiah ngai kan ti’ tih kha ka han sawi duh a.

Tin, nichin khan, ‘*a langtlang*’ a ti a, kan House zahawmtak member, Pu Rintluanga khan. *A langtlang* lai kha tha lo kan ti a. A chhan chu, an thlirna lam atangin a langtlang a, khami *langtlang* khan loop-hole a siam tlatin kan hria a ni. Khalai *langtlang* lai kha keini chuan tha lo kan ti a. MPSC ah chuan langtlang lovin, a ni ah te a chhuak nghal tawp tawp thin a; khatiang kha tha kan ti a. Khatiang khan langtlang lovin, dik takin hna a kalpui thin. *Dan* hmang a roreltu an awm a, heng hi rin mai tha kan ti a. He resolution han putlul hi anni lamah hian a lo chhuak laklawh hi vanduai an intih ka ring a; an rilruah awm lo pui te pawh an sawi a ni mai thei a. Chuvang chuan, vawiinniah hian hei hi pawm loh mai a thain ka hria a, ka rawn rawt thar leh a ni e.

HON. DEPUTY SPEAKER : Sawi duh dang kan la awm em? Lt. Col. Clement Lalhmingthanga, Champhai South bialtu ilo sawm ang.

LT. COL. CLEMENT LALHMINGTHANGA: Pu Dy. Speaker, ka lawm e.

Hei tuna kan khel mek hi MSSSB chungchang a ni a. Heta kan House zahawm tak Member Pu H. Lalzirliana khan hmunphiah chungchang a rawn sawi zauh a. Hei hian hmunphiah pawimawhzia a rawn tilangin ka hria a; ‘kan sawrkar hian phiah tur kan lo ngah hle a ni’ tih kha a rawn tarlangin ka hria. Hei, MSSSB chungchangah State dangte nena han khaikhin chuan, state dangte nen a population-ah hian khaikhin chi kan ni ve lova. Central-ah UPSC a awm a, UPSC hnuaiah SSC a awm a. Chumi hnuaiah chuan

candidates nuai 12 bawr vel kum tin an awm ang a ni a, chungho select tur chuan body hran SSC chu a awm a ngai a, chuta total vacancy erawh 7,000 vel a ni a.

Kan state-in MPSC kan neih, *constitutional body* dik tak mai hi a indaih lohna a awm a nih chuan, thuam that mai ni se la. Tin, State dang te kan han sawi a; Pu Dy. Speaker, I vei lama thute ina state dang an han sawi te, North East ngei ngeia state dang ho, state lian lo Meghalaya ang te pawh 35,00,000 vel an lo ni a, chutih laiin keini chu 12,00,000 - 13,00,000 vel bawr chauh kan la ni. Chuvangin, keini chu MPSC hian min la awi zo em em a ni.

Tin, MPSC indaihlohna, a problem lian ber nia hriat thin chu, exam hall leh staff indaihlohna a ni. Tin, exam hall-ah hian school, college-te a ruah hun nghah a ngai thin a, heng exam hall indaih lohna te hi chu district headquarters tinah hian sem zai mai ni se. Leh lamah chuan keini thingtlang lam bialte phei chuan kan bial district headquarters-ah te exam centre te rawn dah se, Aizawl-a an phurrit lo chhawk zangkhai kha kan chak em em a ni. Chuvangin, MSSSB a hran a neih aiin heng kan sawi tak MPSC indaihlohna te hi chu thuam that zawk ni mai se a that zawk a rinawm.

Tin, MSSSB din hi office hranpa neih a ngai a, chutah chuan accommodation hranpa a awm a ngai. Tin, a staff-ah te, an salary-ah te ‘eng tham a su lo’ kan ti anih pawhin, anmahni motor hman tur leh engkim kha thuam ve vek a ngai tho a. Tin, MSSSB thiah a nih chuan sum tam tak kan save thei dawn a ni. Kan member, i vei lama thute ina an sawi, an rawn appeal - MSSSB a fair zia sawi nana hnam dang pathum an lakte kha an rawn hmang lek lek khan a hriat a, a va fair lo letling zawk em aw, kan thalaite tan hian. Khatiang te a nih phei chuan, kan Mizo-thalaite tan a fair lovin, a hlauhthawn awm zawk awm mang e, tih te min ngaihtuah tir lek lek a.

Tin, a hrim hrimah hei hi kan sawrkarin policy-a a lo neih tawh a nih avangin, hei hi han sawi nawn vak emaw, han ennawn leh vak emaw a ngaihna tur awmin ka hre lo a. Chuvangin, kan thalaite hamthatna tur ngaihtuahin tuna kan discussion mek, “*he MSSSB chungchang hi ngaihtuah nawn leh ni se*” tih an rawn put luha hi, keichuan ka thlawp lova Ennawn a tul lehna hi kei chuan ka hre lova. Chuvangin, tun sawrkarin a lo ruahman tawh, *Sawrkar Policy* a nih tawh avangin hei hi ennawn leh tulin ka hre lo a ni e. Ka lawm e.

HON. DEPUTY SPEAKER: Tunge sawi leh ang le? Tunah Pu Dr. Lorrain Lalpekliana Chinzah, Lawngtlai East Bialtu ilo sawm ang.

DR. LORRAIN LALPEKLIANA CHINZAH: Pu Dy. Speaker, Private members’ resolution, Pu Lalrintluanga Sailo ina a rawn thehluh “The Mizoram Subordinate Service Selection Board, Mizo-thalai hna zawng mekte tan rintlak leh

tangkai tak thiah hi sawrkarin ennawn leh rawh se” tih discussion neihna hun tha tak min pek avangin, a hmasain lawmthu ka sawi a ni.

Hei, kan sawrkar-ina Ni-100 chhunga a tih tur a tarlante zinga mi MSSSB thiah a ni hi a lawmawm ka ti a, vawiinniah hian lawmthu ka sawi a. Tin, kan sawrkar hmalaknaa kan policy zinga pakhat - *austerity measures* kan kalpuinaa, MPSC awm reng laiin MSSSB a han awm a; sum thla khatah ₹10,00,000 bawr vel a a han kal zelna kan han thiat te pawh hi austerity measures kan kalpuinaa kan policy tihlawhtlinna zel niin ka hria a, a lawmawm hlein ka hria.

Tin, kan vei lama thute ina MSSSB a rinawmzia te, a fair zia te an han sawi a. Amaherawhchu, keichuan a fair lohna tlem han tarlan ka duh a. Thil reng reng chu, a bul thut a fuh loh chuan, thil dangah a fuh thei lo a ni. In sak pawh a foundation a that loh chuan, a chung pawh mawi hle mahse, khua reiah harsatna a tawk thin a, a chim hial thin a ni. Hemi MSSSB Board Chairman leh Board Members an inruatnaah pawh hian thil fair tawk lo a awm a ni tih a lang a; party pakhat-ina an adviser ni mek lai hmanhmawh taka an inban tir a, ni reilo te chhunga chairman atana an han ruat te hi thil fair lo tak niin a lang a. Tin, tute emaw ina *vested interest* an neih avanga hetiangah thil ti te pawh ti niin a lang a ni.

Tin, MPSC constitutional body *bypass*-na hmanrua pakhat niin ka hre bawk a. MPSC kaltlangin hna tam tak lak a lo ni thin a. Tin, kan phak tawkte pawhin kan han zir ve a, kan han zawt kual ve a. Chutah chuan, kan MPSC te hian hna tha takin, hneh takin, ‘tlin takin an thawk thei a ni’ tih hi kan zir vena leh kan zawh kualnaah te pawh kan thu hriat a ni. Chuvang chuan, MSSSB han awm zel pawh hi a tulna ka hre lo a ni.

Tin, hna lak chungchangah, ‘an muang deuh thin’ tih te pawh sawi a awm thin a. Amaherawhchu, kan hriat theuh angin, MPSC hnuaiah hian examination hi stage thumin evaluation kalpui thin a ni a, a fair hle a; tihsual palh, ensual palh te avanga dik lo taka result puan a awm dawn lo hle tih a chiang hle a ni. Khang *three stages-evaluation* avang te pawh khan hun te pawh a duh ve deuh ang a.

Tin, kan han hriat zel danah chuan, hna 1000 chuang vawi leh khatah lak tur a han awm thut a, khatah khan recruitment calendar te pawh neih a lo ni lova, siam a lo ni lova. Vawi leh khata khatianga nasa taka hna han lak tur a awm thut khan duh angin an rang thei lo chauh niin a lang a. Chuvang chuan, kan MPSC hi kan thum thata kan tih chaka, an resource te pawh a tul anga kan peka, recruitment calendar te pawh siama, khatiang hna-ruak a awm apianga tih tir zel ni lova, mumal taka recruitment calendar te kan siam sak thei chuan, harsa lovin hna an thawk thei dawn a ni.

Tin, Pu Deputy Speaker, kan Governor zahawm takin a speech-ah khan, “*I must be cruel to be kind*” tih kha a sawi a. Vawiinniah hian MSSSB kan thiah hi thalaite tan chuanin

a *cruel* viau mai thei; amaherawhchu, nichina kan sawi tak ang khan a board member kan dinnaah te, he body kan kalpui danah te leh tin, hei hi constitutional body a ni lova, full-autonomy nei pawh a ni lova. Tute emaw thuhnuaia a awmna ni te pawhin a lang a ni. Chuvang chuan, vawiiniah hian he kan sawrkar thil tih hi cruel angin lang mahse, nakina kan hlimna tur, kan damna tur, kan thlamuanna tur a ni dawn a ni.

Pu Dy. Speaker, vawiin nia Pu Lalrintluanga Sailo, Member zahawm tak resolution – ‘MSSSB thiah chungchanga ennawn’ tih hi kei chuan ka support lova, hetiangka kan sawrkar hmalakna hi ‘ka support a ni; ka pawm a ni’ tih ka sawi duh a ni e. Ka lawm e.

HON. DEPUTY SPEAKER: Sawi duh dang kan la awm em? Aw le, Pu B. Lalchhanzova ilo sawm ang.

PU B. LALCHHANZOVA, HON. MINISTER: Pu Dy. Speaker, ka lawm e.

Vawiin ni-ah “Mizoram Subordinate Service Selection Board (MSSSB) Mizo thalai hna zawng mekte tana rintlak leh tangkai tak thiah tak hi ennawn leh ni rawh se” tih kan han sawi a. He Resolution hi mimal ang pawhin ka ngai pawimawh a; nimin lam atang te pawhin kan lo chang a, arawn puluttu lam inpuahchahna te kan lo thlir a, thuawih takin an resolution putluh chungchanga an thusawi te kan lo ngaithla a. Pu Dy. Speaker, rei vak lo atang khan i vei lama mite thutna saw a ruak deuh huai reng mai a, an inchhir leh deuh nge ni ang a; ‘kan pulut ngawt mai a, pawn lamah sawn i va rel tha leh teh ang u’ an ti nge ni ang a. Opposition Leader Pu Chhantea thutna pawh saw a ruak rei viau-in ka hria a. Ka han thlek deuh thin a, a hnu fe-ah khan a rawn lut a. Pu K. Hrahmo te, Pu C. Ngunlianchung a te, Dr. K. Beichhua te ho erawh chu a resolution neitu pawh ni lo kha, thuawih deuh khan an awm reng mai a.

Kan han sawiho chho zel a, Pu Dy. Speaker, heta a Resolution thu hi ka han chhiar ka han chhiar thin a, ‘*Thalai hna zawng mekte tana rintlak*’ han tiha, ‘thalaite’ tih hming hrim hrim hmang hian kan au hla te hi kan hmang nasa em em a, ‘thalaite hmakhua hi kan ngai tak tak em’ tihte hi ka lo inzawt ve nasa thin khawp mai a. Nikumah MLA kan inthlang a. ZPM Party chuan India ram football-ah pawh langsar tak mai Pu Jeje Lalpekhlu a seat a pe a. Pu Dy. Speaker, i vei lama mite hi chuan “Pu Jeje hian Assembly-ah football bak sawi tur a hre dawn em maw ni; football a pet dawn em ni” te an ti a, thalai an han kah vel thin dan te khan ka rilru hi a tina ve viau thin a. Pu Jeje chu a han ding a, a thusawi ropui zia te, Indian Article 315-na lam chhuaka, fair tak maia hna lakna a MPSC rintlak zia a rawn puang chhuak te kha a ropui ka ti a. ‘*Thalaite*’ tih hi kan hmang thla zen a, MLA seat pek leh hetiang opportunity an chan dawn erawh chuan, ‘kan beng-per leh zel thin em’ tih hi ka ngaihtuahnaah hian a awm thin a.

Tin, Pu Dy. Speaker, nikum lama kan han campaign khan kan House Leader Pu Lalduhoma hian MSSSB thiah a nih tur thu hi chu a aupui nasa lutuk. Vawiin ni kan

sawrkar hnu chauha, thiat tura ngaihtuah chiang loa ti hi kan ni lo a ni. A fair loh dan eng eng emaw House-a han sawi ngawt rem si lo kan hria te pawh a ni ang. Kan thalai zawng zawngte pawhin uluk takin lo thir se ka duh a; hnaa lak kan nih dan te, exam kan tlin dan te reng reng hi; a board kha a san poh leh, a hlu a ni. Chuvang chuan, MPSC hnuaia tling nih te pawh hi khawvela kan awm chhung hian a hlu ve hrim hrim. Chu MPSC chu tichak ila, rintlak a nihna hi vawng nung zel ila. Political ruling party kan nih avanga kan va control theih emaw, langsar mang si lova kan va penetrate theih eng emaw din thar ang chi hi chu tha ka ti lova. Hna lak hi fair se, rintlak se la; chutiang chu kan ram kal zel nan a thain ka ring a.

Tin, Pu Dy. Speaker, kan House Member Pu Ramthanmawia khan MSSSB rintlak zia a rawn sawinaah khan example-ah an nau pakhat exam-naa mark hniha a fail thu kha a rawn sawi a; kha kha chu a rintlak zia argument ang tur zawng niin ka hre lova. A tling lo kha a ni ve mai a. Kha vang khan, kan thil din reng reng te hi rintlak taka a kal theih nan vawiin nia Pu Lalrintluanga Resolution rawn putluh hi pawm tha ka ti lova, thiah a nih tak ang hian, thiah ni zui se la. MPSC hi rintlak taka nihna vawng nung zelin, ‘thalai hna zawng mekte tan he MPSC hi thuam chak ni rawh se’ tih hi ka rawn din chhuahpui e. Pu Dy. Speaker, ka lawm e.

HON. DEPUTY SPEAKER: Aizawl West-II Bialtu MLA Pu Lalnghinglova Hmar ilo sawm ang.

PU LALNGHINGLOVA HMAR, HON. MINISTER: Pu Dy. Speaker, ka lawm e.

Vawiin niah hian MSSSB chungchang kan sawi a. He thil hi ZPM Party hian a lo aupui rei tawh hle a ni; Tun hnaia chawpchilh taka ti a ni lova. Keimah ngei pawh ZPM a ka luh hmawin vawi tam an lo aupui tawh a. Nichina sawilan tawh ang khan, policy-ah pawh an lo khel tawh thin a ni.

Pu Dy. Speaker, i remtihnain kan Chief Ministerial candidate ni thinin campaign hun laia a thusawi April Ni 9, 2022 ah khan Lengteng Bialah khan chiang takin a sawi a. Ka lo research ve a, tuna record ka neih ah hian February Ni 1, 2023 (kum khat liam ta) ZPM kan sawrkar hma khan Chanmari Hall ah he ti hian a sawi a – “Sawrkar hna lak reng rengah MPSC chuan dik taka an lak theih nan hma kan la dawn a, kan thuam chak dawn a ni. MSSSB hi party mi leh sa induhsakna uchuak taka hna lakna, thalaite tibeidawngtu a ni” a ti a. He tah hian a sawi chho zel a, ‘Party induhsakna atana siam chawp MSSSB hi Pathian leh mipui zarah sawrkar-na kan siam ve hlauh te a nih chuan, thiah a nih tur thu hi kan lo sawi tawh thin. Vawiinah pawh hian sawi nawn leh ka duh – “Kan sawrkar atanga Ni 100 chhungin kan thiat ang a, a tul a nih chuan MPSC kan thuam chak ang” tih hi a lo sawi tawh a ni, Pu Dy. Speaker. Chu chu, ‘MSSSB kan thiat

ang' a ti mai lova, 'MPSC kan thuam chak ang' a ti a. Chu tak chu tuna Sawrkarin kalpui a tum mek dan hi a ni.

Tin, Pu Dy. Speaker, i phalnain - Mizoram Pradesh Congress Committee Media Department chuan June Ni 12, 2019 khan hetiang hian thuchhuah a siam a, "MNF Sawrkar in dik taka hnathawk thin, an hna lak chungchangah pawh sawisel kai lo tak MPSC ring zo lova, sawrkar hnathawk tam zawk lakna tur chhuhsak tuma thutlukna a siam ta mai hi MPCC chuan pawl a ti tak zet a. Hei hi MNF ze dik tak, Dan leh Hrai pawisakna nei miah lova sawrkar-hnaah a party mite thun tumna kal zelah kan ngai a ni" an lo ti tawh a ni. Pu Dy. Speaker, i phalnain, Pu Lalsawta, V. President, MPC chuan June Ni 4, 2021 khan "MPSC awm reng laia Mizo thalai lehkhathiamte tibeidawng thei MSSSB te hi thiat thuai teh se" a lo ti tawh a. Ka han sawi kher chhan chu, wawi leh khata thil thleng thut ni lo, tun hma deuh atanga party pakhat mai ni lo party pahnihin nasa taka an duh loh leh thiah an lo tum kha a ni.

Tin, Pu Dy. Speaker, tun tumah hian ka sawi leh duh chu, MSSSB thiah a nih vang hian 'thalaite tan hna an la dawn ta lo' tihna a ni lo; 'Constitution Body MPSC hnuaiiah thalaite tana hna lakna rintlak zawk kha kan thuam chak dawn a ni' tih Chief Ministerial candidate a nih laia a lo sawi tawh angin, Chief Minister-in tunah hian tihtlang tuma kalpui mek a nih avang hian MSSSB thiah tak hi thiah chhunzawmin, 'thiah a nih ang hian kal tlangpui se' tih hi kan duh dan a ni.

Tin, Pu Dy. Speaker, MPSC chungchangah hian ngaihkan tam tak a awm thei a. Kum 1991-a Pu SR Vala hoa bul tan atang khan hming chhianatna leh hming hliauna nei lovin tun hi a lo thleng tawh a ni a. Chuvang chuan, hetiang taka rintlak, *constitutional body* ni baw; nichina an sawi tawh ang khan Article 315 leh 323 inkarah khan State Public Commission leh Union Public Commission chungchang hi chiang takin a inziak a ni. Chumi hnuaiiah hna lakna mai ni lo, promotion te leh discipline thlenga kengkawh thei a ni a. Chutianga 'rintlak tak a awm mek laia, a hrang a hraia lo din leh kher lo pawh hian kan ti thei ang' tih hi kan ngaihkan a ni a.

Tin, Pu Dy. Speaker, han sawi chian hlek ngaia chu - December 2016 khan Pi 'Renu Sharma Committee' tih chuan hna lak chungchangah '*Recommendations of the committee consulted to assess the necessity for filling up of post under direct recruitment quota*' tihah khan, chumi hnuaiiah chuan sawrkar hna lak theih loh renga kha, lak theih a nih leh dan an han zirchiang a, department 34-ah post 1024 lak theiha an siam takah khan hna kha muang hret ni anga ngaih kha awm ta ni; wawi leh khatah a rawn chhuak a. Amaherawhchu, tunah chuan an in siamtha chho mek a; nichina kan sawi tak ang khan, hna a lo pun tak bakah a lak danah te *3 stages-evaluation* kha an kalpui avangin thil kha a kal puat puat thei lo deuh a. Tunah erawh chuan recruitment calendar mumal nen kum khata an lak tur hi March thlaah thehluh vek theih ni se, eng emaw tul bik leh pawimawh bik, entirnan: - medical thil te, Health Department

kaihnawih leh thildang a awm anih chuan thu hran a ni a, a bakah chuan Dan ang thlapa a kal theihna turin a commission lamin calendar mumal baw, tin, a department lamin calendar mumal baw zawm se tluang tak, tha tak, chak takin kan duh ang ngei leh kan intiamna angin dik takin sawrkar hna hi lak ni se kan duh a.

Chuvang chuan, MPSC tihchak hi kan duh dan a ni a, Pu Dy. Speaker, chu chu tunah pawh hian kaltlang se kan ti a. Sawrkarin MSSSB a thiah taka hi kaltlang se kan ti baw a. Chuvang chuan, Private Members Resolution, Member zahawm takin a rawn putluh hi a thlawp lo zingah ka awm a ni. Ka lawm e.

HON. DEPUTY SPEAKER: Sawi tur kan la awm em? Sawi tur kan awm tawh loh chuan, Leader of Opposition sawi turin ilo sawm ang u.

PU LALCHHANDAMA RALTE, OPP. LEADER: Pu Dy. Speaker, ka lawm e.

Kan member zahawm tak Dampa Bialtu Pu Lalrintluanga Sailo ina Private Member Resolution a rawn putluh – “*Mizoram Subordinate Service Selection Board (MSSSB) Mizo thalaite tana hna zawng mek rintlak leh tangkai tak thiah tak hi sorkarin ennawn leh rawh se*” tih hi uluk taka ngaihtuah a tul ka ti a. He House-a kan awm hlim atanga kan lo sawi fo tawh chu, “keini hi opposition kan nih avangin sawrkar thil tih a pawng apuia oppose tum kan ni lo; ram tana tha turah hi chuan *constructive opposition* nih kan tum” kan ti a. Kan sawrkarin tuna kan thalaite, a bikin kan sawrkar-hnathawk Group ‘B’ non-gazette level thawktu tena an tangkaipui em em he tia sawrkar thutiam ni atanga darkar khat lekah thiahna tur thu puan han neiha hi, hun hmasa lamah lo sawi fo tawh mahse, sawrkara an thut atangin an tarmitin han thlir se, hei ai hian an ngaihtuahna te pawh hi hmang deuh sela a tha lo maw? Thiah an la duh viau pawhin tlemin insiamrem ngai lai te siam rem ila, a thiah hi chu muangchangin; an policy-a an tih ang pawhin an duh leh la thiat ta sela. ‘A tuartu turte awm dan tur te zirchian a tha lawm ni’ tiin, ‘ennawn ni rawh se’ kan ti a ni.

Kan ngaihthlak tawh ang khan, India Constitution Article 315 hnuaiah chuan Mizoram Public Service Commission pawh hi Dan ang thlapa din a ni tih pawh kan hria a ni. Chu chuan hun rei tak hna an la an ti a, chung an hna lakte chu ‘a fair, a tha’ kan ti a. Mahse, kan han sawrkar tan tirha kan han kal chhoah khan hna latu Board pakhat chauh mai kan han neih khan hna an lak tur a schedule, a timing zawm chhawng hrang hrangte enin kan thalai hna zawng mekte tanah sawrkarin hna lak kan phal, phalna kan pek tawh pawh kha kan hun leh hmunhmain min zo lova. January thlaa lak tura kan pek tawh December thlaah pawh kan la hleithei lo a ni. Hna an thawk taima em em; an efficient viau kan tih rualin, direct recruitment chang a ni lova, service matter promotion tur te, limited departmental exam te, tin, confirmation te, chutiang chang piah lamah chuan disciplinary action lak turah pawh sawrkarin an recommendation te a lak a ngai a, an khawi tur a tam em em avangin, “E khai! kan thalai hna zawng mek te waviinni a

sawrkar pawhin hna a siam tawh la tu tur hi central sorkarah pawh SSC a awm a, India ram state tam zawkah pawh; hengah hian Group B - non-gazette level ang chi te latu tur hi an lo siam deuh vek tawh a, Mizoram-ah pawh hian kan neih ve a ngai a ni” tiin, khati lai MNF sawrkar khan Ni 10.6.2019 ah khan DP&AR in uluk taka zirchianna an neih hnu ah an recommendation angin Cabinet paper-ah lo kalin sawrkarin thuhtlukna kan siam ta a ni.

Hei hi thalaite hmakhua-ngaihna tur te, efficient government a kalna tura tana kan sawrkar decision a ni a, kan tifuh khawp mai. A thawktu tur bul tanna te kan han tih khan, sawrkar hnathawk annih lai pawha mi-hmingtha, a bul tantu turah pawh Addl. Secy (Rtd.), member atan college zirtirtu ah pawh MCTA a president te pawh ni ngat thin mi-hmingtha, kohhran-upa ngat te kha kan han dah a. Amaherawh chu, political party chu inepa thu sawi thin kan nih avangin an political affiliation ni awm ang te pawhin an sawi a, an han sawi bawrhbang vek a. Mahse, engnge a outcome? An term chhunga hnalak han kal te zawng zawng han en hian vawikhat te mah, khawi platform ah mah, ‘an hna lak a fair lo’ tih sawi a awm ngai lo a ni. Kan thalaite pawhin an question siam leh thil engkim an tih hi an ring ngam a, rintlak an ti a, an lawm khawp a ni.

Chutiang chuan a kal chho a, bul an tan tak taka kha, kan chairman ruat a niha office a lua hmasak ber kha, Ni 28.2.2020 ah khan MSSSB hi a thu tan a, sawrkar order ang hian a kal dawn tak tak a. He House kaltlanga resolution kan tih hi min ennawn sak loha, order thar a awm lova Ni 28.2.2024 ah a tawp anih chuan, kan ram rohlu tur hi ‘kum 4 chauha upain a pamhmai dawn’ tih a ni. Chung zawng zawng han ngaihtuah hian, hnathawhna hun an neih hi kumkhatah ni 365 anga chhut sak ni 1460 awm ang a ni a. Inrinni, Chawlhni paih bakah Covid avanga kan harsatna laite en khan hna an thawh tawh chin ringawt pawh he House-ah hian; anni hi thuam chaka, kan thalaite tan leh kan sawrkar hnathawktu, a khawlpuaia awmte tanah thuneihna tam zawk pek an tul zia kan hriatchian ka beisei a ni.

He hun chhung reilote ah hian an hna lak leh an thiltihte (Pu Dy. Speaker, taw te chauh..) House-a sawi ka han duh lai chu – Kan ZPM unaute khan, “research committee te kan siam a, kan zir chiang a, kan policy ah te kan telh a .. chuti, kha ti ..” an ti a. Research committee a hotupa, kan Vice-Chairman khan, ‘hna 3018 an la’ a ti a. Amaherawhchu, kan researcher hote hi ka ngaituah a, ‘kan hotute vision pawh hi a sual pah ta em ni aw’ ka ti a ni. A chhan chu, tun MSSSB hian direct recruitment kum 4 chhunga a tih zawng zawng, (ninin piah lawka high school teacher 50 an lak takte nen khan) 3018 nia in hriat kha, 328 chauh an la a ni a. Research kan tih dan kha ‘a dik lo em ni aw’ ka ti a ni; 328 chauh an la la a.

Tin, ‘limited department’ kan tih, sawrkar hnathawkte ina anmahni chhunga mi 149 an la a, departmental exam pangaiyah 52 an la a. Tin, promotion Group ‘B’ ah departmental promotion hi non-gazette ah 3097 an tifel hman a, regularized tur atana recommendation

hi mi 166 an tifel hman a, confirmation Group 'B' ah hian 1355 an ti a, conversion hi Group 'B' ah 43 an tifel hman a, absorption an recommend hi 43 a ni. Tuna ka sawi ang khan ni 1460, chawlhni leh Covid lai zawng zawng nena tichungin hemi chhunga kan MSSSB hnathawhna chhawrtu chhungkua 5233 an awm tawh zawk a ni. Direct recruitment hna ringawt hi an lak a ni lova, Group 'B' non-gazette te service - promotion te, limited departmental exam te an khawih a. Tin, action lak ngai a ni emaw, sawrkarah MPSC in 'A' level-a a tih ang chiah hi an ti a ni tih hi kan hriat a tul a.

Information dik lo kan hmang dawn tepin ka hria a, sum pawh khati taka hnathawk kha an seng hautak lo. Thla khat an expenditure ni 1,40,000 awrh a ni a, a chhan chu an mahni thawktu 21 te kha department dang dang atanga pawhkhawm sawrkar hnathawk nghet te, pawnlam mi kha chu kan Additional Secretary te, kan Joint Secretary - sawrkar hnathawk hming tha taka pension Chairman leh, member-a kan dah te, khang an pension hlawh baka tlem a pek punna leh an vehicle atana kan sen mai kha a ni. Chung chu kan dinhmun a ni a, langtlang taka an tih - an result siam leh engkim, result pawh a tlangpuiin a niah an tichhuak thin a ni. Chutiang chu an dinhmun a nih avangin Pu Dy. Speaker, hemi ah hian kan hresual tepin ka hria a ni.

Tin, MSSSB ah hian direct in sawrkar a involve thei lo; fair takin an ti. Kan sorkar hian engnge MSSSB hi thiah a duh chhan aw; Ministry hmasa thil tih a nih avang hian kan tho thut a, kan ti mai em ni le; hnam paw, ram paw, thalaite paw pawh hi kan khawih a ni lo maw?' tiin, a bik takin i dinglama thu te hi ka zawt a. Kan hnalak tawh direct emaw, departmental exam emaw khang zawng zawngah khan pakhat tal 'a fair lo a ni' tih tur, question set dan emaw, question leak-out emaw ah complain pakhat mah a la awm lo. Tute emaw a chhungrila an lo phun a nih pawhin, anni chuan, 'lo kal rawh u, in answer paper, in interview mark engkim en theih a ni' an ti a ni. Chutiang taka langtlang MSSSB hi a hlut teh lul nen; kan sawrkar hi ka fak teh lul che u nen, hemiah kher kher hi chuan inennawn leh turin ka ngen che u a ni.

Pu Dy. Speaker, Leader of Opposition hi chu tlemin hun pek thin a nih avangin khawngaihmin min ngaihchan ka duh a; kan House Leader nen hian tlemin hun min pek thin kha maw, kan thut dun lehngal kha.

A dawt lehah chuan, kan sawrkar hian MPSC ah transfer in tum niin hriat a ni a; a tha e. Amaherawh chu, chu lai chu tawi tein ka sawi ang a. Anni hi an fair; an tha. vawiin nia Group 'A' chin an khawihah pawh rinaiin exam chhawng leh thawktu mi 66 chauh nen sawn vawiin nia an khawih chin pawh hi an thawh tawh a ni khawp mai. Vawiin niah Group 'B' non-gazette te MPSC in a khawih lai aiin an khawih tam zawk; MSSSB khawih mihring hi an tam zawk a ni. Ka thinlunga a lo lan dan chuan, *no-thum belah no-sawm* min chhum tir dawn. Vawiin niah MPSC pawhin sawrkarah an indaihlohna an thlena, lak an duh te pawh an tih mek laiin, kan la lak tir chuang lova, an mamawh an sawi pawh engmah kan ti silova. MPSC inbuatsaihna tur an rawn thlen pawh la tih

hmaa, wawiin nia an thawh lai mek pawh duh anga an zawh loh laia, a aia lian zawk kan va pek hi, ‘tunge tuar tu tur’ tih chuan, kan thalai hna zawng lai mekte an ni; hna tam tak lak tur hi an la thei hrih dawn lo.

Tin, chu chauh a la ni lo; sawrkar-hnathawk promotion tur te, departmental exam tur tam tak a pending leh thep thup dawn a, thalai hna zawng tam tak hi over-age phah dawn a, promotion tur sawrkar-hnathawk tam takte hi an pension phah dawn a, ‘mi pawh kan va sawi hnem dawn em! I ngaihtuah nawn teh ang u’ tiin kan inngen a ni.

Pu Dy. Speaker, chu laiah chuan tawi te han sawi leh ka duh pakhat chu - A serious a ni; he thil hi ka sawi nawn leh duh. Wawiinah hian *thiahna order* kan pe ta; advertisement chhuah tawhin sawrkarin engkim a ti a, advertisement chhuah sa vek tawh, nikum November 10 a last date pawh ni tawh post pahnih – AAO, Finance Department - 43, Sub-Inspector, Excise Department - 7, (AAO ah hian nichina kan member pakhat khan a diltute hi ‘*mi 1000 vel emaw chauh*’ a han ti ngawt a; kan va research lo chiang em aw ka ti). AAO ah hian diltu applicants 8429 an awm tawh. Tin, excise Sub-Inspector atan hian 3406 an awm; tunah hian exam fee pawh pe veka exam hun nghak mi 11835 an awm mek a ni. Chung ho-ina exam fee an pek pawh hi AAO - 12,56,700/-, Excise Sub-inspector - 5,97,000/- avaiin, kan thalai rethei te-tete hian exam fee atanah pawh 17,66,400/- an pe tawh a, sawrkar account ah a lut vek tawh a, chuti chung chuan an exam in phal dawn lo maw? Kan thalaite hi an va thinrim dawn em! Thla thum chhung inbuatsaih tawhte rilru, an moral in ti down a, in compensate dawn em? Engtik niah nge exam in buatsaih sak dawn? Pu Dy. Speaker, a pawimawh a ni; hei hi hnam hnuk khawih a nih avangin ka sawi duh a ni. Chu bakah, a department inbuatsaihna zawng zawng pawh a tam em avangin, chung chu kan sawi duh a ni.

A dawt lehah chuan - ‘MPSC’ tih lai hi a ni. MPSC chu *constitutional body* a ni a, kan duat ang a; a zahawm takin a kal ang a; kan ring tawk a ni. Amaherawh chu, tunah hian Group ‘A’ leh ‘B’ gazette an khawihah hian mamawh an ngah a. Hna lakna tur mi 11 sawrkarin a phalsak mek pawh kan la lak tir thei lova, exam hall tihlen an duh a, kan la tihsak theih lova. Tin, question print-na tur printer lian zawk te tur pawh kan la pe thei lova, confidential section room pawh kan la ti thei lova; guard barrack te, driver room te pawh engmah kan la tihsak thei lova. Engmah an mamawh pe chung si lova wawiin kan tih tum dan hi chu ava dik lo em!

Pu Dy. Speaker, a tawpna atan chuan - Group ‘A’ level chin an khawihna lamah hian kawng hrang hrangah tih tur tam tak an nei hi wawiinah hian uluk takin House Leader hian min ngaihtuhsaka tan kan duh em em chu, Sawrkar thar - *kalphung thar* in lo kal hian, in rawn tia ka rin chu, hna lak fair taka in tih dawn chuan, MSSSB in Group ‘B’ non-gazette chauh kan tih hian, “Group ‘C’ leh Group ‘D’ hi kan pe dawn; DPC ah ni lovin, hna lak zawng zawng hi an kutah kan pe dawn” in ti dawn emaw ka ti a, a thiat zawngin in rawn ti a. Chuvang chuan, kan sorkar, ‘mipui-sorkar’ inti te hian an

thuthlukna neih mek hi khawngaihtakin ngaihtuah nawn sela, ram leh hnam tana tha tur vawiiinah hian ngaihtuah chiang rawh u. Thiah in duh hrim hrim pawhin, in duh leh kum khat hnuah pawh thiat rawh u. In thiaha, an invawm khawmna tur inpui hi peih a la ni lova; an indaih lova; an mamawh an rawn thlen lawm lawm pawh in la tihsak loh lai hian, kan thalaite hi an beidawng dawn. Hna pending tam lutuk tur te, service pending tam lutuk tur te hi ‘khawngaih takin min ngaihtuahsak teh u’ tiin kan House Memberte ka sawmin, ka ngen che u a; he Resolution hi khawngaihtaka min pass-pui turin ka ngen che u. Ka lawm e.

HON. DEPUTY SPEAKER: Kan sawihona kan duhtawk tawh ang a, a concerned Minister, Department of Personnel & Administrative Reforms changtu Pu K. Sapdanga kan sawm ang a, sawi tul a tihte han sawi sela, ilo sawm ang u.

PU K. SAPDANGA, HON. MINISTER: Pu Dy. Speaker, ka lawm e.

Dampa Bialtu, House Member Pu Lalrintluanga Sailo resolution rawn putluh - “*Mizoram Subordinate Service Selection Board (MSSSB), Mizo Thalai hnazawng mekte tana rintlak leh t̄angkai tak thiah tak hi Sorkar in ennawn leh rawh se*” tih thu hi; ni e, kan han sawi khawm nak nak a. Sawrkar thutluknaah chuan, tun “February Ni 16-ah hian a tihfel ngai zawng zawng lo tihfel ni sela, February Ni 29, (chu chu karleh Ningani) ah thiah/pem ni sela, MPSC-ah luhpui ni sela” tih kha a ni a. Ani hian, ‘thiah tak hi’ a rawn ti a, a resolution pawh hi, *literally* chuan a la nilo deuh hlek a, chu chu ka han sawifiah hmasa a ni.

Kan ngaihthlak tak ang khan, Cabinet Committee-in MSSSB din tura a rel kha June Ni 10, 2019 a ni a. Tin, notification a chhuah kha June Ni 19, 2019 a ni a. Tin, Chairman tur kha an han zawng tan a, thil mak deuh awm chu, All India service te, tin, Central Civil Service te diltu an awm nual a ni. Chung ho zingah chuan ruling party adviser kha Chairman atan a han tling nawlh phawt mai a, chu chu, Mizo-mipuite thinphut vawi khatna a ni phawt a ni. He MSSSB hian Mizo-mipuite thin a tiphu zing khawp mai.

A dawt lehah chuan, March Ni 30, 2020-ah a han function tan a, MPSC nen file an han inchuh phawt mai a. Sawrkar lamin file inthen dan tur a siam mumal lo a ni awm e. File thenkhat chu an han inchuh phawt a, thenkhat an inhnawn bawk a. Chumi avang chuan, hnalak laklawh pawh kha eng emaw chen chu a khaihlak leh a nih kha; kan la hre theuh awm e. Chu chuan thalaite thin a tiphu leh a ni.

A dawt lehah chuan, hna an han thawk ta nual a, (a kum, a hunbi chu sawi lo ila) RTI zawhna mipui hriatah a lo lang a. Chutah chuan – “MSSSB-in hna a lak dawn hian politician-te an rawn inrawlh em?”, tih zawhna a awm a. Chu chu a thawktute’n an chhannaah chuan - “Inrawlh e”, tih a ni tlat a ni. Chu chuan thalaite thin a tiphu nasa leh khawp mai.

A dawt lehah chuan ... (*interruption*)

PU LALRINTLUANGA SAILO: Pu Dy. Speaker, *Point of Clarification* atan ka duh chu - kha zawhna pawh kha kan hmu a, mahse engnge a result an tih kha? – “Political party khawi atang pawhin ti se, result engmah a tidanglam lo” tih chhanna a awm kha.

PU ROBERT ROMAWIA ROYTE: Pu Dy. Speaker, *Point of Clarification*, please.

Hei, RTI zawhna hi i phalnain ka han chhiarchhuak ang a, Zawhna 5-na kha –

“MSSSB din a nih hnuah sawrkar-hnathawk tur Group-B lak a nihin thuneitu-sang, Minister-te, MLA-te leh sawrkar official dangin an duhsak zawng la tura ziah sak emaw, tawngka emawa sawipuina a awm em? A awm a nih chuan, xerox copy min pe la” tih a ni a, a chhanna zawk hi a pawimawh lai chu a ni. - “MSSSB din a nih hnuah sawrkar-hnathawk tur Group-B non-gazetted lak a nihin thuneitu-sang atanga tawngkaa sawipui chang a awm ve thin a. Nimahsela, sawisak avangin tling lo tur tihlin tumah an awm ngai lo. Hei hi enfiah theih reng a ni” tih a ni a.

PU LALNGHINGLOVA HMAR, HON. MINISTER: Pu Dy. Speaker, an hunah khan an sawi tawh a lawm le; a tawk viau tawh a lawm, tunah chuan le.

PU LALMUNAPUIA PUNTE: Pu Dy. Speaker, *Point of Clarification* nen a inkalh daih tawh.

PU K. SAPDANGA, HON. MINISTER: Pu Dy. Speaker, ni e; ‘triple’ han tih hian kan lo za deuh te pawh a ni ang e. MSSSB hi MPSC-in, “Keini hi hna-latu, *constitutional body* kan ni a. Amaherawhchu, kan indaih lo em mai a, min puitu tur *subordinate body* kan mamawh e” tih ni se, a ngaihthiamawm a ni. Amaherawhchu, chumi hna-latu pangngaiin an indaihloh thu pawh an sawi lova, anmahni puitu tur body dang ruat/rawtna pawh an nei hek lova. Amaherawhchu, political body atanga puitu tur ruat anni hi a hlauhthawnawm hrim hrim a ni. Chuvangin, MPSC initiative chu ni se a pawmawm khawp ang. Amaherawhchu, MPSC pawhin tul a tih loh ngawih ngawih, political pressure avanga he *Body* hi executive body-ina a din, executive body-in a duh duh huna a tihdanglam theih, thalaite career inngahna atana body siam hi ram tan leh thalaite tan a him lo a ni.

Senso chungchang nichinah khan member zahawm takte’n an sawi a. ‘Staff hlawh ₹9,61,595 a ni e’, tih sawi rik a awm a; a dik a. Tin, vehicle leh maintenance atan ₹1,41,300 sen a ni bawh a. Tichuan, he MSSSB hi a awm avang hian thla tina kan senso

chu ₹11,02,895 a ni a. Hei hi sawrkar hmasa tan khan engmah lo a ni maithei, sawrkar thar, ₹5/- takngial pawh hnutchhiah loh sawrkar tan chuan thla tina senso atan a lian em em a ni. Kum khat chhunga senso phe chu ₹132 lakhs lai a ni a. Heti zat han save hi he sawrkar thar tan hi chuan thil hlu tak a ni. Tunah hian a lehkhapuan lehlam awl takngial pawh hi kan awt ngawih ngawih a. Tihian, a lehlam awlah kan rawn inbuatsaih hram hram a ni a. Kan Chief Minister pawhin hmannah min entir tawh kha.

Chuvangin, he MSSSB hian thla tin thawh tul lem lo thawkin, a awm lo pawha kan thawh theih reng, kan sawrkar-ina a thawh theih reng thawkin thla tin ₹11 lakhs a lo seng ral thin a ni a. Chuvangin, sum dinhmun ngaihtuah pawh hian, “he Board hi chu lo chawl rih sela, *constitutional body* awm reng hi tichak ila” tiin sawrkar thar hian he ngaihndan hi a lo siam ta a ni a.

Tin, staff eng emaw zat an awm a, an zavai deuhthawin department DP&AR hnuai mite anni a. Tichuan, MPSC hian tul a tih apiang a chhawm a. Tin, an luhna tur post te pawh tlem tlem siam danglam a awm a, lungawi taka an luhkhawm theihna turin post pawh siamrem vek a ni tawh a. Tichuan, MPSC-in a mamawh loh staff te chu ‘an department-ah an kir leh mai tur a ni’ tih a ni a. Tichuan, senso pangngai reng thawkin sawrkar office lam a lo indaih sawt dawn tihna a ni a, MPSC a lo indaih sawt dawn tihna a ni bawk a ni.

Nichina kan ngaihtlak ang khan, thalaite hi i zawt ang u; board hniam zawk lak nih nge an duh, board sang zawk lak, chu chu a ni mai. Chuvangin, motion vawiin lo lut “sawrkarin ennawn leh rawh se, he MSSSB thiah thu hi” tih hi chu ennawn chi zia zang a ni lova. Opposition lam pawh hian ‘thiat thuai thuai rawh u’, tiin min nawr min nawr zawk turah kan ngai hial a ni.

Tichuan, a tir phat atanga Mizoram mipuite hlauhthawn, a hnua hlauhthawnawm lo lang lo lang te avang khan he MSSSB hi he sawrkar thar hian, “a tel lovin a awm theih hi a; a hnathawh zawng zawngte hi MPSC hnuai hia mumal taka thawh theih vek a ni e” tih a hriatchian em avangin thiah hi a lo rawt ta a ni a. Chuvangin, vawiina kan motion sawiho ‘sawrkar inngaihtuah nawn leh rawh se’ tih hi chu thil tul lo a nih avangin, a pulut tu hian withdraw leh turin Pu Dy. Speaker, kan ngen zawk a ni e. Ka lawm e.

HON. DEPUTY SPEAKER: A concern Minister in a sawi tur ang te a sawi tawh a. Tunah chuan kan House Leader Pu Lalduhoma, Chief Minister-in thusawi duh a neih te sawi turin ilo sawm ang u.

PU LALDUHOMA, HON. CHIEF MINISTER: Pu Dy. Speaker, ka hmaa Minister changtuin a sawi ang khan, kan resolution hi a hmanhmawh deuh hret a, “thiah” tih tak hi, kan la thiat lo a nia; amaherawhchu, thiah tum a ni. Mizoram hi kum kha leh chen kha sawrkar-hna latu atan MPSC ringin kan lo kal thin a, kan

hruaitu hmasa te'n hei hi tawk an ti a. Kum 2019-ah khan hna lak tur 1000 chuang zet mai a lo awm ta a. Chutih laia kan hruaitute rilruah chuan engnge lut ta ni le? Group 'B' bik laknaah khan thuneitu hran siam chakna a lo awm ta thut mai a. Tichuan, MPSC kut atangin an ui chung chungin Group 'B' lakna chu chhuhsak an lo ni ta a, MSSSB a lo piang ta a ni.

A tir atangin MPSC nen an inkarah inhruipawhna a awm nghal a. Hna kal lai an lo khawih laite chu MPSC-in SSSB-ah a pe a, khawih zui duh lovin. Sawrkar hnalak rei fe a khaihlah a, a tawpah peklet leh a ni a. Hei hian recruitment kal lai a ti bahlah thui em em a ni. Chutih laia kan sawrkar hruaitute chhuanlam awm chhun chu, "MPSC hian an hna an zo lo a ni; hna an la chak tawk lo" tih kha a ni a. Amaherawhchu, khatih lai ngeia an Chairman, Reverend ni ngatin engnge a sawi Zoram-khawvel hian kan hria a ni – "Hna lak theih loh an nei lo; indaih lohna an nei lo" tih hi mipui hriatah a puang a nih kha. MPSC Chairman berin a sawia kha chu kan pawm lo thei lo, midang hian. Tin, khatih laia party tin khan kan dodal bawka a ni.

Chuvangin, he SSSB hi dodalna kara lo piang a ni a, *a bilha tho lo* a ni. Thiat a tulnate chu, pakhatnaah chuan, Sawrkar tan a hautak a ni. Nichinah khan an hlawh leh senso kan ngaithla a. Nikum chhung 2023 leh 2024 inkar (tun financial year kal lai tihna anih chu) ₹174.86 lakh an hmang zo tawh a ni, SSSB hian. Tunah hian balance ₹47.96 lakh an la nei a, a vai chuan nuai ₹2,222.8 lakh a ni. Hei hi 'a hautak lo' tih rual a ni lo. Chuvang chuan, hemi hi kan thiah chuan an room te thlengin thildang tangkaiah kan hmang thei; an motor-te pawh tangkai zawkin kan hmang thei; a staff te pawh chhawmzui atana tha chu MPSC-in a chhawm ang a, abolish ngai chu kan abolish ang a, an parent deptt-a kir leh tur chu kan repatriate ang. Chutiang chu a ni a, an bungrua (functional property assets) an neih ang angte pawh MPSC hian a chhawm mai dawn a ni.

Tin, MPSC leh SSSB neih tlan a buaithlakna riau a awm a. A chang chuan exam hun a inrual thin a ni; a hna inang si lovah exam hun a inrual a. Tichuan, a hna pahniha dil duhte tan khan duhthlan zawk tur neih a ngai a. Pakhat zawk an dil laiin, pakhat zawkah exam an tithei lova. Tin, a ruala a lo thlen hian exam hall indaihlohna a sang thin bawka a ni. Tin, kan ngaihthlak ngun em em, *constitutional body* ni lo, executive order hmanga duh duha tihdanglam theih; ruling party, sawrkar dinglaiin duh duha a tihdanglam theih *body* a ni a, a him lo a ni. Tunah keini ngei pawh hian rilru thianghlim vak lo chu pu ve ta ila, kan thiat phal hauh lo ang; chhawr zui ve kan chak ngawih ngawih zawk ang chu. Mahse hetiang thlemna nena innghen reng hi keini chuan kan duh lova. Nichinah khan Staff Selection Commission te nen kan han tehkhin a; tehkhin chi a ni lo. Staff Selection Committee te chu India ram pum pui tana an din a ni; Mizoram pawh min huap. Khangte kha han sawimawina atan point tling a ni lo hrim hrim. Tichuan, Constitutional body ni lo na na na, ruling party ina duh duha a sawisak theih ni na na na chu, Chairman an han ruat a; kan hriat ang khan Chairman post advertisement hi a lehkha kan en chuan - *Copy*

to all heads of Department tih chu a chuang ve a ni. Mahse, Chiang taka kan hriat chu, deptt. te hian an hmu kim miah lo. ‘Confidential ang deuh thawin Chairman post advertisement hi an kalpui a ni’ tih hi kan Chiang khawp mai. Dil duh ten’n an hre kim lova, an dil thei ve ngai lo. Tin, *qualified* zawk an awm pawhin, (kan ngaihthlak tawh ang khan) a qualify lo zawk an lak takte aia awm tak tak hi lak lovah an tang tlat thin a; chutiang chu thil awmdan a ni a.

Kan ngaihthlak fo tawh ang khan, ‘a mihring hi a pawimawh lo e’ kan ti a, a mihringa hi lawm pawimawh! Anih leh, wawinah hian keini aiawhah khawi laiah emaw tu tute emaw dah ta ila kan pawm ang em? MLA an ni tho dawn a ni; Minister an ni tho dawn a ni. A mihring hi a ni pawimawh chu ni. Chuvang chuan, party adviser nilai, “A, hetah hian i awm dawn nia; bang mai rawh” in tih chawp ang chi kha; a mihringa kha ‘a tha lo; a fair lo’ kan ti a ni lo; a lan dana nalh lo sawi mawi talh tum chi a ni lo, heng hi; *mitdel-biru* ang mai a ni a, a lang kuk mai a ni. Chutah, an han ruat chho leh zel a, chairman pakhat chu (a hming ka sawi lo ang) Tuichang biala ding tura a hming sawi ve hat hat a ni a, *vangvat-kai* a ni. Pakhat leh chu China pawha han kal ve tawh ngat kha a ni a, *vangvat-kai* tak a ni. Khatiang hlir mihring an dah takah chuan rin ngam hi a har ve deuh a ni, opposition tan chuan. Chutiang chu thil awmzia a ni a.

Nichina a mover, resolution neitu khan, “hengah hian DP&AR atang te pawhin an va inhnammawih a, an va telpui thin a ni” a ti lenghal a. Khatiang a nih lek pheh chuan leh tel lo turte an la tel leh zel a nih pheh chuan, sawrkar dinglai thu chu an zawm lo ngam lovang tih chu a Chiang sa a ni; khatiang niai-nuai kha a ni a. Chuvangin, nikum February thla khan MZP te, College Students Union te, hnam pawl zirilaite’n Chairman bang turin an nawr a nih kha. ‘thil fel lo a awm’ an ti a, bang turin an nawr a, hnalak kal lai a tikhawlhkham viau bawk a nih kha.

Tin, SSSB hnuaiah hian *political fitness* hi ‘qualification pawimawh deuh a nih chang hi a awm a ni mai awm mang e’, tih theih turin thil hi a awm a. Thil zawng zawng ‘a fair lo; a tha lo vek’ kan ti reng reng lo; dik leh fel takin thil tam tak an ti tih hi kan pawm. Amaherawhchu, RTI chhanna te kha engtin nge maw kan phat dawn le? “Sawrkara thuneitu-sangte an rawn inrawlh thin” an ti a nih kha. Chutiang inrawlh theihna *body* thiah te chu engah nge maw kan ui em em le? An inrawlh chung a an lo sual phah lem loh a nih leh a ziaawm a; mahse, waw engzat nge an inrawlh dawn; an dodal reng seng ang em? Kha kha kan hre hleinem. Khatiang inrawlh theihna kawngka inhawng reng kha ‘I chhawm lo ang u, keini chuan’ kan ti a ni. Chuvangin *political fitness* hi a awm a ni ang.

Pu Dy. Speaker, inleng wawikhat chu ka nei a, kan hotupa, rei tak inzui tawh kan ni a, “Pu Duh, MNF ah a derin ka luh san dawn che”, min ti a ni. ‘Engati nge’ ka ti a; “Ka fanuin, i luh loh chuan...” min ti tlat. Ka fanu hi lehkhathiam thei tak a ni a, SSSB hnuaiah hian dil theiha piang hi a dil ve a, a aia thiam lo hi an la reng mai a, a rilru a na

lutuk a, ‘Ka pa, ZPM i nih chhung chuan i fanu hian sawrkar hna ka hmu dawn lo; ka kum a over tep tawh; lut ve rawh’ min ti tlat mai a, min lo hrethiam dawn nia” a rawn ti a ni; chu chu a taka kan tawn a ni.

Serchhip bye-election lai khan engtin nge kan inzawrh kha? Khatih laia kan Chief Minister ngei khan MNF candidate kha, “*Hnam Run*-a hna semtu a ni” a ti a nih kha! Engtin nge candidate ve ringawt khan sorkar-hna a sem theih? SSSB kaltlang hian em ni a sawi ang le? Ka bialah chuan certificate xerox copy an laksak teuh lehngal a, sawrkar hna tiamin; chu chu a ni thudik tak chu. Opposition kan nih lai zawng zawng khan ZPM nih chak ve ngawih ngawih, an fate hna dil an awm avanga ni ngam lo kan tawng teuh. An thilunga an duh ni hauh lo, an fate’n hna an dil avanga ruling party a dera inpe kan tawng teuh; hei hi thudik a ni. ‘Engvangin nge a thlen?’ kan tih chuan, kan kalphung hi a dik tlat lo a lawm; hetiang hi kan kawl tlat a lawm. Chuvang chuan, heng hi thudik a ni a; tin, hetiang ram zimah hian kan mamawh lo hrim hrim a, mihring kan tlem a.

Tichuan, MPSC hi 1991-a din a ni a, tunah hian kum 33 lai a ni ta a. *Constitutional body* dik tak a ni a, hmingchhiatna a la nei ngai lo a ni. Tichuan, tuna SSSB kan thiah hian MPSC kan thuam chak dawn a ni; kan pawng thiah dawn lo. Tuna MSSSB-a thawk lai atang hian senso dang ngai lovin, Dy. Controller of Examination te, Asst. Controller of Examination te, Assistant, Steno, UDC, LDC leh Group ‘D’ te MPSC hian a chhawm nghal dawn a ni. Tin, an *functional assets* neih zawng zawng a chhawm bawk ang. Tin, MPSC tan hian post thar 11 siam phalna pek a ni tawh a. Amaherawhchu, Pu Dy. Speaker, a vai vai hian an mamawh pawh ka ring chiah lova; tuna an chhawm turte nen hian kan adjust ang a, chumi baka tul an la nei a nih chuan, kan fill up sak mai dawn a ni. Tin, tunhma ang kha a ni tawh lova - MPSC hian examination wing a hranpa liau liau-in a nei tawh a, harsatna engmah an nei lo. An harsatna neih chhun chu, examination hall a ni. Tuna an hall neih khu mi 800 emaw vel leng a ni a, diltu an lo tam chuan hmun eng emaw zatah then a lo ngai a; a physical infrastructure zawk kha kan buaina a ni. Hengte pawh hi tihreh a harsa lo, district tinah hna lakte han sem darh ila, tichuan, tam lutuk lovin, hmun hrang hranga kan tih chuan lak mai theih a ni a; heng hi harsatna liantham a tling lo a ni.

Tin, MPSC-ina a hun hman tawh zawng zawng han thlir let hian, a huna promotion hmu hman lote, regularize hman lohte an awm ngai kan la hre miah lo, an qualify phawt chuan. Tin, kan insawithaih a, vawiinah hian, ‘thalai tam tak an beidawng dawn; chuti, khati’ kan ti a, ‘a tuartu tur in ngaihtuah lawm ni’ kan ti a. Tumahin an tuar dawn lo; tuar tur tumah an awm lo. Tuna form lo fill up ho zawng zawng hian application an theh luh leh a ngai lo; an chhawm dawn, MPSC-in; tichuan, an rawn exam tir mai ang. Tin, an application an theh luh laia an kum kha a over loh phawt chuan, khatih laia an kum kha chhiar tur a ni. Chuvangin, thalaite tihbeidawwna tur emaw, tute emaw tih-thlabar

tuma, fuihpawrh tuma kan tih vak vak hi a dik lova. Khang MSSSB-ina a lo tih tawh, a lo dawn khawm kha MPSC-in a lachhawng ang a, a hunah a ti mai dawn a ni.

Tin, tunah chuan MPSC hian Annual Recruitment Calendar a nei vek tawh a. Tunhma kha chuan department-in lak tur an neiha piang an hman hun hunah an va thehlut ringawt a. Khatia an va thehlut rual ruala an niin an hman hun huna hna lak lo process zung zung kha an thei lova. Tunah chuan kum khat chung programme fel takin scheduled an nei a, Annual Recruitment Calendar an siam sa vek a; tunhma anga harsatna kha a awm tawh tur a ni lova. Chuvang chuan, hnalak hun turte calendar fel taka siam diam a ni a, harsatna a awm tawh lo a ni.

Tin, tunhmaa hna kha a hran te tein an la thin a, kha khan hun a duh a. Tunah chuan thil thar - combine examination introduced a lo ni tawh a, hei hian hna a titem tawh bawk a ni. Tin, tunah hian an room te renovation tih mek a ni a, thla leh hi chuan renovation work hi an zawh tawh kan ring a. Mamawh zualpui an neih chu driver room a ni a, heta tan hian cheng nuai 50 vel a ngai turah kan ngai a, hei hi chu kan ngaihtuah sak mai dawn a ni. Anmahni MPSC hotute nen pawh an harsatna chi hrang hrang kan sawi tawh a, an rawn theh lut tawh a. Heng bakah hian eng emaw mamawh dang an la nei a, chu pawh chu kan sum dinhmuna zir zelin kan ngaihtuah sak zel dawn a ni.

Tin, sawrkar hmasa khan MPSC hi a lo enkawl tha vak lo a ni ang, ‘sum leh paiah a lo hrek deuh emaw ni aw’, ka ti a. Kum 2022-2023 ah khan nuai 912 pek an ni a; nikum khan nuai 859 pek an ni ta a; nuai 53-in a lo tlem ta a ni. Khatianga kan sawrkar atanga an sum hmuh tur kum hmasa pawh tluk lo zawnga an lo kal tir a nih chuan an tan hian chet a lo harsa hle a. ‘Duattu sawrkar an hmu lo a niawm mang e’ kan ti a, kan lainat viau a ni.

Tichuan, ZPM hian dinna kan nei a, sawrkar hmasa thil lo tih tawhte reng reng chu chhawm tlak a nih phawt chuan, “iai hauh lovin kan chhawm zel ang” tih hi a ni. Tunah pawh sawrkar hmasain “Nilaini apiangah traditional dress i ha ang aw” an ti a, kan chhawm mai; a tha kan ti a ni. *A chhe lai siam thatu* nih hi Pathian leh mipui hmaa kan intiamna a ni a, a chhia hi chu kan siam tha dawn a. MPSC, kan zirlaite pawhin ngaihngam taka an rin ngam tur pek kan duh. Zirlaite/thalaite ngaihngamna sat tur hna latu tur chhawp chhuah kan duh avangin, “hei hi i chhawm zel lo ang u; i thiat teh ang u; MPSC hi i thum chak zawk mai teh ang u” kan ti a ni a. Chuvang chuan, he resolution hi thlawp theihah kan ngai lo a ni. Ka lawm e.

HON. DEPUTY SPEAKER: Aw le; tunah chuan resolution neitu Pu Rintluanga Sailo kan sawm ang a; han wind up sela, adopt han dil nghal se.

PU LALRINTLUANGA SAILO: Awle, Pu Dy. Speaker, ka lawm e.

Vawiinah he House zahawm takah ka resolution han sawia hi mi 24 (kan House Leader tiamin) kan awm a, Ruling lam atangin mi 16 in an sawi a. Opposition lam atangin mi 8 in an sawi a. Sawi lo hi member 4 kan awm a ni.

Awle, kan Resolution kha ruling lam ha hawlh zawng tak a nih kha ka ring reng a; a chhan chu, anmahni member ten an han sawi han sawi pawh khan he MSSSB chungchangah hian stand fel tak an neih loh zia kha, Pu Dy. Speaker, a lang chiang hlein ka hria a. Tuna kan House Leader ber pawhin a han sawi dan atang khan, a chairman lak dana kha an complain bera chu a ni mai a, MPSC rintlakzia an sawi a, keini pawhin kan ring a. Amaherawhchu, tumah hi mi perfect kan awm lo tih erawhchu a lang chiang a. MPSC Chairman hmasa ‘*Rev. ngat mai*’ han tih pawh kha, pastor atanga bang chawp deuh mai niin ka hria, Pu Dy. Speaker. Chuvang chuan, han fak em em tur kha a awm chuang lovin ka hria a. “Sawrkah hmasa thiltih hi a tha kan ti lova, chuvang chuan, he motion hi kan thlawp lo a ni” ti fel mai sela a thain ka hria a. Chuvang chuan, vawiinniah ngaihtuahna he motion atanga lo lang ta chu - ‘*Lal ngai lo lal a na; an lal a kha*’ tih hi a chiang hlein ka hria.

Kan member te’n an han sawi phat atangin khan a thatlohna zawng sawi tur a awm lova. Member han sawi hmasa ber khan, “kalphung-thara kal kan tum vangin kan cancel a ni” te an han ti ringawt a. Chuvang chuan, kha kan *Motion*-in a tum zawk, a tobula tanga a hnathawh dan zawng zawng kan sawi kha kan ngaithla lo hlein ka hria a. Kum 2019 kum tir lam khan sawrkarin MPSC Chairman pawh a zawt ngat a, chuta an chhannaah chuan, “MPSC programme leh calendar ah khan December thla thleng a full tawh a; chuvang chuan, thil tihtheih a ni lo” tih a ni a. A sang tel hna lak tur leh a bikin primary school zirtirtu 120 te written exam an neih tawh hnu kumkhatah pawh interview an la call theih loh avanga harsatna tawh kan ni a. Chu chu, DP&AR lamin an han zir chianin, chu an zirchianna recommendation kaltlang chuan MSSSB hi lo piang ta a ni.

A mimal lama kha chu thudang ni sela, party-a a lo nih tawhna chu thudang a ni. Pu Dy. Speaker, i dinglama thute pawh hi “ZNP an nih laia an elected OB te pawh kha MPSC member ah khan an kal tho lo em ni?” tih te pawh hi min ngaihtuah tir a ni. Chuvang chuan, kha lama kha a ni lova; ‘*an qualified em?*’ tih kha a ni. (**Pu Lalmuanpuia Punte:** Pu Dy. Speaker, *Point of Clarification* - ZNP an nih laia kanhruaitu lawk kha, Congress party an nih laia MPSC member an ni.)

Chuvang chuan, khatiang mimal, an party leh an support-a kha chu sawi vak chi ah kan ngai lova. Chuvang chuan, ‘*an qualified em?*’ tih zawk kha a ni. Additional Secretary kha chuan a qualified em em a ni; “non-gazetted lakna tur atana chairman a ni” tih hi keini chuan kan ngaihdan a ni a. Chuvang chuan, kan ramin a mamawh zawka hi kan en a pawimawh hlein ka hria.

Kha, member tam tak khan House-ah an zirchian thu te an han sawi a. Chutah chuan, “thla tin MSSSB enkawl na atan hian ₹9,61,595/- kan hmang a ni” a ti a. Hei hi RTI

zawhna atanga lo chhuak, he sawrkar hnuaia chhanna a ni a. Chutah chuan, thla tina enkawlna hi ₹1,41,300/- chiah a ni. Chutah chuan, vehicle outsource 3 ah thlatin ₹1,00,000/-; telephone bill ah ₹11,100/-; POL ah ₹19,190/-; DPC expenses ah ₹12,000/- a ni. A changtu Minister pawh khan nuai 11 ngawt kha a han tarlang a, a zir chiang lo hlein ka hria a.

Kan sawi leh kan sawi hnu - RTI Zawhna a lo lan danah hei hi a chiang em em a ni. Pu Dy. Speaker, i phalnain – MSSSB enkawlna atan hian chiang taka lo langa chu, heng an chairman leh member-te pahnih hi pay level 14 leh 13A anni a. Member dang - Secretary-cum-Controller of Examination te, Asst. Controller of Examination te, Asst. Grade II pahnih te, Steno Grade III pakhat te, Driver pakhat te, heng zawng zawng hi sawrkar department atanga depute an ni a, an hlawh zawng zawng nena belhkhawm kha chu a ni reng a ni. Amaherawhchu, MSSSB ah pawh thawk lo sela hlawh chu an la dawn tho tho mai a ni. Chuvang chuan, a sen belh zawka kha chu, a chairman leh a members kha a ni mai. Chuvang chuan, helaia kan han sawi thina kha, ‘a ni lo deuh thin a ni’ tih hi a ni.

Tin, Pu Dy. Speaker, i remtihhain, nichinah khan “MSSSB din a nih hnua sawrkar hnathawk tur Group B (non-gazette) lak a nihnaah hian thuneitu sang an inrawlh em?” tih kha, ‘an inrawlh a ni’ tih hi chiang takin tarlan a ni a; hei hi phat rual a ni lo. Hei tak hi MSSSB a fair zia tihlannaah kei chuan ka ngai a. Nimahsela, sawisak avanga tling lo tur tihtlin tumah an awm lo; ‘hei hi enfiah theih reng a ni’ tih hi kan chhanna a ni.

Mizo culture-ah reng reng chuan khawiah pawh MPSC ah pawh member-te hnenah pawh an kal tho; an kal nasa lutuk; chu chu eye-witness a ni. Kha vang khan a board kha fair lo a ni chuang lo; Mizo dan a ni a, kan inngensak thin a ni. Nichinah kan Member zahawmtak Pu Papuia khan a sawi tawh a. He board hi ‘a fair a ni’ tih hriat chianna chu, kei pawh Extension Officer atan ka fanu a inziak tling a, mahse personal-ah a tla tho; ‘Engvang nge?’ tih chuan, a tling lo a ni mai. Nichina Member zahawmtak Pu Lalchhanzova sawi ang khan, ‘a tlinglo a ni’ ka ti ve mai; hma ka la chuang lo. Chuvangin, kan thalai ten he MSSSB hi inngahnan beiseina thuk tak an nei a.

MPSC chu ‘*constitutional body* a ni’ tih kan hria a. Chuvang chuan, helaiah hian an zawh loh nghawngkawh hi kan bah tir leh dawn a; kan Leader of Opposition sawi ang khan, buhfai no 3 belah no 10 chhum tir min tum a ni. Promotion chungchang ngaihtuah a ngai a, Board Chairman pahnih an nei si lova; board an thut apiangin chairman tel lovin a thut theih bawh si lova, an calendar kha duh duha sawrkarin va tih ngawt theih a ni lova; in duh ang angin sawrkar hian an calendar ah kha in va involve thiang hauh lo a ni. Anmahni duh dana kal tur a ni a *autonomous body* an ni. Chutiang chiah chuan, Member thenkhatte khan “thuneihna an nei lo, MSSSB hi” te kan han ti ngawt a, hetah hian *full-autonomy* an nei a, result an puan chungchangah te engkim tumah an rawn lo; government-ah file a kal bawh hek lo.

‘Kan zir Chiang’ in tih chu, a Chiang lo hle mai. ‘Research base-in inthlan hma atangin kan lo zir Chiang a, Vice Chairman ka ni’ te in ti a, Khangah Khan sawrkarin MSSSB a din hnuah a hna lak zawng zawng hi 328 a ni. Zir Chiang inti te Khan ‘3014’ an han ti a, vawiin roelna sangberah hian mumang ram, *mahni sahmim hampuar* atan inrawn hampuar hi a dik lo hulhual a ni. Chuvangin, zirchianna nei si lovin risk-in in kal a, a tuartu tur chu promotion naktuka mamawh tawh te; tin, regularize nghaka awm mek te tan a luhai thlak dawn a ni.

Chuvang chuan, “kan tanhmun hi kan ram tan a dik em; a tha em? Helai sawrkarna chelh hmaa party anga in lo zir tawhna chu kan hrethiam e; sawrkar nih tawh hnuah hi chuan sawrkar angin, ram mawhphurhna nei tak tak angin kan ngaihtuahna te hi i hmang ang u. “ZPM party-a ka luh hmain kan sawi kan sawi tawh a” tih lam a ni lo; a chhungah i luhchilh ang u; chu zawk chu a ni. Vawiinah hian MNF party angin sawi ta ila, keiniin Board Member leh Chairman dah thei rual kan ni lo, sawrkar kut a ni. Chumi tha tichak tur chuan kan thalaite leh hna zawng mekte promotion due tawh te, tin, MR-a kum tam tak lo awm tawh regularize nghah thup te hi, ni hnih-khata kan tihhnufual hi a paw em em a ni. Chuvang chuan, vawiinah hian he ka resolution hi kan ram tan a pawimawh hlein ka hria a ni.

A tawp lamah chuan, he sawrkar hian “MPSC tihchangtluna tihchak kan tum” an ti a, a lawmawm; full-support kan pe che u a ni. Amaherawhchu, reilo tea lo lang tur chu, a takin kan lo hmu tawh thin a, an indaih lohna te engkim a lo lang leh dawn a ni. Sum sen belh harsatna chungchang in sawi let hi in seng leh dawn. Nimin lamah discussion-ah pawh kan sawi; Member zahawmtak Pu Rohminga pawn a rawn tarlan chian em em kha. Chuvang chuan, “hei hi chu MNF thil tih a ni a kan duh lo hrim hrim” ti mai ula, lungawi takin kan pawm mai ang. Chuti ni lova, keiniina opposition roll kan play pawhin a constructive opposition nih kan tum a, ‘a tha apiangah kan pui ang che u’ kan tih laiin, MSSSB leh Nilaini dress hak tihdanglam vel te kha compare chi a ni lo. Helai thawmhnaw hak inthlak thleng leh sawrkar hnathawk inthlak thleng emaw, sawrkar hnathawk lak thar leh heta regular tur te, promotion tur te ngaihtuah kha helaia kan thu raise nen hian tehkhin chi a ni lo.

Chuvang chuan, he ka motion hi vawiinah member 24 laiin min sawipui a, lawmawm ka ti a. Nimahsela, member tam takte Khan in pute duh loh zawng a nih avangin, in duh reng, duh lo anga in han sawi ringawt kha a paw ka ti a. He ram tan hian mi an thi thin; he ram tan hian min an thawkchhuak thin; ‘ka puin a tih loh chuan..’ tih ngawt lama hi a ni chiah lo. Chuvang chuan, vawiinah hian sawitu zawng zawngte hnenah kan thinsung taka sawi kan nih pawhin lawmthu ka sawi tho a. Engpawh ni sela, vawiinah hian Pu Dy. Speaker, ka Private Members Resolution - “*Mizoram Subordinate Service Selection Board (MSSSB), Mizo Thalai hnazawng mekte tana rintlak leh tangkai tak thiah tak hi*

Sawrkarin ennawn leh rawh se.” tih hi he House zahawm taka hian min adopt sak turin ka ngen che u a ni e. Ka lawm e.

HON. DEPUTY SPEAKER: Aw le; resolution neituin adopt a rawn dil a, kan buk ang a.

“Mizoram Subordinate Service Selection Board (MSSSB), Mizo Thalai hnazawng mekte tana rintlak leh tangkai tak thiah tak hi sorkar in ennawn leh rawh se.”

tih hi adopt remti apiangin, ‘remti’ ti ula, remti lo kan awm chuan ‘remti lo’ ti ula.

Aw le; Pu Lalrintluanga Sailo resolution *“Mizoram Subordinate Service Selection Board (MSSSB), Mizo Thalai hnazawng mekte tana rintlak leh tangkai tak thiah tak hi sawrkarin ennawn leh rawh se.”* tih chu House-in a hnawl ta a ni. (**Pu Lalrintluanga Sailo:** A pawl ka ti hle mai! Ka lawm e.)

Aw le, vawiin atana kan business chu kan zo ta a. Kan chawl tawh ang a, kar leh Ni 26 February, 2024 (Thawhtan Ni) chawhma dar 10:30 ah kan thukhawm leh dawn nia.

Sitting is adjourned (3:52 PM)